

**NATIONAL ASSEMBLY OF
SEYCHELLES**

Tuesday 20th May 2025

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble. Bonzour nou piblik ki pe swiv nou. Byenveni zot tou pour nou travay sa semenn.

Mon napa okenn kominikasyon. Nou annan prezantasyon papye. Madanm Deputy Clerk?

MADAM DEPUTY CLERK

Bonzour Mr Speaker. Mersi. Bonzour tou bann Manm Onorab e tou nou bann *staff National Assembly Service*. Prezantasyon Papye i konm swivan;

S.I.31 of 2025 Physical Planning (Fees) (Amendment) Regulations, 2025.

S.I.32 of 2025 Public Enterprises (Amendment of Schedule 1) Regulations, 2025.

The 2024 Annual Report – The Asset Management Unit – Finance Department -Ministry

of Finance, National Planning and Trade.

And lastly, the Public Enterprise Monitoring Commission - Annual Performance Report 2023.
Mersi, Mr Speaker.

MR SPEAKER

Mersi, Madanm Deputy Clerk. Madanm *Hansard* raporter ava apel Vis-Prezidan pour nou konmans nou biznes ozordi.

Onorab Pillay, parey labitid, nou'n fer kler si ou bezwen adres Lasanble, avan ou bezwen demann mwan lotorizasyon avan nou konmanse.

Ou bezwen demann mwan permisyon avan nou konmanse Onorab. I fek *arise*? Mon pa war ki biznes ki'n fek *arise*. Nou pa ankor konmanse.

HON SEBASTIEN PILLAY

Mr Speaker, avek ou permisyon, mon'n demann Onorab Larsen an relasyon avek en let ki i ti'n ekrir *PS Kevin Perin*.

MR SPEAKER

Ok. Non, mon'n dil – Onorab Larsen in vin war mwan. In prezant mwan let. In prezant mwan dokiman. Mon'n dir li mon pou *investigate*. I pa apropiye pour ou lev sa. In lev sa e in ganny dil avek. Mersi.

Alor, bonzour Vis-Prezidan Ahmed Afif.

Bonzour Mr Ted Barbe, *Commissioner of Police; Ambassador Vivianne Fock-Tave*, Sekreter Prensipal dan Departman Zafer Etranzer.

Byenveni pour ou partisipasyon dan *Private Notice Question*. Nou ava avans lo *Private Notice Question*. Onorab Pillay, ou annan laparol pou met kestyon.

HON SEBASTIEN PILLAY

Mersi, Mr Speaker. Bonzour Vis-Prezidan, Komisyoner Lapolis, *PS* pour Departman Etranzer. Bonzour tou dimoun ki pe swiv Lasanble. Bonzour tou koleg Onorab. Mon kestyon i lir koumsa;

Swivan lasirans ki Gouvernman ti pou fer retournen sa veikil blende, mye koni konman *Nyala* ki sorti Sid Afrik – (zis pour piblik mazine, nou pe koz lo sa enn ki la. *(showing photo of vehicle)*, ok?) -

Eski sa transpor ki aze plis ki 30 an e dan en kondisyon deplorab - (la kot i ete, sa son kondisyon konmela Mr Speaker)

MR SPEAKER

Lir ou kestyon parey i ete silvouple.

HON SEBASTIEN PILLAY

Eski sa transpor ki aze plis ki 30 an e dan en kondisyon deplorab, in fini retournen e eski Gouvernman Sesel in ganny en lot transpor oubyen *refund* par rapor a sa larzan ki nou ti depanse... ek sa transpor?

MR SPEAKER

Mersi.

HON SEBASTIEN PILLAY

E Mr Speaker, i enportan pou-

MR SPEAKER

Mersi, Onorab. Ou'n poz ou kestyon. Ou kestyon i kler. Vis-Prezidan, ou larepons...

VICE-PRESIDENT AHMED AFIF

Mersi bokou, Mr Speaker. Bonzour Mr Speaker. Bonzour *Leader Biznes Gouvernman. Leader Lopozisyon*. Tou bann Manm Lasanble. Tou dimoun ki pe swiv nou bomaten, bonzour.

Mr Speaker, premyerman, les mon a fer rapel pep Seselwa ki sa *Nyala* i 32 an ozordi. Pa 30 an Onorab. Ti en laranzman ansyen Gouvernman *US* lepok 2019.

Sa letan an 2019 sete Prezidan Danny Faure ki ti Prezidan. Komisyoner Lapolis Mr Kishnan Labonte. E *CDF* ti Brigadye Leopold Payet.

Sete pour en veikil ki ti annan 26 an sa letan, ti'n fabrike an 1993 e napa okenn dokiman lo *file* ki montre aköz ti nesaser e aköz nou ti bezwen en masin sitan vye sorti Sid Afrik, malgre ki ti sipoze ganny rekonstrir. Parey nou dir, *recondition*.

Zot ti menm ekrir *procurement* an 2019. Sete dan zot letan - pou demann lotorizasyon pou pa fer *tender* e donn permisyon spesyal pou aste avek en tel lakonpannyen Sid Afrik. Sa ti ganny donnen par Gouvernman US sa letan.

E sa letan zot a rapel ti annan en bann konseye Sidafriken dan lapolis ki ti fer bann kontak e bann laranzman 2019 anba Gouvernman US.

Premye peyman 50poursan sonm ki zot ti'n tonm dakor pou ganny peye ti ganny fer an Out 2019. E mon le fer zot rapel ankor an Out 2019 Minis Finans ti Mr Loustau-Lalanne si mon pa tronpe. I ti zot kandida Vis-Prezidan dan Eleksyon 2020.

Dezyenm peyman ti ganny fer an 2022. Sa wi. Sa ti nou letan. Lepok *COVID*. Aköz i ti form parti en Lagreman, en komitman ki nou'n bezwen onore e ki sa lakonpannyen ti pe reklanm sa sonm aköz i ti'n fini konmans prodwi sa *Nyala* sa letan.

Koman en Gouvernman responsab nou, nou ti deside anvoy en tim Seselwa pou al enspekte sa transpor ki ti'n fini peye, avan i ganny anvoy Sesel. E sa ti ganny fer an 2023 Sid Afrik dan prezans furniser *Tibs Transport (Pty) Ltd*.

E sa ki mon kapab dir se ki nou, nou ti vwar ki sa transpor i ti dan en leta ki ti fonksyonnen e i ti kapab ganny anvoye Mahe sa letan. Sa *livraison* ti ariv an Mars 2024.

E ler mon ti reponn kestyon lannen pase, mon ti enform zot ki nou, nou pou pran kontak ek sa lakonpannyen Sid Afrik pou fer retournen sa transpor, parske nou pa ti satisfè avek kondisyon sa transpor ki ti ariv Sesel.

E nou lekip ki ti al Sid Afrik in konfirman ki sa i pa ti sa transpor ki zot, zot ti enspekte. Mr Speaker depi sa letan, nou'n fer kontak ek sa lakonpannyen Sid Afrik. E vwala en kontrandi lo nou lesanz.

Lakonpannyen Sid Afriken i reklanmen ki ler zot ti met sa *Nyala* pou ganny transporte pou vin Sesel an Mars 2023, i ti an bon kondisyon. E nou - nou, nou konn sa ki nou ti vwar ti arive Mahe.

Sa menm lakonpannyen pa oule pran responsabilite pour okenn domaz, an dizan ki sa ti annan pou fer dan transportasyon pou vin Sesel. Sa se ki zot, zot reklaanmen. Me nou pa aksepte sa pozisyon.

Nou pa krwar ki sa transpor i menm transpor ki en lekipe Sesel ti enspekte an 2023 dan en vizit Sid Afrik. Nou, nou konklizyon se in pas en frode e Sesel in ganny vole.

A sa pwen Mr Speaker, nou annan 2 swa. Premyerman, pourswiv sa lakonpannyen Sid Afrik pou delivre en transpor ki pa dan en leta akseptab, konpare avek sa ki nou ti gannyen dir e ki nou ti enspekte.

Sa pou vin ek en kou ki nou pa konnen konbyen. E nou pa konnen konbyen letan sa i pou pran devan en Lakour Sid Afrik. Me konsey legal ki nou annan se ki i pou en risk pour Gouvènmman Sesel akòz nou ka devan en Lakour pou difisil.

Nou dezyenm opsyon malerezman, se pou fer en prosedir pou *write off* sa lekipeyman. Parske i pa vo naryen dan sa leta, eksepte pour valè sa bann feray.

Nou mentenir nou pozisyon ki Komite Defans ek Biro Oditer Zeneral i fer en lanket detaye dan sa zafer. E mon konnen Komite Defans ti

vizite sa *Nyala* dan por le 1er Zilyet, 2024 lannen pase.

An se moman *Nyala* i ankor dan por mannyer mon vwar li. Malerezman ankor, sa i en lot tranzaksyon kot larzan piblik in senpleman ganny mal servi. Akòz move desizyon e langazman par ansyen Gouvènmman, kot zot in fer en dil ek en fournisir ki'n al mal. E son retonbe i vin lo Bidze sa pei. *En d'autres mots*, Lepep Seselwa.

Sa ki mwan mon kapab asir sa Lasanble, se ki sa Gouvènmman LDS pa pou zanmen antre dan sa bann kalite tranzaksyon. E kot nou, nou kapab ganny meyer pour sa pei avek mwens larzan, nou pou toultan swazir sa semen. Mersi bokou Mr Speaker.

MR SPEAKER

Mersi, Vis-Prezidan. Nou a pran kestyon siplemanten bann Manm. Premye i Onorab John Hoareau.

HON JOHN HOAREAU

Mersi, Mr Speaker. Bonzour VP. Bonzour Mr Speaker. Bonzour tou dimoun a lekout.

Dapre ou larepons VP, i paret ki sa bann Sid Afriken ki ti pe travay ek lapolis i enplike direktèman dan sa *procurement*. Eski sa *procurement* ki menm Minis Finans in ganny demande pou

donn en dispozisyon pou pa donn en permisyon *tender*?

So, eski ou kapab konfirman avek nou si sa i en prosedir normal premyerman?

E lekel ankor sa Gouvernman ki ti la ki'n anmenn sa bann Sid Afriken Sesel? Mersi.

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mr Speaker, wi, ou kapab anba Lalwa ozordi demann avek *procurement* pou ganny egzonere sa bezwen pou al lo en *tender*. Be selman i bezwen annan en rezon valab.

Par egzanp, i annan en rezon dirzans. I annan en rezon ki sel fournirier ki dan lemonn i fer sa kalite keksoz. I annan plizyer rezon ki ou kapab swazir. Me lo *file*, nou pa'n vwar okenn rasyonnal. Zis zot in demann pou fer en *exemption* ek *normal procurement* ki zot ti gannnen.

E lekel ki ti o pouvwar sa letan? Ti an 2019, alor mon krwar i evidan ti dan lepok Gouvernman US. Mersi bokou.

MR SPEAKER

Mersi, Vis-Prezidan. Onorab Labrosse?

HON RICHARD LABROSSE

Mersi, Mr Speaker. Mon a dir bonzour Vis-Prezidan ek ou lekip. E tou bann koleg. E tou dimoun ki a lekout.

Mr Speaker, ler mon'n ekout *VP* pe donn son larepons lo sa *case* ki devan nou la, i en *case* ki vreman sagrinan. Sirtou ler nou pe koz Sesel ozordi kot bokou dimoun pe rod sa ki meyer e sirtou en pti larzan an plis dan zot pers.

Mr Speaker, mon kestyon vi ki mon war *PS Foreign Affairs* isi dan Lasanble, mon ti a kontan konnen Mr Speaker, parey *VP* in koze, in donn nou bann *challenges* ki zot pe ekspekte si zot pou met sa ka Ankour Sid Afrik.

Nou'n vwar ki bokou etranze Mr Speaker in vin travay Sesel. Nou'n vwar kot *FIU*. Nou'n vwar la, nou pe vwar dan lapolis. E mon pa pe dir ki kekfw sa i annan ka koripsyon aköz zot pa ankor ganny en rapor pour sa.

Eski Biro *Foreign Affairs* ozordi ler nou pe koze Mr Speaker, ler i annan bann ka parey, ki bann lasistans ki nou gannnen deor ki – lasistans enternasyonal, ki nou a kapab kekfw nou osi konman en pti pei ki napa bokou resours, bokou mwayen finansyel, ki nou a kapab ganny en rekour baze lo lazistis? Mersi, Mr Speaker.

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mersi, Onorab. Onorab, Minister Zafer Etranzer i en fasiliter li. E li i ed nou atraver bann striktir diplomasi e *Foreign Affairs* pour nou kapab etabli bann kontak ek bann diferan lazans Sid Afrik, tel ki sa lakonpannyen.

E alor li i fasilite sa bann tranzaksyon. Minister Zafer Etranzer pa antre dan sa bann desizyon e i pa kapab ganny vwar konman responsab pour okenn keksoz ki arive. Li zis i fasilite, i ouver laport pou pas ant en biro ek en lot.

Si demen nou pran en desizyon ki nou anvi dizon fer en ka legal avek sa, atraver zot ankor, zot kapab fasilite pour ki nou met bann papye devan en avoka. Fer bann fason pour nou al Ankour. Zot, zot a fasilite sa prose.

Selman, mon pa krwar zot pou annan en rol pli gran ki sa apard fasilite e ouver laport diplomasi pour nou kapab ariv dan sa bann diferan landrwa.

So, se sa ki zot in fer ziskan konmela. Zot in menm ed nou fer kontak ek sa lakonpannyen Sid Afrik. E mon'n donn en kontrandi lo ki sa lakonpannyen pe dir ki

nou, nou pozisyon. E se la kot nou ete avek Minister Zafer Etranzer.

Selman zot in ganny bon kolaborasyon lo zot kote. Zot in fer zot mye pou met nou an kontak avek zot. Me se sa pozisyon kot nou ete ozordi. Mersi bokou Mr Speaker.

MR SPEAKER

Mersi, VP. Onorab Gabriel?

HON CONRAD GABRIEL

Mersi, Mr Speaker. Mon a dir bonzour tou dimoun a lekout. Mr Speaker atraver ou, sa i montre nou ki nou annan en Gouvernman ki pa efikas. Ki tat, tat-

(laughter)

MR SPEAKER

Kot – Onorab? Onorab, annou evite sa bann entervansyon koumsa e annou reste lo kestyon silvouple. Si ou annan en kestyon, demande. Si non, mon ava *pass* ou.

HON CONRAD GABRIEL

Mersi, Mr Speaker. Solman i enportan nou met keksoz a la perspektiv. Koman en Komite FPAC, nou'n vwar ki a plizyer lokazyon sa Gouvernman in fer bann *procurement*, pey bann dimoun aletranze. Nou'n fekwar la resaman-

MR SPEAKER

Onorab, ou pe fer en bann alegasyon ki pa zistifye. E mon napa okenn – mon napa okenn lentere dan konsider ou bann alegasyon. Mon pe donn ou dernyen posibilite pou poz ou kestyon. Sansan mon *move on*.

HON CONRAD GABRIEL

Mr Speaker, ou pa pe donn mwan mon sans pour mwan etabli mon lekor. Mon demann-

(Interruption)

MR SPEAKER

Onorab Andre, ou kestyon?

HON CLIFFORD ANDRE

Mersi, Mr Speaker. Bonzour VP avek ou delegasyon. VP, mon annan mwan 2 pwen. 2 kestyon. Eski - Annefe mon ti a kontan dir ki poudir Komite Defans i pe fer sa lenvestigasyon e nou avanse dan nou lenvestigasyon. Me selman mon ti a kontan poz 2 keksoz ki ava ganny repons pour piblik deor.

Eski letan sa Lagreman ti ganny fer oubyen letan sa desizyon pou aste sa *Nyala* ti ganny fer, eski ti annan en Lagreman?

E eski dan sa Lagreman ti annan en *dispute position*, kot pou ale si i annan en *dispute*?

E ki Lalwa ki pou pran presedans - si Lalwa Sesel

oubyen Lalwa Sid Afrik dan sa Lagreman?

Dezyenmman, eski par lefe ki gouvènmman e osi sa i enn bann konklizyon ki Komite Defans in vin lo la. Nou'n vwar ki poudir sa *Nyala* ki sa group dimoun ti al vizite Sid Afrik i aktyelman pa sa *Nyala* ki'n ariv Sesel.

Eski zis lo sa baz li menm, Gouvènmman pe pran en pozisyon pou refer avek sa ki ti *initially* fer en Lagreman pou *procure* sa *Nyala*? Mersi.

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mr Speaker, se – mwan mon kapab dir Onorab, sa ki mon konnen e sa ki nou'n vwar dan *file*. E mon a reponn tou lede sa kestyon.

Eski zot annan en Lagreman ki'n sinyen ki met bann kondisyon ki enkli bann *dispute clause*? Mon pann vwar mon dan *file* ki mon'n vwar ek lapolis. Mon pa'n vwar.

Me selman sa ki nou panse i lozik se ki dek ki ou'n ekrir en let ou'n dir li wi nou dakor pou – an 2019 sa. Nou dakor pou fer premye peyman. Zot ti fer premye peyman sa letan. I vin en kontra. En lobligasyon lo Gouvènmman.

E zot ti dir pou dir zot pou fer ler i prodwir lot- dan korespondans sa. Ler i ariv lo en staz devlopman prodiksyon, *reconditioning*, zot ti pou fer en lot peyman. I en kontra efektivman. Sa se nou lenterpretasyon ozordi. Me eski sa *Nyala* ki ti arive i menm *Nyala* ki tim ti enspekte an 2023? Tim i dir definitivman i pa menm *Nyala*. I pa li.

Me se pour sa rezon ki nou, nou santi endepandaman avek nou ki nou, nou krwar, ki nou nou'n vwar, baze lo *file*, endepandaman nou krwar Oditer Zeneral, Komite Defans i devret fer en rapor. E swivan sa rapor, zot kriy tou bann dimoun ki ti enplike. Demann zot keston. Parske nou napa naryen pou kasyet dan sa zafer nou.

Nou sa zafer 2019, zot ki ti plas komann. Zot ki ti fer laranzman. Nou nou'n vwar en transpor ki'n ariv Sesel ki pa sa enn ki nou ti vwar ler nou ti al enspekte li Sid Afrik. I pa li. Laranzman pa nou ki'n fer.

Alor nou pou ouver tou liv parey nou'n toultan fer, an tou leka. Nou ouver tou liv. Les Komite Defans, Oditer Zeneral enspekte. Demann tou keston ki annan. Parske mon mazine Komite Defans zot pa pas lo televizyon *live*. Selman fer zot rapor. Prezant zot rapor

dan Lasanble Nasyonal, pep Seselwa a konnen.

Se sa nou pozisyon. Mwan mon'n dir mon pozisyon. Me selman i enportan pour zot fer sa endepandaman. Selman, sa ki nou kapab konklir, i pa sa *Nyala* ki ti ganny enspekte par nou lekip. E larzan in definitivman perdi dan sa zafer. Mersi bokou Onorab.

MR SPEAKER

Mersi, Vis-Prezidan. Onorab Gill?

HON CHURCHILL GILL

Mersi, Mr Speaker. Dapre leksplikasyon ki VP in donnen, in dir ki dezyenm peyman ti ganny fer an 2021. E 2021 nou tou nou konnen lekel ladministrasyon ki ti la. E VP in konfirman 2023 dernyen vizit ankor zot in war sa transpor.

Eski sa letan dapre son leksplikasyon, transpor ti bon? *Then* ladministrasyon ozordi ki bezwen adres sa problemin. Akoz dan plizyer repriz nou'n ganny dir dan sa Lasanble ki ler en ladministrasyon i *take over from another one*, sa enn ki'n pran administrasyon li ki fer sa ki annan pou fer.

Me dan sa enn ka petet VP a eksplik nou akoz ki LDS pa fer sa ki i devret fer e fer fason ki sa larzan pa ganny

perdi. E sa *case* i ganny *investigate*. Mersi.

MR SPEAKER

Mersi. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mon ti a kontan zis koriz Onorab. Mon pa'n dir dezyenm peyman ti fer 2021. Mon ti dir dezyenm peyman ti ganny fer dan nou letan, wi. Me 2022. Pa 2021. Ou kapab – tou dimoun ki'n ekout mwan ler mon'n entervenir i a konnen mon ti dir 2022.

E ki rezon nou, nou – akòz nou pe pran sa tel pozisyon e nou pe dir larzan in perdi? Parske, mon'n met sa de opsyon ki nou vwar devan nou. Nou'n sey etidye sa sityasyon. E nou opsyon se nou fer en ka legal pour nou rekipè nou larzan. Parey ou pe dir. E nou krwar i ti ava en opsyon favorab.

Me selman, ler ou regard kondisyon e konsey legal ki nou gannye pou al devan en Lakour Sid Afrik, i riske en ka difisil, koute, depans ankò plis larzan. E ou riske pa abouti selon konsey legal, akòz mannyer levidans i ete. Me selman mon ti a kontan kit sa pour Komite Defans osi fer son prop kalkilasyon lo bann opsyon ki la.

Mwan mon'n met sa ki nou, nou pe krwar. Me selman endepandaman nou ti a kontan ki zot osi Konsey Ladefans Lasanble i regard sa. E zot osi pas en lopinyon. Parske nou ti a kontan pran en desizyon ki dan lentere Sesel. Se sa ki nou la pour nou fer.

Me selman pour lemoman sa ki nou'n vwar, desizyon ki ti ganny pran 2019, i pa ti en bon desizyon. Nou'n onor nou lobligasyon ki nou ti annan an 2022. Parske nou ti sipoze peye. Zot in fer en bout travay. Ou sipoze fini sa bout travay.

Nou'n al enspekte. Nou'n fer nou bout nou. Nou'n pran nou responsabilite. E sa ki nou'n vwar ti en keksoz ki ti pou fonksyonnen. Ti kapab ganny anvoy Mahe. Me sa ki nou'n vwar ler nou ariv Mahe, pa sa. E se sa leka kot nou ete a ozordi. Mersi.

MR SPEAKER

Mersi, Vis-Prezidan. Onorab Georges?

HON BERNARD GEORGES

Mersi, Mr Speaker. Mr Speaker, mon kestyon pour Vis-Prezidan. Vis-Prezidan in kategoriz sa kontra pou aste sa veikil konman en move desizyon pran par Gouvernman presedan.

Vis-Prezidan, eski ou dakor avek mwan ki sa set en

lot legzanp pandan en seri legzanp kot move desizyon ekonomik in ganny pran san bon kontrol lo depans, tel parey *Spirit of Koxe* ki ti en bato ton ki pa'n lapes en sel ton?

(Interruptions)

HON BERNARD GEORGES

Laferm kanmaron Coëtivy ki'n ganny kit...

(Interruptions)

MR SPEAKER

Order! Order!

HON BERNARD GEORGES

...ki'n ganny kite avek det e abandonnen. Vilaz NYS Cap Ternay, Port Launay, Ste Anne 1 ek Ste Anne 2 ki'n zis ganny abandonnen e ki lalyann anvaisan in vin pran...

MR SPEAKER

Onorab, *ok...*

HON BERNARD GEORGES

E ki'n fer ki Prezidan in dekrir-

MR SPEAKER

...i annan en kantite legzanp.

HON BERNARD GEORGES

E ki'n fer ki Prezidan in dekrir lekonomi an 2020 konman en kales kase!

(Interruptions)

MR SPEAKER

Onorab!

(Interruptions)

MR SPEAKER

Order! Onorab, mon satisfé avek ou legzanp. Enn de i ase.

(Interruptions)

MR SPEAKER

Mon pa anvi ki ou al plis ladan. Ou'n fini ek ou keston?

HON BERNARD GEORGES

E ki'n anmenn Prezidan Larepiblik dekrir lekonomi Sesel an 2020 konman en kales kase. E ki i ti a'n kapab dir i en *Nyala* kase! Mersi.

(Interruptions)

MR SPEAKER

Bon. Vis-Prezidan, ou repons?

VICE-PRESIDENT AHMED

AFIF

Mersi bokou, Onorab. Onorab, mon antyerman dakor avek ou poudir sa ki nou – se sa ki nou'n fer pandan sa dernyen 4 an. Zis nou'n anmas tou kalite keksoz ki nou nou'n bezwen vin netwaye. Enkli sa *Nyala*.

En desizyon ki'n pran an 2019. Nou ganny en keksoz ki pa li ditou. Nou'n ganny

anbete. E finalman- nou'n war plizyer legzanp. Libreri Nasyonal ki ti sipoze ganny aranze tou sa lannen. I pa'n ganny fer. *Carnegie* ki ti'n ganny abandonnen tou sa letan. Se nou ki'n fer.

En Por La Digue in ganny promet sepa konbyen letan. Se nou dan sa pti gin letan ki'n fer. En Lopital La Digue ki'n ganny promet pandan pli ki 25 an. Se nou ki'n vin fer. E nou'n fer li dan pros 18 mwan.

NIHSS ki ti'n ganny abandonnen pou *train* nou bann zannan pou vin bann ners, ganny abandonnen. Se dan nou letan ki'n ganny fer vitman.

Bann *loan* ki nou pe sey netwaye. Larisi ki'n pran depi 79 pann zanmen fer. Lenfrastriktir *sports* ki ti dan en leta deplorab ki ozordi nou pe met annord. Ozordi dan 2 mwan nou'n fer en *stadium* ki pep Seselwa i fyer. *FIFA* i fyer Sesel. *FIFA* i koz Sesel ziska ozordi.

(APPLAUSE)

VICE-PRESIDENT AHMED AFIF

Onorab, nou pas nou letan zis netway sa bann keksoz. E la mon pa konnen ki zot pe rode ek sa *Nyala*. Be si sa feray in vye zot pa konnen ki zot – be nou a donn zot, zot ava anbelir Zonm Lib avek.

(laughter)

MR SPEAKER

Bon. Byen. Mersi Vis-Prezidan. Onorab Tamboo, ou kestyon.

HON LOUISETTE TAMBOO

Mersi, Mr Speaker. Bonzour Mr Speaker. Bonzour *panel*. Bonzour tou dimoun a lekout. Espesyalman zabitan Cascade. Minis, mon'n ekout ou larepons tre atantivman. E mwan mon kestyon i koumsa;

Gouvernman avan ti fer prosedir pour sa *Nyala*. Ou Gouvernman in vini in erit sa tranzaksyon. Ou'n eksprimen ki ou ti'n vwar ki sa bann fournisir pa ti tro, tro – ti annan en problem. Konmsi pa ti tro, tro korek.

Akoz ki ou Gouvernman ti kontinyen ek sa tranzaksyon? I ti annan fason pou arete. Me aköz ou Gouvernman ti kontinyen? Aköz ou Gouvernman ti anvoy dimoun an 2023 pou al vizite e apre ozordi zot le tire lo zot konmkwa ki zot, zot pa responsab?

Be zot in erite. Zot in aksepte. Zot in kontinyen travay lo la. Savedir i zot responsabilite. E i nou larzan Lepep Seselwa ki nou bezwen rode aköz ki sa *Nyala* i ankor la e aköz zot pa ankor fer

okenn demars pou rektifye sa problemn?

I zot devwar Ladministrasyon LDS pou rezourd sa sityasyon! Mersi, Mr Speaker.

(APPLAUSE)

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mr Speaker, mon krwar i menm taktik ki zot pe servi ek nou. Manz zot bannann, pran lapo anvoy lo nou.

(APPLAUSE)

VICE-PRESIDENT AHMED AFIF

Ou kapab anvoy zot ta lapo bannann lo nou. Pa fer nou naryen. Kontinyen anvoy lapo bannann. Lefe i reste. Lefe i reste, zot ki ti fer sa kontra an 2019. Zot ki ti fer desizyon pou aste en transpor 26 an. 26 an.

Recondition. Konmsi napa ankor lezot transpor dan lemonn ki dan bon kondisyon akseptab ki ariv Sesel, ki pou ariv Sesel dan en bon leta.

Nou, nou ti fer sa dezyenm peyman. E aköz nou en Gouvernman responsab, nou ti al enspekte sa transpor avan i vini. Nou ti satisfè poudir i pou fonksyonnen. Pa

neseserman pli bon transpor ki nou ti kapab gannnen. Selman i pou fonksyonnen sa ki nou ti war.

Me, si ou ganny vole e ler i arive i pa li, ki swa ki nou annan? Eski nou bezwen blanm nou lekor? Aköz zot ki ti pran desizyon pou al rod en transpor 26 an, nou, nou bezwen pran responsabilite ozordi? Nou, nou bezwen onor sa lobligasyon?

Se zot ki'n fer sa dil. Nou'n onor sa lobligasyon. Nou'n ganny vole. Zot in dil ek en bann dimoun ki finalman in *end up* dan en keksoz kot Sesel i ganny vole. E la ozordi nou bezwen rod en semen pour nou sov larzan pep Seselwa.

E se sa rezon ki nou pe demann endependaman Komite Defans Lasanble Nasyonal ek Sekirite pour zot fer zot prop lanket ladan. Tou sa kestyon ki ou pe demande Onorab, demann sa atraver zot komite. Fer zot rapor. Rapor i a ganny vwar. I a ganny met lo latap pour pep Seselwa vwar e pour pep Seselwa. Konnen.

Nou, nou napa naryen pou kasyet. Nou krwar nou pe fer sa ki byen. Nou pe pran nou responsabilite. Nou pou defann larzan pep Seselwa e nou pou fer bann desizyon ki bon pour sa pei. Pa parey bann desizyon pou fer vin

bann keksoz ki apre i vin zis en gaspiyaz dan larzan piblik. Mersi bokou Mr Speaker.

MR SPEAKER

Mersi, Vis-Prezidan. Manm i konnen i fer dezyenm fwa ki nou pe pas lo sa kestyon. E mon santi nou pa pe al pli lwen avek sa. Nou pe tourn an ron.

So, si Manm i annan kestyon silvouple, sey gete ki mannyer zot pou demande pour nou fer avanse zot konesans lo sa size. Mersi. Prosen – Onorab Roucou?

HON MICHEL ROUCOU

Mersi, Mr Speaker. Bonzour VP, PS e Compol. VP, si ou kapab dir avek Lasanble; eski ler zot ti ganny bann dokiman *regarding* sa *Nyala*, si i annan okenn lendikasyon pou dir akòz ansyen Gouvènmman ti bezwen enn sa dan laflit lapolis?

Apre VP, mon annan en solisyon petet mon kapab propoze *regarding Nyala*. Anvi ki nou tann zot pe dir; “ale Patrick.” Akòz nou pa donn zot sa *Nyala* zot ava al ladan? Mersi.

(laughter)

(APPLAUSE)

MR SPEAKER

Vis-Prezidan?

VICE-PRESIDENT AHMED AFIF

Mersi bokou. Mersi bokou Mr Speaker. Mr Speaker, lo *file* pou reponn Onorab. Lo *file* mon pa’n vwar okenn rasyonnal ki mete akòz nou bezwen.

Sel keksoz ki nou ti vwar se zot ti demann avek *procurement* pou donn zot egzonerasyon ki zot pey zis sa lakonpannyen pour li *recondition* sa. Se sa ki nou nou’n vwar lo *file*.

Ou propozisyon mon mazin en lot propozisyon. Mwan mon’n sizer Zonm Lib. Be si zot dir zot bezwen keksoz pour Patrick ale ladan. Pran sa donn Patrick. Mersi bokou.

(laughter)

MR SPEAKER

Onorab Aglae, ou kestyon?

HON EGBERT AGLAE

Mersi, Mr Speaker. Mon a dir bonzour VP, Compol e manm *panel*.

VP, ou’n site poudir lo *file* ou’n war zis en dokiman ki’n demann *procurement* pour *exempt* ki Lalwa i permet anba *Procurement Act*. I annan Seksyon 61 (2) “*Limited bidding*”, ki dir ou ki “*the goods, works or services are only available from a limited number of suppliers.*”

Dan sa *case*, napa byen, byen lakonpannyen ki fer *Nyala*. So - ni Sid Afrik. So, i en *limited*. So, napa naryen ilegal ki'n ganny arive si in fer en *direct bidding*. Ok?

Mon kestyon prezan, letan zot in war, zot ti al fer lenspeksyon, eski ti annan en dosye premyerman? Akoz letan ou pe enport en veikil dan sa kalib, tou veikil i annan en *VIN Number* - sa ki nou apel en *Vehicle Identification Number*.

Eski i annan en dosye ki annan tou sa detay ki pou enkli portre? I sipoze enkli portre tou. Akoz letan ou pe fer en *procurement* dan sa zanr, ou bezwen annan en *folder* ki annan tou sa bann detay sa portre davans avan ou fer ou bann peyman final.

Eski tou sa bann detay letan zot ti verifye, ti *match* avek sa ki ti egziste? Ouswa eski zot ti fer prosedir pou ganny tou sa bann detay ki ti egziste avek sa veikil, ki ler i ti ava arive zot ti ava konnen poudir *be this is it*, sa ki nou ti pe demande? Ok ?

Dezyenm. Letan ki zot ti pe fer lenspeksyon li menm, eski rapor letan sa bann zofisye ti retourn Sesel, ti konfirman poudir sa veikil ki nou pe demande i li menm sa ki nou, nou ti pe rode?

E si non, aköz ki – parey zot in fer depi ler zot in vin o

pouvwar 2020, zot in kennsel plizyer kontra dan sa pei zot ki ti pe ganny fer. Aköz zot pa ti kapab kennsel sa enn si zot ti konnen pa ti bon? Mersi.

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mr Speaker, premyerman; lo son pwen ki sel lakonpannyen ki fer *Nyala*, ki fer sa kalite transpor se sa lakonpannyen, e alor ti zistifye pou al en *direct bidding*. Mon larepons se sa.

Gouvernman sa letan, mon mazine i ti pe rod en laranzman sekirite li. Alor, eski Sid Afrik i sel pei ki ou bezwen ale pour en laranzman sekirite? Sel pei ki fer ban *armoured vehicles*?

Zot ti annan posibilite pour zot regard Sid Afrik, pour regard Langleter, pour regard *Dubai*.

HON EGBERT AGLAE

(Off-Mic)

MR SPEAKER

Onorab-Onorab, silvouple. Onorab! Vis-Prezidan pe reponn ou kestyon ki ou'n demande!

(Interruptions)

MR SPEAKER

Vis-Prezidan, kontinyen silvouple.

VICE-PRESIDENT AHMED AFIF

Si ou anvi tann mon larepons, ekoute. Be, zot ti annan plizyer posibilite pour zot regarde. Zot in swazir en lakonpannyen ki pa li ki fer *Nyala*. Se li ki *recondition* bann transpor tel ki *Nyala*. Zot in swazir li e zot dir se zis li ki fer sa. I pa prodwir *Nyala* li. I *recondition* *Nyala*. Alor, sa sete zot desizyon. Zot ti dir les li, i *ok*. Fer *direct bidding*.

Dezyenmman, eski ki lekিপ ti al fer laba, si zot in pran tou sa bann detay *chassis number, engine number*, eksetera? Sa mon ti a kontan ki sa Komite Defans ek Lasanble i demann tou sa bann keştyon.

Zot demande; be ki zot in al fer laba egzakteман? Ki zot ti fer depi ler zot ti arive? Kote zot ti reste? Lekel ki zot ti vwar? Kote sa veikil ti ete? Mon krwar se sa bann keştyon ki valab ki zot devret demande dan Komite.

E sa ki mwan mon konpran, parmi zot bann bi ler ti al en vizit laba, se pou etabli si sa ki zot pe al anvoye kot nou set en keksoz ki pou fonksyonnen Sesel.

Zot ti anvi dray sa transpor. Konnen ki mannyer pou dray sa transpor. E

konnen ki bann *maintenance* de baz ki bezwen ganny fer regilyerman. Alor, si i mont dimoun ki annan pou fer ek *maintenance, driving* dan lapolis.

Se zot ki ti monte, pour zot al fer sir poudir enn fwa i arive, zot konnen ki mannyer pou dil ek li. Si i donn problem, kwa ki sa bann keksoz ki zot devret okouran pour zot fer. Sete en pti pe *training* tou ki ti form parti la. Be tousala zot a ganny larepons ler zot a fer zot – zot a fer zot lanket ladan.

E wi, zot ti dir ler zot ti al laba, poudir sa ki zot, zot ti dray zot ti teste. Zot ti vwar sete en transpor ki ti fonksyonnen. Ti kapab ganny anvoye Mahe. Zot pa ti la pour zot al keştyonnen sa desizyon si i ti neser aste keksoz 26 an sa letan. Pa ti sa zot bi zot.

Zot bi sa dil in fini ganny fer. Al gete si i fonksyonnen, si i marse. Si nou pa pou ganny gro latet ler pou ariv isi Mahe. E zot ti dir i fonksyonnen, i marse. Be sa ki'n arive zot dir be pa sa ki nou ti teste. Pa sa ki nou'n dray laba. Nou pa konnen lekel ki zot in anvoye la. Mersi bokou Mr Speaker.

MR SPEAKER

Mersi, Onorab. Onorab Romain, ou keştyon.

HON GEORGES ROMAIN

Mersi, Mr Speaker. Mr Speaker, nou tou nou konnen resaman i annan en bon pe transpor lapolis ki pe roule lo semen. E nou'n ganny dir ki sa bann transpor i bann transpor dezyenmmen. Sa *Nyala* osi i sipoze en transpor dezyenmmen.

Alors, mon kestyon mon ti a kontan demann Vis-Prezidan; kwa ki'n fer sa diferans ant sa 2 tranzaksyon ki nou bann transpor lapolis ki'n anba nou administrasyon pe roule byen lo semen, tandis ki sa lot i ankor dan por pe pouri? Mon ti a kontan ganny sa larepons. Mersi, Mr Speaker.

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mr Speaker, sa i vin aköz se en Gouvernman *LDS* ki'n fer sa desizyon pou *order* transpor ki bon, ki adapte pour nou Sesel. E se sa ki nou ti al rode.

Nou'n anmenn lanbilans ki marse. Ziska ozordi tou sa lanbilans pe marse. I annan enn ki Praslin tou. Ozordi ou pa tann problem lanbilans ozordi. Ou pa tande sa kantite.

(Interruptions)

VICE-PRESIDENT AHMED AFIF

Si ou konpare avek sa ki ti annan sa letan. Ozordi lapolis in ganny zot nouvo transpor. Bann transpor ki bokou pli bon. Nou, nou fer sa ki nou kapab.

Sa ki nou'n rode, mwan mon krwar i annan valer pour larzan. Me sa ki'n rode dan zot letan, napa valer pour larzan. Mersi bokou Mr Speaker.

MR SPEAKER

Mersi Vis-Prezidan. Onorab Uranie, ou kestyon?

HON ROCKY URANIE

Mersi, Mr Speaker. Bonzour tou koleg Onorab. Bonzour delegasyon ki prezan.

I kler ki *VP* pa le ki son Gouvernman i aksepte responsabilite pour en desizyon ki ti'n ganny pran an 2019 pou anmenn en *Nyala*.

E, anfen an 2022 zot ti peye. 2023 zot ti al vizite. E se zot sa bout ki ti bezwen pran responsabilite pour sa bout. E ler zot ti al vizite, tou keksoz ti *ok*. Sa transpor i kapab ganny servi isi Sesel.

Anvi ki zot ti konn dat ki sa transpor pou ganny *shipped* Sesel. Aköz si zot responsab, pa ti anvoy en dimoun laba *at least* pou asire ki sa tranzaksyon, menm sa transpor ki zot ti al gete, i li

menm transpor ki pe ganny *shipped* Sesel?

Akoz zot pa ti pran sa desizyon, anvi ki zot ti anvoy en delegasyon? Mon pa konnen konbyen dimoun zot ti anvoye. Akoz zot pa ti pran sa dezinyon pou fer sa? Mersi.

MR SPEAKER

Mersi, Onorab. Vis-Prezidan?

VICE-PRESIDENT AHMED AFIF

Mersi bokou, Mr Speaker. Mr Speaker nou, nou enport en kantite keksoz Sesel. avyon, bato, lekipman, masin. En ta keksoz.

Pa tou sa bann *shipment* - E *in fact*, laplipar ki ou *order* ou al enspekte ler ou aste. Ou fer sir ou ganny fournisier en keksoz ki bon. Apre zot fer laranzman *freight*. Ou pou al asiz dan por pou al-

Be ler ou aste ou en loto ou, si ou en *port* prive, ou ale ou al aste, ou peye. I annan menm ki zis fer en peyman *online*. Be ou al asiz dan por pou al gete si li menm ki zot mete?

Oubyen ou fer en konfyans avek sa dimoun ki pe *freight* pour ou avek ki pe fer *shipment*, poudir i pou anvoy sa keksoz e dokiman i *match* sa bann keksoz?

Se sa ki ou fer. Ou pa – be sansan tou dimoun ti pou asiz dan por pe gete si

sanmenm sa keksoz ki zot in aste. Mon pa krwar ou konpran ki mannyer komers i marse ozordi.

(laughter)

VICE-PRESIDENT AHMED AFIF

E se sa larealite ozordi. E nou nou'n fer sa ki nenport Gouvernman ti pou fer. Nou'n onor lobligasyon ki ou Gouvernman sa letan ti pran. Zot ki ti fer premye peyman. Zot ki ti fer kontak. Zot bann konseye isi ki ti dir dil ek sa lakonpannyen Sid Afrik. Sete zot. Zot ki ti komans sa tranzaksyon. Zot ti pey lanmwatye sa larzan.

E nou ler nou ti'n vini zot ti pe met presyon dir “onor ou obligasyon. Zot in pey premye bout. Nou pe konstrir. Nou pe fini la. In preski fini, pey lot bout.”

E nou, nou pa ti anvi met repitasyon Gouvernman Sesel an ze aköz en tranzaksyon pour sekirite. Pangar zot a dir nou pe sey met sekirite pei an danze. Nou ti peye nou.

Selman, an plis ki sa, aköz nou ti responsab. Nou ti al gete pou fer sir poudir sa ki pou vini, nou dimoun pou konn dray. Nou dimoun pou konn fer *maintenance* lo la. Zot pou familye avek sa lekipman. I fonksyonnen sa enn ki nou'n al gete.

E wi, i ti fonksyonnen. Zot pa'n al kestyonn sa desizyon zot. Zot ti al tyeke si i pou fonksyonnen. Wi i ti pou fonksyonnen.

Me sa ki ti ariv Sesel zot, zot dir pa sa ki zot ti gete. Zot ti dray. Se pa li. Alor nou'n fer nou bout nou. Me malerezman, nou'n dil ek dimoun ki malonnet. I annan dimoun ki malonnet dan sa *cycle*. E se sa kot nou ete ozordi. Mersi bokou Mr Speaker.

MR SPEAKER

Mersi. Mon a pran kestyon – mon a pran kestyon Onorab Loze. Onorab, ou kestyon.

HON JOHAN LOZE

Mersi, Mr Speaker. Mr Speaker, VP in enform nou konmkwa ki 2022 in pey 50poursan. 2023 zot in fer lenspeksyon. E 2023 nou'n resevwar en lapouritir ki nou'n ganny vole. VP in les nou konpran poudir nou'n ganny vole. I annan tranzaksyon malonnet.

VP in egalman dir nou ki lenspeksyon ti ganny fer pou verifie *maintenance*, si konpatibilite. Mr Speaker, *maintenance* i vin avek en *manual*. En *manual* i vin avek son nimerò sasi. Son *VIN number* parey Onorab Aglae in dir.

Alors, mon kestyon mwan; VP in les nou konpran poudir sa lakonpannyen laba pe *claim in ship the right* veikil. Sa ki nou nou'n gannyen isi i en lot. Sa i ganny fasilman etabli a travè son nimerò sasi. Son *VIN number*.

Letan nou'n al laba pou al verifie son *maintenance ability*, nou'n dan faktori, nou'n gannyen en *manual* ki'n donn tou son deskripsyon ki nou kapab servi pou etabli lidantite sa veikil, son *fingerprint*? Wi ou non?

E VP pe les nou konpran poudir in annan bann akter malonnet. Be bann akter malonnet i Sid Afrik ouswa i isi? Kot in arive sa kote malonnet?

Akoz Mr Speaker, nou pe balans responsabilite en vol ki'n pas 2023. Nou'n ganny vole 2023. Nou pe balans li *upstream* lo 2019. Nou'n ganny vole 2023, Mr Speaker. Nou'n ganny vole. VP ki'n dir nou nou'n ganny vole. Lekel ki responsab pour nou ganny vole?

MR SPEAKER

Bon. Ok. Ou kestyon Onorab. Vis-Prezidan, ou repons?

VICE-PRESIDENT AHMED AFIF

Mersi bokou, Mr Speaker. Mr Speaker, ki bann lekip Seselwa ti war ler zot ti monte.

Pin, chassi number, engine number. Se sa bann lenformasyon. Mwan mon pa'n vwar dan *file* ki annan ozordi tou sa bann detay.

Selman mon konnen lekip in monte. L ekip in enspekte. L ekip ti satisfè avèk zot travay ki zot in fer poudir ki zot konnen ki mannyer i fonksyonnen. Ki mannyer i dray li. Zot in ganny dir ki bann eleman *maintenance* ki zot bezwen okouran. Kwa ki bezwen ganny fer. E fer bann kontak nesèser pou ganny pyes...

Tousala zot in fer sa. Be se zisteman se sa rezon ki mon krwar Lasanble Komite Defans i devret fer. Zot demann tou sa bann kestyon teknik e fer sir poudir zot ganny tou bann larepons apopriye.

E Onorab, peyman ti ganny fer an 2022. Pa 2023. Lenspeksyon ti ganny fer an 2023. Transpor ti ariv isi an 2024. Se sa ki lenformasyon ki mon annan. Mersi bokou.

MR SPEAKER

Mersi. Bon, se tou kestyon bann Manm ki mon kapab pran. Mon a retourn lo loter kestyon, Onorab Pillay.

HON SEBASTIEN PILLAY

Mersi, Mr Speaker. Bon, mon pe get bann lenformasyon ki nou annan zis pour mwan fer

sir mon ganny bann keksoz byen.

So, *LDS* in dir “*no turning back*, kit li lanmenm”. I pe pouri kot son bann palet menm. So, *no turning back* depi ler in vin-

(Interruptions)

MR SPEAKER

Onorab. *Order!* I sanble mwan ou anvi fer en diskour politik dan plas en kestyon. Mon pou fer ou menm remark ki mon'n fer pour Onorab Gabriel. Si ou annan en kestyon, demann li. Si non, nou terminen. Onorab Pillay?

HON SEBASTIEN PILLAY

Mersi. Mersi bokou, Mr Speaker. E mon apresye – mon apresye loportinite pour nou annan en Lasanble ki *fair* e enparsyal.

Mr Speaker, mon annan la devan mwan 2 let ki mon le soumet ek Lasanble pour referans ek sa kestyon. Le 22 Zilyet 2024, mon ti ekrir an relasyon avèk kestyon ki zot in ganny demande dan Lasanble.

Mon ti ekrir Komisyoner Lapolis pou demann li detay lo lenvestigasyon ki nou pe fer e bann *statement* ki ti ganny pou fer retourn sa veikil Sid Afrik. En *commitment* ki ti ganny donner par Vis-Prezidan Afif dan sa Lasanble. Mon dir en *commitment* e en

lasirans ki ti ganny donnen par Vis-Prezidan Afif.

Le 7 Out mon ti ganny en larepons sorti kot ASP Joseph Bibi ki ti dir mwan lapolis in *conduct* en vizit kot sa veikil e zot in konmans en lenvestigasyon atraver Komite Defans. *Ok?*

Zot ti fer en vizit le 1er Zilyet. Zot in konmans lenvestigasyon Komite Defans. Depi Zilyet lannen pase. La nou'n ariv *May* 2025, i ankor lanmenm. *Ok.* I ankor lanmenm.

Prezan Mr Speaker, i pa fini la. Vis-Prezidan apre ki Lasanble dernyen fwa ti dir li poudir *scrap metal* Sid Afrik pa pou le pran. I ti dir nou menm zafer. Ki li Gouvernman Sesel zot kapab fer retournen sa veikil e zot kapab fer reganny nou larzan. Tousala pa'n arive.

So kestyon ki nou annan an relasyon ek tousala. Enn; eski lapolis Sesel napa kapasite pou demann *mutual legal assistance* pou fer en lenvestigasyon an relasyon ek en vol ki'n arive ek lapolis?

Akoz si en dimoun i kapab vol lapolis. Be i kapab vol tou dimoun Sesel anba Gouvernman LDS. Sa i mon premye kestyon.

Mr Speaker, mon dezyenm kestyon. Nou le koz lo kan sa veikil in vini. 2019 Gouvernman avan in apros *supplier*. Gouvernman LDS i

pran pouvwar, i kontinyen ek sa tranzaksyon. I pa arete li. I kontinyen li. I fer dezyenm peyman.

I fer vizit, i pey tiket pour zofisye ale. Tou sa bann zofisye par kont i ankor dan Gouvernman LDS la. Brigadye Rosette i ankor – ozordi i Mazor Zeneral. Bann zofisye lapolis i i ankor la. Zot tou zot ankor la zot. Nou pe koz aksyon malonnet la. *Ok.* I ale i vizite i war i bon.

Gouvernman LDS i pey *shipping*. I pey *shipping* li. I pey *transshipment* transpor. I pey tou keksoz li Gouvernman LDS. Selman pa li ki responsab. Veikil i vin lo bato. *Customs*, tousala i okouran li.

Veikil i mont lo bato sorti Sid Afrik pouri. Me selman i pa kapab retourn Sid Afrik pouri. I ariv Sesel Mr Speaker. Personn pa konnen ziska ler zot ale gete. E la, la ki zot in gannyen. “*No turning back*, kit li lanmenm.”

Prezan mon kestyon Mr Speaker, pour Vis-Prezidan. Eski ou pa krwar ki lefe ki ou vin koz mansonz devan Lasanble a plizyer repriz-

MR SPEAKER

Pa akseptab. Pa akseptab. Onorab, *retract* silvouple. *Retract* silvouple.

HON SEBASTIEN PILLAY

Mersi, Mr Speaker. Mon a *retract* mansonz.

MR SPEAKER

Mersi. Onorab, nou'n ase. Vis-Prezidan, si ou war en kestyon pou reponn, reponn e nou a terminen avek sa silvouple. Vis-Prezidan?

VICE-PRESIDENT AHMED AFIF

Mersi, bokou Mr Speaker. Mon pa war okenn kestyon dan sa ki in dir. In repet tou sa ki zot in dir. In fer letour son kestyon. I konnen poudir napa okenn naryen ekstra pour li demande.

Tou sa ki i pe demande i kapab demande dan Komite Defans e pas son komantr laba. E tou larepons ki i pe rode i a gannyen. Nou sa ki nou'n fer se nou'n onor en komitman ki zot, zot in konmanse. Nou nou'n fer sir repitasyon Sesel pa ganny gate.

Sesel in mal pase dan sa tranzaksyon e nou kit sa devan Oditer Zeneral ek en Komite Lasanble pou demann tou kestyon ki annan. E pour nou pran sa lot pa pour nou rektifye sa bann fot ki'n ganny fer depi dan lepok 2019. Mersi bokou Mr Speaker.

(APPLAUSE)

HON SEBASTIEN PILLAY

Savedir nou pou kit li lanm...?

MR SPEAKER

Vis-Prezidan e delegasyon, mersi pour zot partisipasyon. Mon swet zot bon depar. Bonn kontinyasyon. Mersi. Mersi Vis-Prezidan e delegasyon. An menm tan, madanm *Hansard* raporter ou ava apel lot Minis pour kestyon.

(Interruptions)

MR SPEAKER

Eh! *Order!* Bann Manm, Lasanble i an sesyon. Gard lord silvouple.

(Interruptions)

MR SPEAKER

Order, please! Bon, bonzour Minis Patricia Francourt, Minis pour Lanplwa e Zafer Sosyal.

Bonzour Mrs Linda William-Melanie, Sekreter Prensipal pour *Social Affairs*.

Ms Beryl Laboudallon, Direkter *Social Services*.

E osi Mrs Audrey Nanon, *Executive Director* dan Sekretarya sa Minister.

Nou la pou pran kestyon bann Manm lo size ki koncern responsabilite sa Minis. Nou konmans avek limero 67, Onorab Egbert Aglae.

HON EGBERT AGLAE

Mersi, Mr Speaker. Mon a dir bonzour Minis, PS William avek – mon pe mazin non laba. Avek lot - *panel*. Kestyon i lir konm swivan;

Eski Minis i kapab dir ek sa Lasanble si zot pe konsider revwar *scheme of service* tou bann etandonnen lanpler sa travayer sosyal travay difisil e volim ki zot pe fer fas avek? Mersi.

MR SPEAKER

Mersi, Onorab. Minis, ou repons.

MINISTER PATRICIA FRANCAULT

Mersi, Mr Speaker. Bonzour Mr Speaker. Bonzour *Leader* Biznes Gouvernman. Bonzour *Leader* Lopoziyon. Bonzour tou Manm Lasanble e tou dimoun ki a lekout. Mersi, Onorab pour ou kestyon.

Mr Speaker, parey mon'n deza dir plizyer fwa oparavan, mon oule enform Lasanble ki PSB pe deza fer en legzersis pou reviz *scheme of service* pour travayer sosyal. E ler sa legzersis i konplete, zot a soumet avek nou.

Mon rekonnet ki louvraz en travayer sosyal i enn ki nob, e zot fer sa avek bokou devosyon, lanmour e konpasyon. I en travay ki annan – ki annandler i komanse byen boner. Me pa tou letan ki i annan en ler fini.

Sa i akòz zot pe travay ek en group ki *at risk* e vilnerab dan nou sosyete. Travayer sosyal i pa fer zis en travay ordiner. Me ekstraordiner. E pour sa, mon oule montre mon lapresyasyon e dir zot en gran mersi. Mersi, Mr Speaker.

MR SPEAKER

Mersi, Minis. Onorab Aglae, ou siplemanter.

HON EGBERT AGLAE

Mersi, Minis pour larepons. Minis, etandonnen ki ou'n rekonnet difikilte ki bann travayer sosyal, sirtou nou bann *social worker*. E problem sosyal 15 an, 10 an pase pa parey ek problem sosyal ki nou annan dan sa konteks ozordi.

Eski – ou'n nonmen poudir PSAB pe fer serten travay lo sa *scheme of service*. Mon ti a kontan petet demann ou; eski an se moman la, an atandan ki zot pe esper sa *Review of scheme of service*, si i vini menm, zot pe mazin dan kad administratif pou revwar serten kondisyon?

Etandonnen ki ozordi baze lo bann ka sosyal ki egziste, plizyer travayer sosyal in war zot petet dan bann difikilte avek sa bann kliyan. Menm ganny agrese. Menm ganny zoure. Ki souvandfwa osi zot bezwen leve dan lannwit pou al antreprann

serten travay sosyal ki atase avek zot kliyan.

Eski zot pe mazin pou kapab ankouraz zot, retenir zot dan lanplwa dan sa travay pour zot pa degoute. Ki zot ganny serten *incentive* mon kapab dir, pour zot kapab kontinyen sa travay? Mersi.

MR SPEAKER

Mersi, Onorab. Minis?

MINISTER **PATRICIA**
FRANCOURT

Mersi, Mr Speaker. Onorab, mon reasir ou parey mon'n dir dan mon larepons, ki *PSB* pe fer en louvraz.

Me osi an kominikasyon, zot ti an kominikasyon avek Departman Sosyal pour zot regard *the scheme of service across the board*.

Mon rekonnet parey mon'n dir pou dir Departman Sosyal avek zot bann *social workers* zot fer en travay ki nob. Me solman, *when they are trained* pour zot pran sa karyer, *they know what to expect*. ‘

E mon kontinyelman dir pou dir sa louvraz ki zot fer, zot fer li dan fon zot leker. Akoz *although* i difisil, nou ti a vwar poudir i annan en *decline* lo *social workers* ki nou *recruit*. E osi nou ti a war ki *social workers* i kit sa profesyon. Menm i pa leka.

I annan ki fer *because of transfer of other jobs similar to what they have been trained in*. So, *whether* zot al dan *Welfare*. *Whether* zot al dan *Ledikasyon*, akoz *the training is very similar*. E zot annan sa *choice* pour zot fer sa.

So, i en louvraz ki mon konnen poudir Departman e bann *social workers over the years to come*, i pou toultan en louvraz ki pa reste fasil. *But then again, social works* i okouran letan mon fer mon *speech* avek zot. *It's the same for nurses. It's the same for teachers, and so on*.

Me solman mon le fer ou latansyon ki deza *social workers* in benefisye avek sa 2 *increments* ki Gouvernman ti donnen. E konman en *pubic servant*, zot osi zot in benefisye. So, *they got the 10 percent* ki ti'n donnen April 2023.

E zot in ganny zot 7poursan zot osi akoz zot en *public servant* ki ti donnen April 2025. Ki fer 17poursan *of an increment that they received*. E zot in bezwen war en diferans dan zot *package* e dan zot saler.

Yer swar mon pe fer en rough kalkilasyon. *Roughly* apepre en 3mil, si pa en pti pe plis ki zot in bezwen resevwar an plis dan zot *package*. Alor i montre poudir Gouvernman pa pe reste trankil lo bann

travayer dan *public servants* ki nou konnen pe travay vreman byen.

They are doing their utmost dan en fason ou en lot, kantmenm nou pa alye li direkteman avek *Scheme of Service*. Me solman zot *package in increase*. E parey nou konnen, *increase is a right across the board* pour tou bann *public servants*.

So mon konnen pou dir zot pou'n bezwen apresye sa. E *at the same time*, louvraz ki zot fer anndan *internally*, nou pe regarde ki mannyer nou, nou sanz nou bann *procedures* pou fer sir ki tou keksoz pa tonm lo zis en *social worker*.

Mon a donn ou en senp legzanp par egzanp. Nou ti annan *social workers* ki ti war zot after *working hours* ti pe man en telefonn letan nou ti annan nou *helpline*. Me nou'n tire sa lo zot. In vin en keksoz ki bann leres profesyonnel *has taken on*.

E ozordi, si mon pou dir ou letan mon ti asiz avek bann *social workers*, zot ti dir sa poudir i en keksoz ki vreman difisil pour zot. Ozordi *this is not something that they undertake*.

Alor i annan bann keksoz, bann mezir ki nou pe fer. Sirtou kot departman e Gouvernman pe fer pou rekonnet ki mannyer nou kapab fer louvraz en *social*

worker vin bokou pli *manageable*. Me osi *taking care of their self-care*. Mersi, Mr Speaker.

MR SPEAKER

Mersi, Minis. Onorab Pillay? Onorab Pillay, pas ou kestyon.

HON SEBASTIEN PILLAY

Mersi, Mr Speaker. Mr Speaker, mon swete ki Minis pa feel *defensive about* sa kestyon. Mon pou demann li dan en fason ki mon pe sey rod en leklersisman.

So, Minis ou'n dir nou koumsa poudir *PSB* pe fer serten travay lo *scheme of service* bann *social worker*. E nou konnen poudir dan sa *continuum* i annan sa *diploma and social work*. I osi annan sa bout lo *child protection* ki lapolis ki pe *run*. I napa en *course per se*. So en *social worker* i bezwen *sort of*, vin tou la. Fer tou keksoz.

E prezan lefe ki mon vwar – mon pa pe antisip travay Lasanble – mon war en Mosyon ki pe dir ki mannyer – mon war en Mosyon in ganny anvoye da bann Mosyon kot pe eksprim lakoler anver lakantite ka labi. E *social worker is part of the chain* pou dil avek sa bann sityasyon.

Eski Minis i kapab dir nou; anvi lenportans bann *social workers*, ki dernyen fwa ou'n fer en *meeting* zeneral

avek tou bann *social workers* pou get zot bann konsern?

E kan eski *PSB* pou kapab donn ou en *feedback* lo bann propozisyon ki'n ganny fer, e eski sa bann propozisyon pou enkli en *Insurance Scheme* pou kouver bann *social workers hazard pay*?

Akoz i annan de lenstans kot bann *social workers*, bann landrwa ki bezwen ale; bann lakour ki zot bezwen antre ladan. Zot annan *power of entry*, Mr Speaker. I kapab poz en danze pour zot.

So eski Minis i kapab dir nou lo sa bann pwen spesifik ki zot in fer, dan lentere pour nou kapab rod en meyer keksoz pour *social worker* ki mon asire Minis osi i anvi war. E ki nou, nou anvi war. Mersi, Mr Speaker.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Mon oule reasir Onorab ki mon pa *defensive* mwan. Kekfwa annandler ou pa kontan larepons ki mon'n donner. Me solman mon pa *defensive* e mon pe sey defann mon larepons.

In terms of lapolis *involved*, i annan en Seksyon ki apel *Child Protection*. E sa i egzakteman enn nou bann

clear partner ki nou travay avek ki adisyonnèl *alongside* nou ki fer sa louvraz. Sirtou letan i annan *child protection cases*.

So, i pa kestyon nou'n anvoy sa louvraz lo zot. *They are one of the main key partners at Unity House* ki travay *alongside* nou e zot fer sa louvraz.

Onorab, si ou pe demann mwan *how often i meet* avek *social workers*, i do. Le 2 May mon ti avek tou *social workers*. E *again*, letan mon vini mon koz avek zot. Mon pas en pe letan *as much as I can* avek zot.

Mon'n deza dir osi. Mon menm envit *social workers* dan mon *Secretariat* kot mon asiz par group e mon kapab koz avek zot. E sirtou letan i annan bann moman difisil.

So, i annan dimoun kekfwa - mon war ou get ou telefonn ki pou dir ou sa i pa arive. *Social worker* i osi konnen poudir mon annan en *Open-Door Policy*. *Anytime social worker* i le vin war mwan -

It's a fact Onorab. Pa *dispute*. Sanmenm mon dir ou. Ou dir mwan mon *defensive*. Apre ler mon donn ou mon larepons, ou pa kontan.

I en *fact* ki mon annan en *Open-Door Policy*. Si i annan *social workers* - e tou bann

dimoun pou konnen poudir mon *Open-Door Policy is a priority for the staff*.

Le 2 May mon ti avek mon bann *social workers*. Zot in dir ou sa? *I wish they would say that to you*. So, mon konnen poudir i annan en bout Mr Speaker, ki *the Social Workers' Council* pe travay lo la. Mon a les *PS* elabore lo la *if it's ok*. Mersi. *Thank you*.

MR SPEAKER

PS, ou annan laparol.

PS LINDA WILLIAM-MELANIE

Mersi, Mr Speaker. Bonzour tou dimoun. Parey Minis in eksplike, otan ki posib ki nou kapab zwenn avek *social worker*. Nou fer li.

E kot i konsern bann kondisyon travay, e osi bann devlopman ki pe pase dan en departman. *Social worker* i ganny met okouran.

E nou pe osi fer sir ki lenformasyon i al kot *social worker*. E nou'n devlop en *intranet* ki napa lenformasyon ki reste deryer.

Kot sa ki konsern sa *scheme* pour Lasirans. Sa in deza ganny monte dan en *meeting* ki ansanm avek direkter nou ti annan avek *social worker*.

E parey nou konnen dan kad *public service*, i napa byen, byen sa bann kalite

laranzman *scheme* pour en lasirans pour travayer konman en group profesyonnel.

Me sa i en diskisyon ki'n ganny fer avek *Social Workers' Council* pou kapab annan rankont avek bann lakonpannyen lasirans pou vwar vremen ki mannyer nou pou kapab annan en *Policy Lasirans* pour bann *social worker*. Akoz tou *social worker* i bezwen anrezistre avek *council*.

So as part of that linisyativ, nou a swete ki *Council* a kapab ede pou kapab fer sa bann diskisyon avek bann konpannyen lasirans pour nou kapab vwar ki pli bon *package* konman en *package* lasirans pour bann travayer sosyal. Mersi, Mr Speaker.

MR SPEAKER

Mersi, Minis. Onorab Esparon, ou kestyon?

HON REGINA ESPARON

Mersi, Mr Speaker. Bonzour Minis, ek ou delegasyon. Minis, nou konnen an menm tan ki nou pe apresye louvraz ki bann *social worker* i fer, nou konnen ki poudir parfwa zot annan bann *workload* ki pa fini.

E an se moman nou annan bann sityasyon ki *arise* kot nou bezwen *share* en

social worker ant 2 distrik. Konmsi en *social worker* i servi 2 distrik.

Ki kalite *recruitment drive* ki ou *Minister* pe fer, ou departman pe fer, pou ankouraz bann *school leavers* pou pran sa profesyon konman *social workers* a lavenir? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Onorab pour ou kestyon. Onorab, tou distrik *at this moment* i annan en *social worker*. Mon mazine si i annan *overlap*, i petet *to do with family cases*.

Eksepte La Digue. *The social worker from Praslin* i vizit La Digue. *But every district* mon fyer pour mwan dir i annan en *social worker*.

E *in terms of vacancies* avek sa Bidze pour sa lannen, nou annan nou zis - *available post, 6 post*. E nou dan *process recruitment*.

Mazine poudir ler *NIHSS* i fer sa *training*, i enkorpor *the component of social workers, counsellors*. Sa dimoun i kapab vin en *welfare officer*. *It's very vast, you know*. Depandan mon mazine zot swa. Akoz zot pou'n fer *attachments before*. *And they will have an*

experience of ki mannyer to be en counsellor i ete dan Ledikasyon. Ki mannyer *to be a social worker* i ete kot Departman Sosyal. *They will have a taste of that already*.

So ki laliny zot al ladan, sa i en swa ki zot fer. Me solman mon realize poudir *the more the work is more tiresome but also* konplike - i annan bokou konplikasyon. *It takes a lot of courage* pour ou antre dan sa laliny konman en *social worker*. I pran en kantite kouraz.

E mon konnen poudir ler mon koz avek bann ki la. Sirtou bann ki'n la en bon letan. Sirtou bann ki'n zenn. Onorab, pa *underestimate*. Nou annan en kantite zenn kot Departman Sosyal dan sak sa bann *unit*.

Child Protection Unit i en group zenn e mon tir mon *chapeau* avek zot. Akoz, *child protection* letan nou pe koz *child protection*, sa bann *cases* ki *come up*. Mwan avek ou manke nou pou dir; *you know what, I can't do this anymore*.

But they stay. E zot en group ki letan i annan bann moman pour zot annan zot *supervision* pou ed zot. Me osi pour zot detann. Par egzanp mwan kot mon *Minister*, mon donn letan. *Every Friday afternoon* mon donn lerdtan bann *staff*. Tou *staff* pour zot al fer en *walk* oubyen

legzersis. *For free. 1 hour, every Friday afternoon* ki zot sorti.

So, ou pe met loportinite pour zot kapab detann *away from the job* akòz nou konnen poudir i en keksoz ki entans sa. Me solman nou *try* nou *very best* e mon *hope* poudir sa i ava en profesyon parey *nurses*, parey *teachers* ki zot war zot letan zot pran. I annan en bon rezon akòz zot pran e zot konnen ki diferans zot pe al fer. E zot reste dan sa profesyon. Mersi.

MR SPEAKER

Mersi. Mon a pran keston Onorab Labonte.

HON ANDY LABONTE

Mersi, Mr Speaker. Bonzour Minis, avek *panel*. Minis, dan ou larepons ou'n dir ki *turnover* i vreman ba dan *social worker*.

So, dan sa lespri mon ti a kontan petet zis demande, eski ou satisfè ou menm ou avek *training* ek kalifikasyon ki bann *social worker* i vin avek ler zot sorti *NIHSS*?

Aprè antretan, mon osi mon ti a kontan remerci mon *social worker* Ms Stephie Morel ki pe fer en bon travay. Ensi byen ki Madanm Beryl Laboudallon e menm PS Melanie ki a plizyer repriz nou'n an kontak. So, mon pou dir tou *social worker*

kontinyen sa bon travay. Mersi.

MR SPEAKER

Mersi, Onorab. Minis, nou annan en keston, ou a donn ou repons.

DIRECTOR MS BERYL LABOUDALLON

Mersi, Mr Speaker. Bonzour tou Onorab. Mon ti a kontan reponn sa keston lo kote *training*. E ou pe demann nou si nou satisfè avek kalifikasyon ki nou *social worker* i annan.

Lo kote Servis Sosyal, mon krwar i enn de pe lorganizasyon ki mon kapab dir ki nou bann travayer mazorite over 75 percent nou bann *social workers* i *trained* avek en *diploma*.

San kont prezan bann ki annan degre ek bann ki annan *masters*. E an plis ki sa, nou kontinyelman fer bann pti *refresher courses*. E nou *liaise* byen avek *NIHSS*.

Parey i annan en pe la ki pa ankor ganny zot kalifikasyon. Zot pe swiv kour CPD avek *NIHSS*. E osi nou annan 4 ou 5 la pe swiv kou degre. So, mon kapab dir en lekip byen *trained* pou dil avek problem sosyal dan pei.

MR SPEAKER

Mersi, DG. Mon a donn Onorab Labrosse.

HON RICHARD LABROSSE

Mr Speaker, mersi. Zis dan menm laliny ki Onorab Labonte in demande, Minis, mon ti annan zis sa kestyon mon osi. Akoz mon'n tann ou koz bokou lo *scheme*, lo benefis ki bann *social worker* i gannyen. E la kestyon ki'n monte lo *training*.

E mwan mon ti a kontan konnen la, eski pour bann zenn ki pe ekoute la deor ouswa bann ki deza dan sa lanplwa ozordi, eski ou Minister zot formaliz bann *training* enternasyonal osi?

Parske nou'n tande la ki problem sosyal i pa parey 5 an pase or 10 pase ozordi ki nou pe koze.

Eski i annan bann laliny *training* enternasyonal ouswa bann Lagreman enternasyonal ki annan deor ki sa bann *social worker* zot osi, sirtou bann zenn zot ganny sans partisipe?

E la osi mon pou profite Mr Speaker pour mwan salye mon *social worker*, Ms Timara Marengo Plaisance ki pe fer en bon travay. Mersi, Mr Speaker.

MR SPEAKER

Mersi. Minis, repons.

PS LINDA WILLIAM-MELANIE

Mersi, Mr Speaker. Mersi, Onorab, pour kestyon.

Onorab, parey ou kapab petet konstate, i pa tro fasil vreman konmela pour ou ganny en kantite *training* enternasyonal.

Me ki nou fer atraver Departman *Foreign Affairs*, si i annan bann *training* ki annan pou fer avek domenn sosyal, zot toultan anvoy bann dokimantasyon kot nou pour nou vwar si i annan ki ale avek travay ki nou pe fer.

Me osi nou eseye pran kontak avek bann lorganizasyon enternasyonal pour nou kapab vwar. Me ankor, i depan bokou lo finansman. Akoz pa tou keksoz ki ou pou ganny li *free* e i bann demars ki nou kontinyelman fer.

Me par kont, menm ki nou *social worker* pa pe ganny sa sans pou al *training* an deor, nou annan bann *international trainer* ki ler i vini, zot kapab partaz en pe zot lekspertiz avek nou.

E pou dir sa lannen la, an Mars nou ti pe fer en lodit - nou'n kontinyen fer en lodit dan nou departman. E ankor i bann keksoz adisyonnèl. Bann ekspertiz ki ganny partaze avek nou bann *staff* lokalman.

Me otan ki posib, nou konman departman, nou esey fer nou mye pour nou sey tap laport pour nou kapab ganny - *even* bann *workshop* ki nou *staff* i kapab ale. Me i pa

toultan fasil. So nou kontinyen avek sa lesey pour nou kapab ofer *training* avek nou *social worker*. Mersi, Mr Speaker.

MR SPEAKER

Mersi, *PS*. Mon krwar se tou kestyon ki mon kapab pran la. Mon pe avans lo prosen kestyon 68, Onorab Anne Bistoquet.

HON ANNE BISTOQUET

Mersi, Mr Speaker. Bonzour Mr Speaker, *panel*, Manm koleg Onorab e tou dimoun a lekout. Kestyon 68 i lir koumsa;

Eski Minis i kapab enform Lasanble lo statistik labi kont zanfan pour lannen 2024 e ki sa statistik i demontre konpare avek sa dernyen 10 an? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Mersi, Onorab pour ou kestyon. Mr Speaker, pour lannen 2024, Divizyon Servis Sosyal ti anrezistre 425 ka labi kont zanfan. Sa i konpri bann kategori labi swivan;

Labi fizik, labi seksyel. neglizans zanfan, e labi emosyonnel. Sa sif i montre ki i annan en logmantasyon dan bann ka ki'n ganny raporte kot

Servis Sosyal sa bann dernyen lannen.

An mwayenn pandan sa dernyen 10 an, Servis Sosyal in rikord anviron 308 ka labi kont zanfan pour lannen ki konpri sa bann kategori labi ki mon'n dir oparavan.

Mr Speaker, a sa pwen permet mwan pou eksplik bann stratezi enportan ki nou'n met an plas pou fer sir ki zanfan, adilt e tou partener ki travay ek zanfan i byen ganny enformen pou raport labi kont zanfan ki ganny detekte.

Lentrodiksyon sa 3 *digit helpline* 116 an 2021 in ed bokou, sirtou apre ler travay, pour okenn dimoun raport ka labi zanfan. Mr Speaker, atraver sa *helpline*, nou'n remarke ki i annan plis rapor ki ganny fer.

I enportan note ki sa *helpline* pe ganny servi dan en fason efektiv aköz sa bann ka in vin a nou latansyon. E nou kapab pran aksyon dan en dele letan pli kourt posib. Sa bann nimerò i ganny zere par bann profesyonnel byen eksperyans e sa laliny i *free*.

Mr Speaker, Divizyon Servis Sosyal in ranforsi son Program Sansibilizasyon atraver medya, dan lekol, dan kominote e dan landrwa travay. Ki'n ede pour ki dimoun in ganny plis ledikasyon lo prevansyon e

rekonnet bann diferan form labi e lenformasyon lo ki mannyer e kote zot kapab raport bann ka labi.

Nou'n ranforsi sa partenarya e travay an kolaborasyon avek bann partener kle dan proteksyon zanfan pou nou tou koz en sel langaz e pran aksyon desiziv pou raport bann ka ki vin devan zot.

Divizyon Servis Sosyal ansanm avek son bann partener in antreprann diferan Seson Formasyon oubyen *training* avek *childminders*. E zot asistan lo proteksyon zanfan e ki mannyer pou idantifye siny labi.

Pour lezot profesyonnel dan Minister Ledikasyon, Minister Lasante e Minister Lakaz, e lezot ki annan kontak avek zanfan, zot in resevwar formasyon pou fer evalyasyon lo bann zanfan atraver *Risk Indicator Assessment Framework*. En zouti ki pou kapab idantifye e detekte boner. Risk ki en zanfan i kapab fer fas avek e pou pran aksyon apropiye.

Mr Speaker, analiz ki nou'n fer i demontre ki sa bann stratezi in ede pou kas bann baryer. Dan lepase, sa size ti enn ki ti ganny konsidere konman *taboo*. Kantite dimoun pa ti le koz lo la oubyen vin devan. Sa ti kapab pe anpes rapor ka labi

lo zanfan. Me dimoun in vin pli konsyan e war lenportans proteksyon zanfan.

Mr Speaker, an terminan mon oule ankor remet lanfaz ki proteksyon zanfan i pa konsern zis Servis Sosyal. I devwar sivik e responsabilite tou dimoun. E an premye, se paran sa zanfan. Manman, papa, manm fanmir e tou dimoun dan sosyete pou pran sa responsabilite partaze.

Atraver ou Mr Speaker, mon lans en lapel ek tou dimoun pou ede kas serk labi dan nou pei. Akoz ler en zanfan i ganny abize, sa sikatris i reste avek li tou son lavi.

Tou dimoun ki en *carer*, ki en *caregiver* ou gardyen en zanfan, mon demann zot pou kree en lanvironnman ki an sekirite e annan lanmour kot zot zanfan i kapab grandi e epanouir pour zot devlop zot potansyel. Sa i zot devwar primordyal.

Alor nou demann zot pou fer tou sa ki dan zot mwayen pou anpes labi arive dan nou pti pei Sesel. Mersi, Mr Speaker.

MR SPEAKER

Mersi, Minis. Ou siplemanter, Onorab Bistoquet?

HON ANNE BISTOQUET

Mersi, Mr Speaker. Mersi, Minis pour ou larepons. Minis,

les mwan profite pour mwan felisit osi bann travayer *child protection*. Parey ou'n dir ki zot bann zenn e nou vwar poudir zot pe fer en tre bon travay. So, mon dir zot mersi pour sa group zenn.

Minis, ou'n dir pou dir in annan en logmantasyon petet apepre en santenn par mwayenn. Eski zot in idantifye ki bann fakter ki'n fer sa logmantasyon?

E ou'n osi mansyonn sa *helpline 116* ki pe ed zot en kantite. Eski ou krwar poudir sa logmantasyon i bann nouvo ka labi ki pe ganny arive konpare ek sa dernyen 10 an?

Oubyen ti deza annan en kantite labi. Me vi ki zanfana pa ti vreman konnen e bann lezot dimoun pa ti vreman konnen ki mannyer pou raporte, eski sa *helpline* ki pe ed zot pou kapab detekte bokou plis sa bann ka?

E si sa bann ka i bann nouvo ka, oubyen bann ka ki'n prolouze pandan en kantite letan ki prezan nou pe dekouver? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Mersi, Onorab. Wi, Onorab, parey mon'n eksplike dan mon larepons. Nou evalyasyon

entern, nou krwar poudir lentrodiksyon sa *helpline* ki nou ti fer in fer en gran diferans.

Parey mon dir, labi in toulta arive dan pei. Petet i ti'n maske. I ti trankil e *it's a taboo subject* ki dimoun – ziska ozordi dimoun pa pou vin devan pour plizyer rezon. *You know, whether its shame. Whether* ou pa oule sa i sorti pou al avek bann profesyonnel ki pou tande, *and so on*, e *so on*. E pou annan konsekans, *you know. For many, many reasons*.

So nou *internally*, nou konnen avek *the introduction of sa helpline* ki *free*. E i man par bann profesyonnel ki ler i pou *call* i pou konnen poudir i annan en dimoun ki'n ekout li. *Whether* zanfana menm. Akoz zanfana pe *call helpline. Which is very good*.

Savedir sa sansibilizasyon ki nou pe fer lo sa nimero 116, *it's free*. E nou remerci bann *companies* telekominikasyon ki'n kapab fer sa pour nou. 116.

E zanfana i *call* nenport ler. I kapab dir ou *this is what is happening* kot mwan. *Neglect, sexual abuse, emosyonnel, physical. They can call*.

E sa i *reassuring* pour nou poudir en zanfana i kapab pran zis son telefona i *call*. E *up to the time*, i annan en

dimoun ki pou kapab pran sa *phone call* e reasir sa zanfàn. E pran aksyon osi.

Social workers i travay – bann ki lo *duty, it's 24 hours*. So si i annan bann keksoz ki'n ganny rapòte, i bezwen ganny deplase sa ki lo *duty*. So *definitely* nou konnen poudir sa in fer en gran diferans. E se sa ki mon pe dir; *the reporting has come forward and increase the numbers*. I kapab annan bokou plis. *Who knows*.

Me i reste ki nou bezwen konnen poudir labi lo zanfàn i pa akseptab. E tou dimoun i bezwen annan en regard pou konpran ki pe pase dan son *community*. Ki pe pase dan pei. Ki pe pase dan lekol. Ki pe pase partou e rapòte.

E nou demann dimoun pou rapòte. Rapòte *it can be anonymous as well*. Pa foudre ou dir ou non.

So nou, nou krwar poudir sa limero in fer en gran diferans, *to the point* ki nou pou fer konversasyon avek bann telekominikasyon pour nou regarde si nou annan ankor *numbers* ki *free*, ki nou kapab azoute.

Ou pa ganny enn. Olye si sa dimoun i lo laliny i angaze, i kapab en lot nimero i sonnen *at the same time*. So nou pe go *all the way to* sa. Dek ki labi i ganny rapòte, garanti i *trigger* en *process* ki pou arive. I malere Onorab ki sa i arive

dan nou pei. *But everybody has a duty of care* pou fer sir ki nou bann zanfàn i reste *safe* e zot reste zanfàn. Mersi.

MR SPEAKER

Mersi, Minis. Onorab Samynadin, kestyon.

HON KELLY SAMYNADIN

Mersi, Mr Speaker. Bonzour Minis avek ou *panel* e tou dimoun a lekout. Minis, mon apresye ki ou'n met lanfaz lo sa size *training* pour bann edikater. Me an sa ki konsern resours, sa i reste touzour en limitasyon.

Mon ti a kontan konnen, anvi ki se ou Minister ki annan lyen direk vizavi sa size labi zanfàn, eski ou Minister i travay konzwentman avek Minister Ledikasyon pou asire ki nou bann edikater i reste touzour ekipe avek bann resours ki azour, avek bi pou asire ki zot pe li byen edik nou bann zanfàn e asiste zot letan zot dan bezwen?

E dezyenmman, mon ti a kontan konnen ki rol oubyen fonksyonnn bann *social workers* an sa ki konsern bann ka labi ki ganny rapòte kot lekol?

E an dizan sa, mon ti a kontan mon osi felisit mon *social worker* Ms Natasha Mathiot ki li osi i pe fer en bon travay dan distrik Au Cap. Mersi.

MR SPEAKER

Mersi, Onorab. Minis? Wi, lekel – *Executive?* Non. Direkter *Social Services*.

<u>DIRECTOR</u>	<u>SOCIAL</u>
<u>SERVICES</u>	<u>BERYL</u>
<u>LABOUDALLON</u>	

Mersi, Mr Speaker. Mersi, Onorab pour sa keston. Parey Minis in mansyonnen dan son dezyenm larepons se ki, vre nou pe travay avek bann edikater pour ki zot osi kapab donn en soutyen *or* donn sipor. E donn zot en *duty of care* osi pou kapab asire ki nou zanfan i byen. Sirtou bann edikater ki pe travay direkteman avek zanfan. E pour sa parey in ganny mansyonnen, i annan sa *Risk Indicator Assessment Framework*.

Sa i en *tool* ki'n ganny entrodwir par Servis Sosyal kot bann edikater tel ki bann *teachers*, bann travayer Lasante, kot *Housing, ASP*, eksetera zot ganny *trained* – nou pe fer sa depi 2019. Zot ganny *trained* pour zot kapab idantifye, sirtou lo kote maltretans zanfan. Idantifye boner e konnen ki mannyer pou refer.

Akoz ki nou'n vwar, bokou fwa zanfan ki pe ganny maltrete i pas dan lanmen bann edikater, me naryen pa ganny fer. Avek sa *training* ki -

ler nou pe fer sa *training*, nou pa koz zis lo labi zanfan.

Nou koz lo lasante mantal zanfan. Nou koz lo sityasyon lakaz, lozman kot sa bann *expert* dan sa bann diferan lorganizasyon i ed nou fer en lazournen *training* kot nou edik sa bann dimoun.

E ki nou'n vwar avek sa vreman, nou pe kit rikord kote kot nou, se ki nou annan – i osi ede pour annan plis *referral*. Nou vwar bann *teachers* i pli konsyan. *Or* si zot pa kler, zot *call* nou, kontakte nou pou diskit ka ki zot krwar i devret ganny met dan nou latansyon.

Lo kote *process* pour labi. Si en – *counsellor* normalman i sa dimoun kot lekol ki refer bann ka labi kot nou. Me parey mon'n dir ankor ek sa *training*, nou war bann *Headteachers*. Bann *Deputy Headteachers* ek lezot. Zot osi ki zot fer zot kontakte nou. *Or* i annan ki kontakte lapolis. Prezan nou, nou pran aksyon ansanm avek lapolis si i devret.

Si non, nou bezwen travay ek zot pour nou etabli ki'n arive, ki sa rapor i konteni. Eski i enn ki labi? I enn ki zot kapab ed nou lo la? Oubyen i enn ki nou bezwen met li atraver prosekisyon avek lapolis?

MR SPEAKER

Mersi Ms Laboudallon.
Onorab Bastienne, ou
kestyon?

HON DESHEILA BASTIENNE

Mersi, Mr Speaker. Bonzour
Mr Speaker. Bonzour Minis ek
ou delegasyon. Bonzour tou
koleg Onorab.

Mr Speaker, mon ti a
kontan demann Minis, vi ki
ou'n konfirman ki i annan sa
logmantasyon, e osi mon pou
tous osi lo sa zafer *helpline* kot
ou'n menm konfirman ki zot
pe ganny bokou sipor. E sa
helpline i byen efektiv.

Me selman letan nou pe
gete, malgre tou sa bann – nou
ti pou plifere antann ki ka pe
desann ki dan plas i monte.

Me eski Minis ou kapab
konfirman ki malgre tou sa
zefor ki zot pe mete, tou sa
travay ki ou'n mansyonnen,
ou krwar ki poudir sa
logmantasyon dan labi zanfàn
i kontinyelman ogmante petet
kot i annan serten *cases* ki zot
war i tro tarde pour li al devan
Lakour?

Ou menm enn fwa ki i
ariv devan Lakour petet ou
krwar ki poudir santans lo
serten *perpetrators* lo bann
dimoun ki koupab pa ase
sever? Mersi.

MR SPEAKER

Mersi, Onorab. Minis? Yes,
Minister.

MINISTER **PATRICIA**
FRANCOURT

Mersi, Mr Speaker. Mersi,
Onorab pour ou kestyon.
Onorab, mon ti a swete ki mon
vin dan Lasanble e mon dir ek
zot poudir ka labi lo zanfàn in
desann *drastically*. *That would*
have been my wish.

Me solman, i annan en
keksoz ki pe arive dan sosyete
an zeneral, nou fabrikasyon
petet. Bann faktè ki kekfwà
annan de fwa i enpakte lo
what else is happening.
Mindset dimoun. *Behaviours*
dimoun. Latitid. Lalkol. Drog.
The list can go on.

What is happening? Dan
lakour, responsabilite. Mon'n
koz lo manman, papa. Tou
dimoun pran responsabilite. *Is*
everybody taking their
responsibility?

E i vreman difisil pour
mwan dir eski i pou desann? *I*
wish I could say i pou desann.
Me sa ki mon kontan *in a way*
dan tousala se ki *it's being*
reported. Sa ki pli fermal se si
letan i annan ka labi e sa
zanfàn i soufer dan silans. Sa
ki pli difisil e i pou *endure* sa
soufrans pour en kantite letan
parey nou konnen.

Mon'n deza travay avek
adilt ki *20 years after* ki i vin
koz avek ou i dir ou sa labi ti
arive letan mon ti annan 3 an,
4 an. I pa ti zanmen kapab
raporte. Ti napa mekaniz
pou *report*. *So at least when*

it's reported nou konnen nou pe sov en zanfan.

Si nou regard nou *helpline for example*. Ler nou ti fek konmanse nou ti annan nou 273 ka ki'n vin lo *helpline*. *This was 2021. 2022* nou annan nou 601 *increase*. I vedir sa *awareness* e sa bann piblisite ki nou pe fer lo *helpline* e sansibiliz dimoun, i pe marse. 2023 i monte i ariv 837 *calls* ki pe *come up*.

Now, regard kot nou sorti 273. 2024 nou'n rikord 1366 *calls*. *That is one tool* ki nou annan ki efektiv. E si zanfan adilt *vulnerable adults* pe servi sa *hotline* pou raporte, nou louvraz nou se pou kapab *go all the way with it* avek nou bann *partners*.

Judiciary mon napa kontrol lo la. *It takes a while* pour en *case* ganny *formulate* pour ou kapab anmenn kot lapolis, Atorni Zeneral, prosekisyon. *That's a process in itself*.

E mwan mon konversasyon ki mon toultan dir, *we need to speedup* sa *process*. I pa kapab ki *years after* ki sa zanfan letan ti ganny labi prezan ki i pe *come forward, right*.

That's a Judiciary process e nou konnen poudir i en keksoz ki *hopefully* i a ganny pran konman en priyorite pour nou dir ka labi

lo zanfan i vin konman en priyorite.

So pour mwan sa ki mon ti en pe kouraz ladan, ki *at least* bann *cases* i *come forward* e i ganny raporte. E nou kapab *safeguard* sa zanfan. Tir li si fodre. Travay ek sa fanmir si fodre e met bann serten kondisyon si fodre. *That is reassuring for me*.

Me selman mon ti a *wish* mon vin Lasanble en zour e mon dir ka labi in *decrease* en kantite. Alor dimoun la deor i bezwen konpran poudir en zanfan i en zanfan. Zanfan pa'n ganny mete pou ganny abize. *Zanfan has to live their life* parey en zanfan. Mersi.

MR SPEAKER

Mersi, Minis. Bon, nou bezwen termin la pour sa kestyon. Mon re eksplik bann Manm ki mon annan apepre 15 minit par kestyon. Nou kapab depas en pe al en pe plis. Me selman nou bezwen rezerv letan pour lezot kestyon osi. Nou a pran poz la e nou a repran 11er05.

(BREAK)

MR SPEAKER

Nou repran lo kestyon. Nou'n ariv lo kestyon 69, Onorab Anne Bistoquet.

HON ANNE BISTOQUET

Mersi, Mr Speaker. Kestyon 69 i lir koumsa; Eski Minis i kapab enform Lasanble ki prosedir e mezir ki *social worker* dan son Minister i pran dan ka kot *welfare* en zanfan pe ganny negligize par paran e ki fason zot fer paran pran zot responsabilite? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Mersi, Onorab, pour ou kestyon. Mr Speaker, mon pran sa loportinite pou ranforsi ki responsabilite zanfan i premyerman reste avek paran.

Me par kont, Servis Sosyal dan Departman Zafer Sosyal in ganny mandate pou protez zanfan. E sa pouvwar in ganny byen dekrir anba *Children Act 1982*. Sa i vedir ki i reste devwar Servis Sosyal pou pran aksyon letan i annan en zanfan ki pe ganny negligize ou maltrete.

Prosedir e mezir ki travayer sosyal i pran i dapre *case management guidelines* ki gid bann diferan letap travay. Sa i konm swivan; ler en rapor i antre, travayer sosyal i anmas otan lenformasyon konsernan sa size e i fer en *assessment* inisyal baze lo lenformasyon ki'n anmase.

Swivan sa, i fer kontak avek bann parti konsernan, tel ki paran sa zanfan, lekol e lezot partener. Depandan lo sirkonstans sa ka pou determin entervansyon appropriye.

Baze lo sa evalyasyon inisyal ki osi pran kont nivo risk ki sa zanfan pe fer fas avek, travayer sosyal i fer son plan travay ki enkli rankont avek tou parti konsernan. Risk i ganny klasifye lo 3 nivo. Risk ki o, mwayen e ba.

En *care plan* ki enn; en plan ki detay lentervansyon travayer sosyal. Lezot partener e osi paran e manm fanmir sa zanfan kot i nesese i ganny determinen. Sa *care plan* i ganny revwar tou le 3 mwan ansanm avek lezot profesyonnel pou asir progre fer par sa endividi e kontinyen servis ki nesese.

Baze lo nivo risk e gravite sa ka, lentervansyon i pran diferan lanplè. Dan ka kot negligans i ganny vwar ki nouvo risk i ba, travayer sosyal i evalye ki sipor sa fanmir i bezwen pou amelyor sityasyon dan lakour.

La i organiz Sesyon Konsey avek paran e lezot manm fanmir dan sa lakour e agree lo serten kondisyon e gidans ki paran i bezwen swiv. Sa bann kondisyon oubyen *target* i ganny mezire e verifikasyon i ganny fer ase

regilyerman atraver vizit dan lakour avek lezot profesyonnèl pou evalye ki i annan amelyorasyon.

Si zanfan pe al lekòl, entervansyon i osi kontinyen kot lekòl an partenarya avek *school counsellor* pou asir byennet sa zanfan.

Mr Speaker fodre note ki bokou paran i ganny ankouraze pou swiv laklas *parenting* ki ganny organize par Servis Sosyal ek NCC.

Mr Speaker, ler ka neglizans i ganny klasifye konman o, la travayer sosyal i bezwen azir vit e rod manm fanmir ki pare pou ede. Me si sa pa materyaliz dan limedya, travayer sosyal i bezwen rod rekour avek lenstitisyon oubyen en dimoun i pare pou donn soutyen sa zanfan. La bann prosedir nesese i ganny fer pou retir sa zanfan dan sa lakour pou asir son sekirite.

Depandan lo gravite sa ka, Servis Sosyal i rod sipor lapolis. E ansanm zot fer lenvestigasyon konzwent pou ranmas ase levidans. E la lapolis i fer determinasyon baze lo levidans pou remet sa ka avek Lofis Atorni Zeneral pou prosekut sa paran.

I enportan note ki si sa paran i montre sanzman, son zanfan pou kapab ganny re entegre avek li. Ou lezot manm fanmir, ou lezot konesans. Me si napa okenn sanzman dan

sa lakour, Servis Sosyal i rod lezot mwayen tel ki fwaye, *foster care* oubyen ladopsyon. Me sa i depan lo laz sa zanfan.

Mr Speaker, dan bann ka neglizans, bokou i depan lo korperasyon paran e manm fanmir pou asire ki i annan sanzman dan sa lakour.

Alor i enportan ankore enn fwa pou paran pran zot responsabilite anver zot zanfan e tret zot byen avek latansyon. Me osi lanmour.

Servis Sosyal i reste angaze pou sipòrt fanmir ki tonbe akòz diferan sityasyon lavi, pou zot sirmont difikilte e rebran zot responsabilite konman en paran. Mersi, Mr Speaker.

MR SPEAKER

Mersi Minis. Onorab Bistoquet, ou siplemanter.

HON ANNE BISTOQUET

Mersi, Mr Speaker. Mersi, Minis, pou ou repons byen detaye e mon asire en kantite nou nou'n aprann en kantite nouvo keksoz.

Minis, ou'n dir ki dan bann prosedir ki en *social worker* i pran se Sesyon Konsey verifikasyon regilye, zot menm al kot lakour sa bann dimoun pou regard sa bann ka.

Ki bann defi ki bann *social worker* i rankontre ler zot pe al devan lakour oubyen

ler zot devan lakour sa bann dimoun? Eski ou krwar poudir zot annan ase resours ou Minister e sa bann travayer, pour zot kapab kontinyen avek zot travay?

E anvi ki nou konnen poudir bann ka sosyal i kontinyen ogmante, eski ou krwar poudir zot annan ase pour zot kapab *cope* avek sa bann ka ki nou annan an se moman? Mersi.

MR SPEAKER

Mersi, Onorab. Minis? Wi. *Ok*, Ms Laboudallon.

<u>DIRECTOR</u>	<u>SOCIAL</u>
<u>SERVICES</u>	<u>BERYL</u>
<u>LABOUDALLON</u>	

Mersi, Onorab. Onorab, mersi pour ou kestyon. I vre sa travay ki nou fer. Sirtou ler ou pe al devan lakour dimoun ki prive. I difisil pour ou antyerman akonplir ou lobzektif. Akoz ler nou koz problemn sosyal, i vedir nou pe antre dan problemn lavi prive sa dimoun.

E bokou fwa ler travayer sosyal i fer vizit, nou vwar nou en pti pe dan difikilte kot nou pa pe ganny korperasyon. Akoz i annan kantite vizit nou war nou pe fer bann letan *odd hours* kot pour nou kapab zwenn sa paran dan lakour, akoz ou pe travay.

Ou osi zwenn zot ansanm ek zanfann pou vwar ki kalite

dynamics ki keksoz pe arive dan lakour pour nou *achieve* kot nou *care plan* i konsernen.

E nou pou ganny sityasyon kot dimoun i kapab vyolan. Vyolan anver nou. Oubyen zot pa korpere pou les nou antre dan lakour dan zot lakaz pour nou kapab etabli ki sityasyon, sirtou pour sa bann zanfann.

Akoz ler nou pe koz neglizans, nou pe koz kot zanfann pa pe ganny byen okipe. Pa byen ganny okipe. Pa pe ganny manze byen. I pa pe ganny lenz. I pa pe – akomodasyon li menm li petet pa favorab.

Sipervizyon. Sanmenm sa bokou fwa nou al apre ler pou vwar; i annan sipervizyon lakour? E sa ler nou pe koz neglizans. E dapre *Children Act* i dir nou, nou annan sa lobligasyon pou fer sir ki marmay i byen.

Me paran pa korpere akoz zot pa anvi ou vwar. Zot konnen i mal. Zot pa anvi ou vwar sityasyon. Me par kont kot neglizans i konsernen, i annan ka kot sa paran li menm pa konnen i pe neglize.

E ler nou pe al laba nou pe al anmenn sipor, soutyen pour nou montre li mannyer i kapab sanz sa sityasyon.

E kot sityasyon pa sanze, malgre sa bann defi ki mon'n mansyonnen la ki zot pa korpere, zot vyolan anver nou.

Lenformasyon ou pa gannnen. Pa zis avek paran. Avek *partners* osi parfw ou pa ganny sa lenformasyon.

E i annan sironstans kot nou vwar nou bezwen ansanm avek lapolis *jointly* kontiny sa *investigation* e pli tar i arive bokou dan serten sironstans kote i annan prosekisyon ki antre ladan.

MR SPEAKER

Mersi. Mersi *Director*. Onorab Gabriel, kekyon.

HON CONRAD GABRIEL

Mersi, Mr Speaker. Minis, anvi ki pour en bon pe letan nou'n napa *social worker*. Travayer sosyal dan distrik Pointe Larue.

Mon ti a zis kontan demande, ki pe arive ek sa bann ka ki ti deza la, e kan nou pou ganny en dimoun *full time* pou adres sa bann nouvo defi ki pe kontinyelman ogmante?

E dezyenman, ki laranzman ki annan ek Biro Ladministrasyon Distrik pou ede *solve* sa bann ka? Eski se *DA* ki finalman *act* koman travayer sosyal? Mersi.

MR SPEAKER

Mersi, Onorab. Minis? Yes, *Director*?

DIRECTOR SERVICES

SOCIAL BERYL

LABOUDALLON

Ok, mersi, Onorab. Onorab, mersi pour – nou a sey klarifye en pti gin lo sa sityasyon Pointe Larue. Nou annan en *social worker* pour distrik Pointe Larue. *Actually*, la i lo *maternity leave*.

Me selman nou annan – parey nou fer ek lezot distrik. Nou annan kouvertir. Sirtou kot Pointe Larue i konsernen, nou pe – sa sinyor i bokou pre avek distrik Pointe Larue.

E Ladministrasyon Pointe Larue ler i annan ka osi nou vwar ki zot pe kontakte nou. Me selman i annan en *social worker* pour distrik Pointe Larue.

MR SPEAKER

Yeah. Ok. Eski i annan en bout ou kekyon ki pa'n ganny reponn ou santi Onorab?

HON CONRAD GABRIEL

Yes, Mr Speaker. Ki rol Distrik Ladministrasyon petet *DA* lo – pran bann kekyon, bann problem?

MR SPEAKER

Wi, *ok*. Direkter, mon a demann ou pou retourn lo sa pwen an relasyon avek Ladministrasyon Distrik. Si i annan en repons *please*.

DIRECTOR SOCIAL SERVICES BERYL LABOUDALLON

An relasyon avek Administrasyon Distrik Pointe Larue. *Social worker* – parey mon'n dir, *Social Services* i an kontak avek Ladministrasyon Distrik. Sirtou sa sinyor ki kouver sa rezyon i an kontak avek Ladministrasyon Distrik. Okenn ka.

Me selman si annan okenn ka ki zot santi ki pa pe ganny adrese ti a byen fer nou konnen. Me selman sa *social worker* Pointe Larue menm i pre pou retournen pou pran son distrik.

MR SPEAKER

Thank you. Onorab Vidot, ou kestyon.

HON AUDREY VIDOT

Mersi, Mr Speaker. Mon a dir bonzour Minis ek ou delegasyon. Tou Manm Onorab e en bonzour spesyal zabitan Roche Caiman.

Minis mon kestyon; swivan bann defi ki nou konnen Departman Sosyal e petet bann lezot lazans osi. Letan zot pe fer tou posib pour zot kapab asire ki zot protez nou bann zanfàn ki zot pa ganny neglizè - espesyalman lo kote paran, zot responsabilite.

Si ou kapab dir nou – akòz nou annan en travay ki ti deza pe konmans fer lo sa *Bill*

Sexual Offenders ki nou ankor pe espere lo la. Anliny avek konplimantasyon travay pour ki nou adres serten bann defi ki tous nou bann zanfàn, si ou kapab dir nou petet ki zistans i ete? *Thank you.*

MR SPEAKER

Mersi, Onorab. Minis? *PS* i a reponn.

PS LINDA WILLIAM-MELANIE

Mersi, Mr Speaker. Mersi, Onorab, pour ou kestyon. Onorab, parey nou ti deza dir lannen pase mon rapel letan nou ti dan Lasanble, nou ti annan en lantant ki sa *Sexual Offenders Bill* ti pou vin devan Lasanble. Me avek bann sanzman ki'n annan, nou'n rebran sa ankor avek nouvo Atorni Zeneral dan nou *meeting National Commission for Child Protection* ki nou ti annan boner sa lannen, pour nou kapab konnen kan ki sa *Bill* pou ariv devan Lasanble.

E in donn nou son parol ki i pe al revwar avek sa dimoun ki pe travay lo la, pour zot kapab gete si i annan okenn sanzman ankor ki bezwen ganny fer. E la apre sa ki i pa'n donn nou en dat konfirman, kan. Me apre i pou fer le neser ki sa *Bill* i ariv devan Lasanble. Mersi, Mr Speaker.

HON AUDREY VIDOT

Zis en klarifikasyon.

MR SPEAKER

Wi?

HON AUDREY VIDOT

Mon konnen zot pa ankore konn lo dat. Eski i pou arive avan lafen lannen 2025 oubyen i pou ganyon lonje ziske 2026?

MR SPEAKER

Mersi. PS, si ou kapab zis klarifye brievman.

PS LINDA WILLIAM-MELANIE

Mr Speaker, nou pa kapab konfirman sa. Me selman parey mon dir, nou toultan an diskisyon. E dan sa premye *meeting* ki nou ti annan, i enn lanfaz ki nou'n mete lo la ki sa in trenn en pe letan.

So, in donn nou parol ki i pou retournen pou al get sa. Alor nou ava esper pouvwar si i kapab arive devan Lasanble avan lannen i terminen. Mersi.

MR SPEAKER

Mersi, PS. Onorab Roucou?

HON MICHEL ROUCOU

Mersi, Mr Speaker. Minis, bonzour ansanm ek PS ek Direkter. Minis, eski si ou kapab dir avek nou Lasanble, lo pwennvi ou Minister, si ou war poudir se ki bann paran la

deor zot pli pare pour zot kapab pran sa responsabilite avek bann ka ki ou pe war. Ouswa i pe ogmante. Ouswa i pe desann li menm li?

Aprè osi si ou kapab dir avek nou, kwa ki ou krwar, apre bann legzersis ki zot in fer, ki pe fer ki annan bokou paran ki pa pe kapab pran sa responsabilite li menm li? Mersi.

MR SPEAKER

Minis, wi?

MINISTER PATRICIA FRANCOURT

Mersi, Mr Speaker. Mersi, Onorab. Onorab, sa ki ou'n demann mwan i en keasyon vremen *générique*. Ou konnen, mon pa kapab dir paran pa kapab pran responsabilite.

Letan nou pran en zanfann nou met lo later, nou bezwen kapab pran responsabilite. E sa ki ou war mon'n dir dan mon mesaj poudir, dizon i annan paran ki annan difikilte *in terms of even parenting skills*. Se sa ki ou war NCC avek Departman Sosyal nou fer bokou *parenting skills*.

Departman Sosyal i *go even further than that*. Nou annan bann *parenting classes for prenatal*, avan pti baba i ne, e *postnatal*, apre zanfann in ne. Kot nou met an plas ankore

bann sesyon regilye. Mon konnen i atraver Minister Lasante.

So nou ganny sa bann non bann paran ki pou al ganny pti baba. E *target* zot. Sirtou bann nouvo. Ou konnen, *target* zot so that they get the skills in terms of preparasyon pti baba. Me osi i bann *skills for life* ki nou pe fer avek zot.

Be si en paran i annan difikilte, *then coming forward* e osi idantifye zot, nou tou ki la nou annan en responsabilite pou dir sa paran pe annan difikilte, ki nou kapab fer pour li.

I en keksoz ki annan de fwa i – nou war dan sosyete nou war en paran in tonbe. Me petet pa nou tou ki donn en lanmen pou dir; be, annou regarde ki nou kapab fer pou ed sa paran.

E kekfw i annan paran ki li menm li letan i ti pe grandi i pa'n ganny sa fason ki mannyer pou *manage* zanfan - swa zot *behaviour*. swa zot latid, swa *even* bann problem sosyal.

So *again*, sa loportinite pou fer sir ki nou met sa bann kalite *training* oubyen *workshops* an plas, i la. Mon ti a oze kontan ki tou paran i kapab *manage* zot zanfan byen e fer sir bann ka labi pa arive. Akoz letan nou pe koz ka labi dan konteks sa kestyon

welfare, nou pe koz bann keksoz baz. Baz.

Neglect i vin; eski sa zanfan i annan manze pou manze? Eski sa zanfan i annan akomodasyon, nou pa pe kit li deor? Eski sa zanfan pe ganny ledikasyon? Eski sa zanfan i *safe*? Sa ki nou pe koz lo la bann baz ki letan nou'n met zanfan lo later nou bezwen kapab fer sir nou *execute*.

E mon mazine osi bann *extended families* zot osi zot bezwen *step in, you know*. Nou annan en kiltir kekfw ki granmanman, granpapa, tantin, tonton, kouzin, *let's all give a helping hand*. Akoz *at the end of the day*, i sa zanfan ki *matter* pour nou fer sir i annan sekirite, me osi, i dan son *safety*. Mersi.

MR SPEAKER

Mersi, Minis. Mon le asir bann Manm tou sa bann size e bann kestyon i bann kestyon tre valab, tre serye. E nou merit plis letan pour li.

Me malerezman nou bezwen *move on*. Par egzanp la mon annan ankor 4 Manm ki'n lev lanmen. Si mon pran sa, mon pou al ankor 20 minit. So, mon a bezwen termin la.

E pou prosede, nou bezwen en sanzman delegasyon. Alor mon pou dir mersi PS William-Melanie e Direkter Laboudallon pour zot

partisipasyon. E mon a swet zot bonn kontinyasyon. Mersi. E antretan madanm raporter ler ou fer sa sanzman, nou ava apel lot delegasyon.

Bonzour Ms Veronique Bresson, Sekreter Prensipal pour Lanplwa. Ms Susan Morel, *Chief Policy Analyst*. E nou osi annan Mrs Nanon, i ankor la. I ti la taler. *Thank you*.

Nou a komans avek kestyon 70 dan non Onorab Labrosse.

HON RICHARD LABROSSE

Mersi, Mr Speaker. Dabor mon ava dir la byenveni nouvo *panel*. Ankor enn fwa bonzour bann ki fek zwenn nou. Mr Speaker, kestyon 70 i al konm swivan;

Eski Minis i kapab enform Lasanble ki poursantaz zenn ant 18 an a 35 an ki'n ganny met dan lanplwa pandan sa dernyen 4 an? Mersi, Mr Speaker.

MR SPEAKER

Mersi. Minis, ou repons.

MINISTER PATRICIA FRANCOURT

Mersi, Mr Speaker. Mersi, Onorab, pour ou kestyon. Mr Speaker, plas zenn dan en lanplwa i enn parmi plizyer manda Departman Lanplwa e i ganny konsidere konman en priyorite.

Departman in travay bokou sa dernyen 4 an pou asiste zenn *jobseekers* ki'n anrezistre. Zenn oubyen nenport dimoun ki pe rod en lanplwa e ki disponib pou antre dan en lanplwa, i toultan ganny ankouraze pou vin devan pou anrezistre kot nou lofis. Spesifikman, lofis numero 2 ek 3 ki trouve *Ocean Gate House*.

Statistik ki Departman Lanplwa i kolekte i montre poursantaz zenn aze ant 18 an a 35 an plase dan en lanplwa pour sa dernyen 4 an konm swivan;

Pour lannen 2021, dan 1837 plasman, 1223 ti ganny plase dan lanplwa. Ki reprezant 67poursan zenn.

An 2022, 899 zenn lo en total 1436. Ki reprezant 62poursan.

2023 ti annan 1005 zenn ki ti ganny plase. E sa i reprezant 66poursan.

Lannen pase an 2024, 972 dan 1462 ti ganny plase. Ki reprezant 67poursan.

An mwayenn, 66poursan zenn ti ganny plase e statistik i montre ki ti annan plis zenn madanm ki ti ganny plase.

Mon oule osi enform sa Lasanble ki anba Program *My First Job*, zenn ki ti konplet zot letid pos-segonder e ganny plase dan en lanplwa ti konm swivan;

2021 - 432.

2022 - 511.

2023 - 523.

2024 - 555.

Nou'n osi obzerve ki bann zenn fiy i reste mazorite zenn ki ti ganny plase dan en lanplwa anba Program *My First Job* pandan sa dernyen 4 an. Eksepte pour lannen 2021, nou ti war bokou plis garson ki ti ganny plase.

Mr Speaker, lenformasyon ki mon'n prezant avek sa Lasanble, i demontre ki departman i annan program e Polisi an plas ki mars byen pou asiste zenn *jobseekers*.

Departman i reste angaze anfen ki zot ganny sipor neser pou antre dan en lanplwa. E nou pou osi konsider nouvo fason fer ki reflekte sa langazman.

Mr Speaker, pou konklir mon mesaz pour bann zenn, se pou servi loportinite lanplwa ki a zot dispozisyon. Si zot pe rod en lanplwa, aprobe pou anrezistre. Akoz sa ki pou permet nou konnen ki i annan zenn ki san en lanplwa.

Mon oule osi lans en lapel ek anplwayer pou donn loportinite zenn pour ki zot a kapab ganny leksperyans neser pour zot devlop zot abilite.

Nou zenn i fitir nou pei. Envestir dan zot pou san dout anmenn rezilta pozitiv pour pei. Mersi, Mr Speaker.

MR SPEAKER

Mersi, Minis. Onorab Labrosse, wi, siplemanter?

HON RICHARD LABROSSE

Mersi, Mr Speaker. Mr Speaker, mon premye kestyon siplemanter i pou fini kot Minis in terminen.

Minis in fer en lapel la avek bann anplwayer pou donn zenn loportinite pour zot ganny leksperyans pou travay.

Minis sa in reste en konsern parmi lazenes ler zot pe rod louveraz kot kriter ki zot kontan dir bann zenn napa leksperyans. Kekfwa lo sa kote si ou Minister zot menm i annan bann travay ki zot pe fer?

La ou'n lans en lapel mon'n tande. Eski i annan bann travay ouswa en Polisi, ouswa en keksoz ki zot pe fer our sa *stigma* fodre ou annan leksperyans?

Akoz ou bezwen konmans travay pour ou ganny leksperyans. Ki sa li menm i ava ankouraz plis zenn Seselwa ozordi pou antre.

Apre Minis, parmi sa bann - mon dezyenm kestyon parmi sa bann statistik ki ou'n donner. Si kekfwa ou ti kapab dir Lasanble lekel bann sektor ki bann zenn in ganny plase plis ladan? Mersi, Mr Speaker.

MR SPEAKER

Mersi. Minis, wi? *Go ahead Minister.*

MINISTER **PATRICIA**
FRANCOURT

Mersi, Mr Speaker. Mr Speaker, mon a pran premye bout. Apre Ms Morel i a pran nou dezyenm bout si i annan sa *statistics* avek li. Mersi.

MR SPEAKER

Tre byen.

MINISTER **PATRICIA**
FRANCOURT

Onorab, ou'n byen dir. In vin konman en routin annan de fwa pour, pa tou anplwayer - *some of them*, ki dir sa konversasyon poudir nou pa pran en zenn aköz i napa leksperyans. Aköz mon'n fer sa lapel dan mon *speech* ki mon'n dir bann zenn vin anrezistre avek nou?

Sel fason pour nou kapab *monitor*.

Si zot pa vin kot nou, *we don't know who you are out there, despite the fact* ki avan ou ti sorti pos-segonder *for example*, nou ti vini dan lekol.

Nou pas dan tou sa lekol pos segonder pour nou konmans anrezistre zot e pour nou kapab konmans anvoy zot *for referrals and so on*. E nou konnen nou fer bann *job fairs* ki nou dir zot "*My First Job*" desann. *And so on, and so on.*

Alor nou, nou fer sa travay *in terms of* si zot in anrezistre kot nou. E nou nou'n fer sa *referral*. Nou bezwen kapab *follow up*. So nou annan en divizyon ki fer egzakteman sa.

So, bann louvraz ki ou war nou, nou pibliye ki nou'n tire dan nou latansyon - e si nou nou'n fer *referral, we need to follow* apre ki sa zenn in al *interview and so* – si nou ki'n *refer*. Si in *apply* lo li menm, nou pa pou konnen. So, *this is why I say they need to come and register*.

So sa *follow up* i en *process in itself* ki nou bezwen *call* sa landrwa travay pou dir nou nou'n anvoy sa dimoun kot ou, dir nou ki'n arive. E nou pou persiste lo la. I annan bon rezon annandler aköz zot pou dir ou nou pa'n pran en zenn.

Dizon i fek sorti, *I don't know*, maritim e i dir ou *SIT* – i dir ou mon pe rod en dimoun ki annan leksperyans *and so on*, nou kot nou pou kapab ed sa zenn plis se nou bezwen *alongside* travay avek nou Seksyon *GOP Workers*.

So si en landrwa i pe vini i pe vin dir nou i bezwen *GOP workers*. Sa 2 seksyon i bezwen kapab koz ek kanmarad pou dir i pe vin rod 10 sarpantye kot ou, oubyen 20 sarpantye kot ou, alor nou annan nou 10 zanfan ki'n sorti

SIT ki'n fek *qualify* konman – avek *credentials* oubyen letid konman en sarpantye.

So, mon konnen poudir nou napa ase sarpantye dan pei. Nou konnen sa. Me solman, si i pou olye donn li 20, mon kapab donn li 10 oubyen 5 e fer sir nou anmas en zenn. E sa i en stipilasyon ki mon bezwen letan nou pe donn en *outcome* baz for lo la.

Annandler dimoun pa konpran aköz ki zis nou pa aprouv *GOP*. Be sa i en stipilasyon pour mwan kapab fer sir ki nou bann zenn i antre. E annandler nou bezwen met bann kondisyon. Si mon pe donn ou sa, ou bezwen kapab pran en zenn fer *training*, fer *mentoring*, fer *coaching*.

Fer sir ki sa zenn i annan pozitivite kot ou travay, *and so on*. Fer sir ki ou en manman, ou en papa, ou tou pour li. Aköz i zenn i fek antre dan louvraz. So nou bezwen fer – nou, nou fer sa legzersis vreman byen. E nou manda se pou met zenn dan louvraz.

Mon pou zis donn ou en *figure*. Nou *national and employment rate* i zis apepre anba 3poursan. *Which is very low*. Me solman *Youth and Employment* i par lao li. *It's almost 9 percent going to 10 percent. Which is too high*.

Be se sa ki nou, nou bezwen fer nou stratezi pou fer

sir zenn i antre. *But*, zot bezwen anrezistre pour nou konnen *who you are*. Mersi.

MR SPEAKER

Mersi, Minis. Onorab Pillay.

HON SEBASTIEN PILLAY

Mersi, Mr Speaker. Mon'n ekout atantivman larepons ki Minis in donn nou. E an antisipasyon sa keston, mon'n osi fer serten resers e regard bann statistik ki Biro Statistik in pibliye. Me mon pou konpar li avek sa ki Minis in dir nou.

Ler nou regard distribisyon *working age population* ozordi, dan lanplwa i annan 62.7poursan dapre Biro Statistik. Sa ki pa'n spesifye i 3.5poursan. *Unemployed* i 1.3poursan. E *outside labour force* i reprezant 32.5poursan. *Outside labour force*.

Prezan ler nou vin kot zenn prezan Mr Speaker, *that's where* keksoz i vin en pe pli serye. Kot zenn prezan, ler nou pe koz *distribution of youth population*. Ler nou pe koz 4enm kar lannen 2024, *outside labour force* dapre Biro Statistik i 52.6poursan. 52.6 percent.

E ler nou regard bann statistik ki Minis in donn nou lo sa bann diferan *years*. Sa 67percent. So ou pe regard *close top 40 percent* bann zenn

ki pa pe ganny plase. Prezan kestyon ki relevan se kwa ki pe fer ki sa bann zenn pa pe ganny plase dan lanplwa? Kwa ki pe fer pour zot pa ganny plase dan lanplwa?

E eski sa size kot bann zenn sirtou - aköz bokou zenn pou al pou rod louvraz dan *private sector*. Gouvernman i annan en *absorption capacity* ki limite. Bokou zenn kot zot pe ganny demande - bann *younger jobseekers*. Zot napa leksperyans. Eski sa pe zwen en rol ki zot pa pe kapab ganny akse avek lanplwa dan Sekter Prive?

E eski i annan kek zwe dan Sekter Prive Mr Speaker kot i annan menm akter dan Sekter Prive ki'n admet ek Prezidan Larepiblik ki zot menm donn lanplwa bann fo sertifika lo kalifikasyon.

Sa in pas dan domenn piblik e ti dan en *meeting* avek bann marsan e Prezidan Larepiblik pou donn zot bann fo sertifika, ki fer ki prezan petet sa pe anpes nou bann zenn ki zot sertifika i valid pour zot kapab ganny akse ek sa bann lanplwa.

E eski Departman Lanplwa pe regard sa an zeneral, aköz la ler i konsern *youth employment*, nou tou nou bezwen lo menm paz Mr Speaker? Mersi.

MR SPEAKER

Mersi, Onorab. Minis, *yes?*

MINISTER PATRICIA FRANCAULT

Mr Speaker, mon a les Ms Morel adres sa bout lo *statistics* Onorab. Epi mon a pran sa lot bout. Mersi.

MR SPEAKER

Mersi. Ms Morel a konmanse.

CHIEF POLICY ANALYST SUSAN MOREL

Mersi, Mr Speaker. Mersi, Onorab, pour ou kestyon. An sa ki konsern *statistics* ki ganny pibliye par Biro Nasyonal pour *Statistics*. Poursantaz ki'n ganny dir ki *outside labour force*, diskisyon ki nou'n annan avek *NBS* i mazorite sa bann dimoun i bann etidyan oubyen bann dimoun ki'n pran retret. E se pour sa, sa poursantaz i o.

Nou'n vreman al an detay avek zot pour nou vreman konpran si i pa dimoun ki pe anvi travay. Me selman ki zot pa pe ganny louvraz. Me ler nou'n get vreman an detay, group laz, zot bann *economic activity* sa group, se plizoumwen bann ki etidyan oubyen ki'n retrete.

E pou koz en pe lo baryer an term lannen leksperyans. Vre ler ou en zenn, lefet ki ou en zenn 15 a 24 an, sa i sa barenm ki nou pran. E dan

kestyon i pe demann 18 a 35 an.

Lefet ki ou laz i vin en baryer an premyerman akòz ou en zenn, ou napa sa leksperyans. Apre i annan plizyer lezot faktè.

Me parey zot konnen kot Departman Lanplwa i annan program ki an plas. Par egzanp *My First Job* kot nou, nou fasilite sa plasman pou zenn ki napa sa leksperyans travay, oubyen ki napa sa kontak avèk lendistri pou li rod en plas travay.

E si ou permet osi Mr Speaker, ti annan kestyon pli boner konsènan lendistri ki bann zenn i ganny plase. Majorite bann zenn i ganny plase dan lendistri ki annan pou fer avèk *tourism* dan lotel.

Oubyen bann luvraz ki dan Gouvènman, dan bann luvraz ki annan pou fer avèk ladministrasyon.

Administrative Support Services. E osi dan *Wholesale and Retail Industry.* Sa i bann *areas* ki majorite bann zenn nou'n vwar zot pe rod luvraz e zot ganny plasman dan sa bann lendistri. Mersi.

MR SPEAKER

Mersi e mersi Ms Morel, pou *remind* mwan. Mon'n sot ou dernyen fwa. Minis, ou pou azout en keksoz lo sa repons?

MINISTER FRANCOURT

PATRICIA

Mersi, Mr Speaker. Onorab, mon *hope* sa bann *statistics* in klarifye pli byen. Akòz nou en departman ki port en kantite latansyon lo nou *statistics*. E nou fer sir poudir letan nou pe donn lenformasyon, i korek. So, mon apresye ki nou'n klarifye sa.

Mr Speaker, mon'n donn en gran larepons oparavan avèk Onorab loter kestyon, lo bann stratezi ki nou fer pou nou veye. Pou nou fer sir poudir bann zenn i ganny sans antre. I pa zis en keksoz ki mon pe dir. I en keksoz ki en fe. E nou fer sa vremen byen.

Parey mon dir. Si nou pe dir bann zenn son to *unemployment* ti en pti pe pli o. I nou luvraz kot Departman lanplwa pou fer sir ki nou kapab adres sa.

Me solman sa Onorab, i pa en keksoz ki zis dan Sesel. I normal sa poudir *the rate of unemployment all over the world* bann zenn i toultan pli o. Nou *wish* i ti apepre pli ba ki sa.

Me solman konpare avèk sa ki i ti ete avan, nou'n desann. Mon krwar nou zis anba 10.6poursan. Ti annan en letan ti 14, 15. So nou pe fer bann zefor pou fer sir ki i kapab desann.

Mon oule fer resorti osi poudir en dimoun ki vin

anrezistre kot nou, en zenn - *less than 4 months, 5 months* in fini ganny en louvraz si in vin anrezistre kot nou. E in fer sir poudir in anmenn son CV. Nou a pe travay avek li, *and so on*.

Departman i fer byen son *due diligence* Onorab. E i fer sir poudir bann louvraz ki pe ganny *submit i match* bann kalifikasyon. I *match* sa ki zot pe dir. Menm *even the job description* nou fer sir poudir i ganny verifiye. So sa bann verifikasyon i mars vreman byen.

Mon pa pou reponn keston lo bann vye rikord konversasyon ki kontinyen vini. Me solman mwan mon pou bezwen dir pou dir mon satisfè ki mon departman i fer *good due diligence* e i fer sir poudir nou *match* sa ki pe demande.

E nou fer li dan en fason vreman *discreet*. E nou fer sir poudir *at the end of the day*, nou priorite se ki nou met nou zenn, enkli Seselwa dan *jobs*. E sa nou fer li vreman byen, pour nou tonm zis anba 3poursan dan larezyon. *We're one of the lowest* e nou devret fyer pour sa. Mersi.

MR SPEAKER

Mersi, Minis. Onorab Sandy Arissol?

HON SANDY ARISSOL

Mersi, Mr Speaker. Bonzour Minis e bonzour tou dimoun ki a lekout. Mr Speaker, 2 pti keston mon ti a kontan demann Minis, Minis mon kontan letan ou'n koz an relasyon avek napa leksperyans ki nou'n adrese. Be mazorite bann fwa bann etranze ki rantre dan pei, zot osi zot mank serten leksperyans. E bann travayer Seselwa ki aktyelman montre zot mannyer pou fer serten travay. Alor mon ti a kontan si sa osi i ganny fer avek nou bann zenn? Mon 2 keston.

I annan osi sa dele letan kot bann zenn i esper en larepons. Letan zot in fer en aplikasyon travay kot en landrwa travay ki'n met son *vacancy*, bann zenn zot ganny difikilte pou ganny en larepons. Swa wi. Swa non.

Alor, ki ou Minister pe fer pou travay avek tou dimoun ki anvoy bann *vacancy list*, pour ki i annan en dele letan ki zot donn sa larepons sa zenn pour li osi kapab fer en deboury si ou pa pe aksepte li?

Dezyenmman an relasyon avek letan ou'n koz lo *My First Job*. Apre i annan osi sa *job fair* ki zot fer tou le-z-an. Eski ou kapab donn nou, apre sa *job fair* la, eski i annan en travay ki ganny fer pou asire poudir bann departman ki'n vini, bann biznes ki'n vini zot pe aktyelman pran dimoun

pou travay apre ki zot in depans sa larzan pou fer sa *job fair*? Mersi, Mr Speaker.

MR SPEAKER

Mersi, Onorab. Minis, PS pou...? Yes, PS.

PS VERONIQUE BRESSON

Mersi, Mr Speaker. Mersi, Onorab, pour ou kestyon. Bonzour Mr Speaker. Bonzour tou Manm Onorab prezan avek lezot *staff* e piblik i pe ekout nou lo radyo.

Onorab, pour – sa i toultan – mon konnen sak fwa nou vin Lasanble, sa kestyon konsernan sa premye bout ou kestyon la. Ki anplwayer, bann *jobseekers* i dir ler zot in *apply* en *post*, zot pa ganny sa larepons. I en keksoz ki nou ankouraz anplwayer pou fer.

Konmsi en dimoun in *apply* son louvraz, si i pa'n gannyen, dir li i pa'n ganny. Nou tou nou *move on*. Ou konnen? Konmsi i napa okenn rezon aköz ou pa pou kapab donn en larepons sa travayer.

So, nou nou'n pran sa an kont dan nou bann stratezi pour nou departman. Ki nou'n dir pou dir mon krwar *once and for all* nou bezwen sey regarde ki mannyer nou pou met lanmen lo la.

Akoz nou konman en departman nou napa lotorite lo en lorganizasyon travay. Nou napa dimoun pou laba

kot li toulezour pou dir li; be ou pa ankör donn larepons sa enn, sa enn e sa enn.

Dan nou stratezi ki nou pe *come up* avek sa lannen, parey tou keksoz, nou pe al *digitalize*. E tou keksoz pou *online*. I relye osi en pti pe avek sa ki *Minister* in dir oparavan dan son bann larepons ki pou ede ankouraz *jobseekers*. Sirtou bann *young jobseekers* pour zot vin devan.

Konmela zot ankör pe vin fizik kot nou. Kekfwa parey nou konnen nou bann zenn annandler pou vin dan vizit dan biro zot pa tro kontan.

So ki nou pe fer dan nou stratezi sa lannen, nou pe fer en proze kot nou pou annan en sistenm *online* ki nou ankör an diskisyon avek bann *developers*. Ki nou pou annan en *platform* ki pou ed anplwayer avek travayer pou *interact*.

En anplwayer i annan son *vacancy*. I pe rod dimoun pou travay. I pou mont lo sa *platform* i pou *advertise* son pozisyon. En nenport dimoun, *be it* zenn, *be it* lezot laz i a pe rod en louvraz ki pou kapab antre lo sa *platform* pour li *apply* sa pozisyon.

E nou bi, sa ki nou annan dan nou lespri se ki *once* sa de dimoun pe enterakte, sa lenformasyon i ganny *feed* avek departman.

So, nou si en anplwayer

in *advertise* son *post*, nou vwar i annan *jobseekers* ki'n *apply*. La nou pou kapab antre pou fer sir i annan sa *follow up* e sa *jobseeker* i ganny son larepons.

Nou'n vwar poudir sa i *the* sel fason oubyen *this is* en opsyon ki nou kapab fer pour nou kapab ganny sa lenformasyon. *Otherwise*, si nou kontinyen parey nou pe ale la. Toultan lannen ale, lannen vini *jobseekers* pe konplent. Nou pa pou kapab antre dan sa lorganizasyon pour nou konnen lekel ki'n *apply post*.

Akoz ler zot vin *apply* travayer etranze, zot dir ou personn pa'n *apply*. *There's no way* ki nou kapab rode konmsi pour nou konnen sa i vre, *unless* nou ganny en rapor sorti kot en *jobseeker*. I vin kot nou i dir; be ou'n *apply* sa *post*. Mon annan en for doutans zot pe rod en travayer etranze. La nou kapab *take up* ek sa anplwayer.

So pour nou sa *platform* i a ed nou ansanm avek i a ed sa *jobseeker*. Sa anplwayer an menm tan, pour li kapab ganny dimoun en pe pli vitman. Pour nou annan sa lyezon sa 3 parti pour nou kapab *once and for all* konmsi kapab met en lanmen lo la.

Ki tou dimoun, tou Seselwa ki annan en posibilite pou antre dan en lanplwa i

pare. Fodre i pare li menm pour li antre dan en lanplwa, i kapab ganny sa posibilite pou antre dan en lanplwa.

So – ok, pour sa kestyon *My First Job*, nou annan en kestyon ki pe vini apre. Si ou pa *mind* nou a pran ladan. Mersi, Onorab.

MR SPEAKER

Mersi. Mon annan ankor 7 Manm la. Mon regrete pou dezapwent – mon a pran ankor 2 kestyon. Onorab Gabriel?

HON CONRAD GABRIEL

Mersi, Mr Speaker. Minis, mon ti fer rekomandasyon en pe letan pase pou anmenn sa Servis Lanplwa en pti pe pli pre ek kominote. Pli presizeman dan distrik. Me ziska prezan, naryen pa'n ganny materyalize.

Eski Minis in pare pou angaz son Minister pou annan en reprezantasyon son Minister lo nivo distrik? Marmay i ale vini, prezan zot pa ganny sa lanplwa. E parfwa sa i koute. Minis, sa i kout tre ser. E la nou pe koz bis.

Lo nivo distrik ti a pli fasil pou *monitor* e kontinyen travay ek sa bann dimoun. Kot si zot pa *successful* dan enn, nou kapab fer bann *follow up* nesaser pou sey plas zot dan en lot.

Zis pou fer remarke Minis, pandan sa 4 an mon

lofis in fer plizyer CV pou ranplas bann dimoun. An gro Minis, eski ou kapab dir nou si ou Minister i annan en plan pou desantraliz sa servis lanplwa dan le fitir? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Onorab, mon annan en kestyon ki relye avek bann *job fairs* - ki ou pe refer tou, non? Ki nou fer. Mon annan en kestyon *coming up*. *Decentralize*.

Sorry. Ou fer mwan dir *job fairs*. Eskize. *Decentralizing* i nou kouver li dan en lot kestyon ki pe vini. Si ou permet mwan mon ava pran ou kestyon *then* ?

Be solman, pran kont ki sa sistenm *online* ki PS pe refer to pou ariv en tan dan Sesel ki dimoun pa pou desann kot en lofis, oubyen lanplwa al dan distrik. *It will be accessibility of the service online. That's the way forward.*

Bann zenn - ou konnen fodre pa nou *babysit* nou bann zenn osi. *I mean, anywhere* dan Sesel i pa lwen pour ou arive pour ou dir pou dir mon pe al en *interview*. *And so on, and so on.*

E mon konnen poudir bann zenn zot rutin i diferan *and so on, and so on*. Annan de

fwa zot osi zot bezwen pran en pe responsabilite. Me solman Onorab, si ou permet mwan, mon pou adres sa apre mon a *come back to your question*? Mersi.

MR SPEAKER

Mersi. Onorab Andre, ou kestyon?

HON CLIFFORD ANDRE

Mersi, Mr Speaker. Mr Speaker, mon ti a kontan demann Mini - in detaye ki poudir poursantaz definitivman i par lannen bann marmay ki ganny anploye.

Ki son Minister i fer avek sa poursantaz ki pa'n ganny anploye dan sa lannen? Eski zot otomatikman *rollover to the next year*, oubyen zot bezwen re vin *apply* – re vin *register* pour zot ganny lo sa lot lannen? Mersi.

MR SPEAKER

Mersi. Minis?

CHIEF POLICY ANALYST SUSAN MOREL

Mersi, Mr Speaker. Mersi, Onorab, pour ou kestyon. Pour bann zenn ki pa tonm dan sa poursantaz ki'n ganny sa plasman, ki nou fer, nou'n pran sa lapros kot ler ou vin anrezistre pou rod en lanplwa, ou lo lalis pour en peryod 6 mwan.

Bann zenn ki nou vwar zot pe retournen a plizyer repriz oubyen ki apre sa 6 mwan zot ankor la san en lanplwa, i annan bann sesyon ki'n deza ganny organize 2 an pase ou 1 an pase, kot nou'n fer bann sesyon spesyalize avek sa bann *jobseekers* ki nou vwar i en pe difisil pour zot gannyen sa plas travay.

E apre sa 6 mwan i fini, oubyen apre sa bann sesyon kot nou *counsel* zot, nou sey konpran en pe zot sityasyon, la nou bezwen demann avek zot si zot anvi re anrezistre. Si zot anvi *apply* en lot louvraz. Akoz *jobseekers* parey son mo i dir, ou bezwen pe anvi pe rod sa plas travay. Ou bezwen pe *job seek*.

So sa konversasyon i ganny fer avek sa bann *jobseekers*. E la si zot anvi en lot plas travay, oubyen si zot anvi kontiny dan sa domenn, la nou re anrezistre zot e zot ganny remet ankor lo lalis. Mersi.

MR SPEAKER

Mersi. Nou avans lo prosen kestyon. 71, Onorab Richard Labrosse.

HON RICHARD LABROSSE

Mersi, Mr Speaker. Kestyon 71 i al konm swivan;

Eski Minis i kapab enform Lasanble, si son Minister pe mazin met en

programm travay pour bann dimoun ki lo program *Methadone* me ki anvi en sans pour travay? Mersi, Mr Speaker.

MR SPEAKER

Mersi, Onorab. Minis?

MINISTER PATRICIA FRANCCOURT

Mersi, Mr Speaker. Mersi, Onorab pour ou kestyon. Mr Speaker, Departman Lanplwa i deza annan en program an plas pou adres bann *target group* ki nou konsider *at risk* oubyen vilnerab. Ki enkli bann dimoun ki pe resevwar tretman anba Program *Methadone*.

Sa i enn parmi plizyer konponan anba nou Program *Reskilling*. Sa programm spesifik in ganny antreprann depi 2022 par Departman Lanplwa an partenarya avek *DSAPTR* ki en divizyon anba Minister Lasante ki ti *connu* konman *APDAR*.

Pour lemoman, nou anrezistre 10 partisipan lo sa program par lannen. I al pour en dirasyon 6 *mois* kot bann partisipan i swiv bann sesyon tel ki; *life skills*, *soft skills*, etik travay ek eksetera, ki prepar zot pou antre dan lanplwa. E osi bann group terapi ki ed zot pou rekonnet e fer fas avek bann sityasyon reel ki

aktyelman egziste dan lanvironnman travay.

Pandan sa menm letan, zot ganny sans swiv formasyon pratik a kour term dan en lenstitisyon edikasyonnel dan en domenn ki zot in swazir.

Aprè sa, zot ganny plase dan en landrwa travay pour 2 mwan edmi pou swiv *on the job training*. La zot ganny swivi de pros pou evalye si zot kapab ganny en travay a plen tan avek sa menm lorganizasyon, oubyen dan lezot organizasyon ki annan loportinite lanplwa.

Fodre osi note ki pandan sa 6 *mois training*, sa bann partisipan i ganny en lasistans finansyel avek Lazans Proteksyon Sosyal ki ed zot pou reste motive lo program. An menm tan, annan posibilite pou soutenir zot lekor e zot fanmir.

Mr Speaker, pou sirmont serten defi relye avek sa program, nou'n kolabor avek lezot partener e departman konsernen pour nou kapab travay konzwentman pou ed bann partisipan kontinyen lo program.

Mon swete ki bann anplwayer i rekonnet gran zefor ki partisipan i fer atraver sa program e donn zot loportinite pour en plas travay permanan pour benefis marse lanplwa, me osi benefis sa dimoun. Mersi.

MR SPEAKER

Mersi, Minis. En siplemanter Onorab?

HON RICHARD LABROSSE

Mersi, Mr Speaker. Minis, mersi bokou pour ou larepons ki ou'n donner. Minis, mon'n ekout ou atantivman. Kekfwa la detrwa kestyon ki mon ti a kontan demande.

Mon konnen i annan bokou paran osi, kekfwa bann pasan osi ki pe ekout nou la ozordi. Parske pour bann dimoun ariv lo en tretman parey parfwa, nou pa kapab parey nou dir, nou pa la pour nou montre ledwa lo person. Me ler i arive, parey nou dir, pti baba in ne nou bezwen sonnyen.

Minis, ki mon ti a kontan ou donn lasirans bann paran ek bann dimoun deor la, ou'n dir ki i annan sa kolaborasyon avek *DSAPTR* ki zot travay ansanm *partnership* ansanm.

La kekfwa pour bann dimoun ki deor ki pe ekoute, ki anvi antre lo sa bann program. Ki bann formalite ki zot fer? Ki zot vin anrezistre kot distrik, kot Lanplwa ouswa direk laba?

E dezyenmman Minis, dan ou larepons ou'n al en pe lo la. La mon ti a kontan osi konnen ki bann mezir ki annan an plas pour zot fer sir konmsi ki zot pe swivre sa

bann partisipan lo sa bann program?

An menm tan osi parey nou dir, ki ler en zefor pe ganny fer pou ankadre zot dan bann landrwa travay, ki osi i vin ek son form disiplin osi avek. Mersi, Mr Speaker.

MR SPEAKER

Mersi, Onorab. Minis?

MINISTER **PATRICIA**
FRANCOURT

Mersi, Mr Speaker. Onorab, pou komanse pour nou kapab idantifye sa bann zenn, i en travay – sa bann aplikan, i en louvraz ki ganny fer atraver DSAPTR.

After all, zot ki annan lekspertiz, zot ki *administer methadone*. E sa bann kliyan i deza *known to them*. So, i toultan reste DSAPTR ki fer sa parey nou dir, en *assessment* lo sa dimoun pou regarde premyerman; eski i zis lo en drog par egzanp *methadone* ki pe ganny administre *is for just one particular drug only*?

E sa i bezwen ganny atraver zot ek sa bann *assessment*. Akoz si sa partisipan i lo plizyer kalite drog, ou kapab *imagine* ki kantite difisil i difisil pour ou pran en dimoun pou met dan en laklas oubyen pou al lo *job training*. Akoz i deza annan en gran difikilte. So sa

assessment i ganny fer par DSAPTR.

E dek ki zot, zot in idantifye poudir sa dimoun i lo nou program tretman, e nou kapab vwar poudir i pe reste zis lo sa program. I parey bann dimoun ki vini ki pran zot tretman dan bomaten, me zot al travay. E *they can*.

E i annan ki pa pou kapab aköz i lo *multiple sub drugs*. Oubyen letan in ariv midi, i al lo en lot drog. Oubyen i al lo *ghetto, and so on. And so on*. So zot ki bezwen fer sa *assessment* pou montre nou si sa aplikan ki'n ganny idantifye pou kapab soutenir sa program.

I pa fasil, aköz parey nou konnen drog i en adiksyon. Annandler kekfwa zot in *identify* en dimoun ki zot *feel* i kapab antre dan sa program. I annan *the ups and the down*. Annandler zot *ok* e zot pe kontinyen lo program. I annan ler *they go back* e zot tonm ankor.

So i vreman, vreman difisil. Me solman, avek DSAPTR nou fer nou mye ki zot ganny sa konponan *training, life skills development*. Montre zot, parey mon dir, bann konportman etik pou antre dan louvraz.

E DSAPTR *at the same time*, i *still* fer son konponan *rehabilitation* avek terapi. I selman *around* sa 2 keksoz i

mars ansanm, ki sa dimoun i annan en sans kapab sorti dan sa adiksyon e antre dan travay.

Akoz sa kote rehabilitasyon avek terapi i sitan enportan. *That's the main one.* E nou, nou donn nou komitman aköz *whatever stage* zot ete lo sa program, si zot in al dan *training* – plasman *training*, nou bezwen vizite.

So nou vizite pou regarde si i annan bann *issues* ki pe *come up*. Travay avek paran kekfw ki pe donn sipor. So, *it's a very holistic approach* nou kapab dir. Me parey nou vwar, nou pran zis 10 partisipan. So, 2 *cohort* posibleman i vreman *tough*. Aköz ou pe war sa dimoun *right through until the very end*. E zot konnen zot i pa fasil.

Me solman pour mwan, si i annan 1, 2, 3 dan 10 ki ou kapab anvoy li dan lanplwa, *it's a success for that person*. E nou kontinyen met sa zefor ladan. Mersi.

MR SPEAKER

Mersi Minis. Onorab Labonte?

HON ANDY LABONTE

Mersi, Mr Speaker. Minis, pour mwan sak fwa ki nou pe koz *methadone* avek bann adikt, i en keksoz ki aköz mon'n travay bokou avek zot

dan lefase. So, i tre pros avek mon leker.

So, souvandfwa nou war poudir i annan diskriminasyon, stigmatizasyon anver sa bann dimoun ki pe servi *methadone*. Me san realize pour zot osi zot en imen e zot annan zot drwa.

E parey ou'n dir, i annan serten travay ki pe ganny fer. Me *still* la deor souvandfwa nou war ki ler zot ganny mete dan – swa zot al rod en lanplwa – zot pe travay byen. Napa okenn siny poudir zot pe donn okenn difikilte. Me selman, sa bann landrwa petet i viktimiz zot, i met zot deor aköz i konnen zot pe servi *methadone*.

So, mon kestyon i; ki rekour sa bann endividi i annan ler ki zot ganny viktimize zis aköz lo sa program *Methadone*, me selman zot pa'n komet okenn lofans? So, ki rekour ki nou annan anver sa bann endividi? Mersi.

MR SPEAKER

Mersi, Onorab. PS i a reponn.

PS VERONIQUE BRESSON

Mersi, Mr Speaker. Mersi, Onorab, pour ou kestyon. Onorab, parey ek nenport ki travayer ki dan en lanplwa, en dimoun ki annan en sityasyon dan son travay ki li i santi li *aggrieved* – parey ou pe dir, la

si sa dimoun in ganny *recruit*. I pa neseserman i devwale si i lo *methadone*, i pe pran *methadone* or i dan sa oubyen non. In fini ganny *recruit*. E si i ganny diskriminen – i son drwa pour li vin devan pou fer son *grievance* parey nenport ki travayer.

So sa proteksyon ki ganny donnen avek en travayer, parey nenport ki travayer. I annan sa *grievance process* ki i vin devan i anrezistre son *grievance*. E sa i a ganny en determinasyon lo desizyon ki son anplwayer in pran kont li. Mersi, Onorab.

MR SPEAKER

Thank you, PS. Onorab Pillay?

HON SEBASTIEN PILLAY

Mersi, Mr Speaker. Mr Speaker, pli boner ti annan – pour mwan prefes en kestyon byen. Pli boner ti annan en kestyon ki ti ganny demande lo sa *Sexual Offenders Bill* ki ti ganny prezante ek Prezidan an 2021, ki ziska la nou pa ankor war naryen ki'n ganny fer. I montre en letarzi pour ou dil avek problemn.

La nou'n ganny dir pou dir nou pe pran 10. 10 adikt. 10 par mwan, *right? Now*, si – par lannen? 10 par lannen? *Ok*. Si nou pe pran 10 par lannen Mr Speaker, e nou annan nou en problemn apepre – ki nou'n dir, apepre

11 – 12mil. 10mil a 11mil dimoun ki dan adiksyon.

Pran 70poursan ladan ki probableman lo program *Methadone*. Be i pou pran Departman Lanplwa 700 an pou dil ek sa problemn.

So, eski zot pe propoz okenn lot mezir ki Gouvernman pe vin avek pou asir en Program Reabilitasyon pli konpreansiv pou fer ki zot kapab dil ek sa sityasyon? Akoz i pa neseserman en program zis Departman Lanplwa. I en program ki konsern *the whole approach* ki pe ganny pran.

E eski ou Minister in propoz serten keksoz tanzib ki ou kapab partaz ek Lasanble avek *DSAPTR* oubyen Minister Lasante, kot zot anvi rezourd sa problemn? Akoz, si mon swiv statistik bomaten Mr Speaker, *then* statistik i *wrong*.

MR SPEAKER

Be *ok* –

HON SEBASTIEN PILLAY

Wi. Be non. Be les nou dir devan Lasanble, akoz zot in donn nou statistik, me selman ou annan 10mil adikt. *But at the same time* ou annan 10mil adikt, ou ganny en statistik *NBS*.

Mon pa pe kestyonn statistik bann zofisye

Lanplwa. *But then something is wrong* dan lafason ki nou kolekte lenformasyon. Mersi, Mr Speaker.

MR SPEAKER

Ok. Wi. Be permet Minis, reponn.

HON SEBASTIEN PILLAY

E la i pe dir nou zis 10 ki al dan lanplwa.

MR SPEAKER

Alright. Ou pa la pour ou fer en largiman lo en size.

HON SEBASTIEN PILLAY

Non, nou pa pe fer en largiman. Nou le Lasanble i kapab *press the Ministry for action* pour nou konnen en aksyon ki ganny pran. Se tou.

MR SPEAKER

Ou'n poz ou kestyon, les Minis reponn. *Yes, Minister?*

MINISTER PATRICIA FRANCOURT

Mersi, Mr Speaker. Mr Speaker, si Onorab ti ekout byen mon remark letan mon ti dir, mon ti dir sa i en konponan dan sa *whole* program *Reskilling*.

E mwan mon fyer poudir dan mon letan avek mon tim, nou'n rekonnet poudir sa en group ki vreman vilnerab e en group ki nou bezwen met dan

lanplwa. Dan ou letan pa ti fer sa, *ok?*

Premye fwa ki nou nou'n vini nou'n diskite. Ou napa sa program an plas. So, pour mwan kantmenm ou pou dir 10 dan en lannen Onorab, sa louvraz entansif ek konpreansiv ki ou bezwen fer avek 10. Ou pa pou zanmen kapab konpran sa, *until* ou antre dan soulye en dimoun ki en *drug addict* pour ou konnen *what that person goes through*.

E nou pa pe deor zis donn li *methadone*, les li ale dormi dan lazournen kot li. Nou pe dir donn li son medikaman. Me solman annou ed li pour li kapab antre dan en lanplwa. E sa bann dimoun ki *apply*, zot konnen aköz zot pe *apply*. Savedir zot annan en dezir pour zot antre dan lanplwa avek *the right support* ki zot ganny mete an plas.

E *reskilling i vast*. I annan tou sort kalite group *targeted* ki nou pe dir. E sa i enn bann konponan ki mon'n dir dan mon *speech*, nou *target*. E pou fer sir ki *at least* nou annan en *success story*.

Onorab, mon'n asize mwan devan sa bann dimoun ki vin dan sa program. E mon war zot mwan. Mon pa zis vin tir portre mwan.

(Interruption)

**MINISTER PATRICIA
FRANCOURT**

Mon koz avek zot e mon war zot! Mon konpran zot soufrans. Mon konpran *what they are going through* e ki bann difikilte ki zot gannnen. E mon war zot *face to face*. E toultan mon pe aprann avek zot kwa ki nou pou fer amelyor.

So si pour mwan kantmenm mon'n dir i annan zis 5, i annan zis 4, i *still* en *success for the country!* Mersi.

(APPLAUSE)

MR SPEAKER

Mersi, Minis. Onorab Loze?

MR SPEAKER

Mersi, Minis. Onorab Loze.

HON JOHAN LOZE

Mersi, Mr Speaker. Mr Speaker, mon pe sey konpran en pe. Letan Minis ti'n komanse mon ti'n ganny lenpresyon aköz ki mannyer in koz pe donn *life skills*, pe donn *soft skills* - pardonn mwan mon ti'n ganny en pe lenpresyon be posibelman sa i pa anba son *ambit*. I pe fer plito travay reabilitasyon ki ti sipoze ganny fer par bann lezot dimoun.

Apre an mezir Minis in ale, mon'n sey konpran en pe. Prezan mon'n war sa 10

restriktiv mwan osi. Prezan mon pe demande, eski i pe travay ek sa ki *APDAR* i ti apel bann *high threshold patient* avan bann ki'n fini *weaned off* zot - zot in fini stabilize par *DSAPTR* prezan zot bouz lo en lot letap kot li.

Be ankör mon vin lo sa baz restriktiv. Koman *CC Member* Distrik Mont Fleuri enn bann keksoz ki nou pe remarke, se ki en kantite bann toksikomann dan distrik pe komans ganny difikilte avek... luvraz ki zot fer plis se doker. Zot pe komans ganny problem dan sa bann travay aköz zot lo *methadone*.

E mon krwar sa i en pe ki size ki Onorab Labonte ti pe sey leve, sa kote stigmatizasyon. So, prezan enn mon kestyon pou Minis se eski zot pou annan evantyelman en *broader program*? Aköz sa 10 la ki pe dir nou i mwan mon pe *assume* i sa bann *high threshold*. Be pou bann ki pa ankör *attend* sa nivo kot zot in fini ganny *weaned off*. Mon krwar i apel *medication assisted rehabilitation* si mon pa tronpe sa.

Pou bann ki pa ankör *attend* sa nivo *medication assisted rehabilitation*, i ti en pe sa ki Onorab Pillay pe demande. Eski lonterm nou pou annan en program ki pou anmas en pe bann ki li i

ankor, i ankor *at large* li. En fason ki nou a bes en pe nivo nwizans ki zot komet dan distrik. Mersi, Mr Speaker.

MR SPEAKER

Mersi. Wi, *ok*. Minis, ou a reponn.

MINISTER **PATRICIA FRANCOURT**

Mersi, Mr Speaker. Mersi, Onorab. Onorab, i pou toultan reste *the fact* ki partisipan ki ganny refer kot nou in *go through the process* avek DSAPTR. Zot ki annan sa *expertise*, e zot ki pou konnen si sa dimoun ti lo *the high threshold rehabilitation and so on and so on*.

Akoz zot ki *administer* sa program reabilitasyon, pa nou. Me selman i *work alongside*. Ler sa DSAPTR in fini fer son *assessment* zot annan *profile* lo sa dimoun. Zot pou annan; ki son difikilte ki son risk, *even of having a relapse*. Zot pa pou kapab zis – i pou difisil pou zot *is refer* dimoun ki zot in war pa ankor ariv sa staz.

So, sa pa pou tonm kot nou. *We received the applicants* baze lo sa *assessment* ki DSAPTR in fer. E nou travay ansanm. E toultan mon pou dir, ou pa pou kapab zis dir refer zot met zot dan lanplwa si napa sa lot konponan ki annan sa

reabilitasyon. E sa i en program entansif ki DSAPTR i fer, nou zwenn - nou annan nou MOU ki nou pe formalize ansanm pou fer sir ki sa travay i mars byen.

E si sa program i montre pli bon rezilta ki nou ti anvi, *why not* nou bezwen koz plis lo sa ki mannyer nou agrandi sa. E ki nou fer li plis vin en model par egzantp. *But we have to start somewhere*, nou pa pou kapab zis dir pran *50 and then* nou pa kapab *manage*, nou pa kapab *cope*. Akoz foudre ou konpran Onorab sa kantite letan ki ou bezwen *even if it stand on the program*, i vremen entansif, i vremen konpreansiv.

I pe ganny sa *counselling* dan 2 fason. DSAPTR pe fer pou li, lo nou kote osi nou pe fer pou li. So, pou mwan i en program ki mon *feel* dan le fitir i pou annan sikse plis, nou *wish*. Selman parey ou konnen drog i en adiksyon ki *very vicious*. En moman sa dimoun i *ok*, en lot moman i pa *ok*. Mersi.

MR SPEAKER

Onorab, permet nou *move on*. Mon krwar nou'n etal sa kestyon. Minis i donn son bann repons avek en kantite detay. Annou prosede ek 72, nou ankor lo sa *panel*. Wi, Onorab Desheila Bastienne.

HON DESHEILA BASTIENNE

Mersi, Mr Speaker. Mon kestyon i al koumsa; eski Minis i kapab konfirm avek Lasanble si son Minister i satisfè ek bann *job fairs* ki'n ganny fer dan pei? Konbyen travay ki Seselwa in benefisye atraver bann *job fairs*? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Mersi, Onorab, pou ou kestyon. Mr Speaker, mon pou reponn tou lede ou kestyon Onorab ansanm. Dan nou zefor pou ankouraz sitwayen Seselwa pou partisip aktivman dan devlopman lekonomi nou pei atraver en lanplwa desan e prodiktiv, Departman Lanplwa in organiz en seri *job fairs* lo Mahe, Praslin e La Digue diran plizyer lannen.

Lobzektif sa aktivite se pou permet bann lorganizasyon travay pou demontre bann loportinite lanplwa ki zot annan. An menm tan manm piblik i kapab enterakte direk avek sa bann anplwayer pou fer laplikasyon pou plas travay ki pe ganny pibliye.

Nou osi servi sa loportinite pou desantraliz nou servis atraver lanrezistremman dimoun ki pe

rod en lanplwa, ki pe vizit sa *fair* sa zour. Mr Speaker, mon ti a swete ki nou ti a kapab ganny plis partisipasyon piblik prezizeman bann ki pe rod en lanplwa pou servi sa sans pou vizit sa *fair*, anrezistre e fer laplikasyon pou en louvraz.

Lo kote anplwayer i osi demann en pe plis korperasyon bann lorganizasyon pou donn *feedback* bann aplikan dan en letan rezonnab. Mr Speaker, diran sa peryod letan ki nou'n organiz *job fairs*, an mwayen anba 200 dimoun ki'n ganny en lanplwa atraver bann *job fairs*. Sa *fair* i ganny fer zis pou en zournen, 3 fwa par lannen.

E sa platform i konplemant lezot servis ki departman i ofer. Pou le moman, nou pe evalye si nou pou kontinyen desantraliz sa aktivite dan rezyon, oubyen nou reste santral. Pou rezon ki nou vwar ki bokou plis dimoun i partisipe letan nou dan lavil. Mersi, Mr Speaker.

MR SPEAKER

Mersi, Minis. ou siplemanter Onorab Bastienne?

HON DESHEILA BASTIENNE

Wi, Mr Speaker. Minis, mersi pou ou leksplikasyon. Selman mon ti a kontan demann ou sa kestyon. Atraver bann enteraksyon direk ki arive dan bann *job fairs*, eski zot

departman i annan sa *follow up* or zot biro i ganny en lalis pou zot konnen atraver tel *job fairs* la, la lakantite laplikasyon ki nou'n gannyen?

Aprè dezyenmman, osi mon ti a kontan demande, eski zot annan rikord kot annan serten aplikan ki'n partisip dan sa bann *job fairs* me ki lo zot *GOP* e si i annan sa posibilite kot zot ganny anploye dan plas en Seselwa? Mersi.

MR SPEAKER

Mersi, Onorab. *PS*, i ava reponn.

PS VERONIQUE BRESSON

Mersi, Mr Speaker. Mersi, Onorab pou ou kestyon. Konsernan *job fairs*, ler nou envit bann lorganizasyon pou zot partisipe nou fer sir ki zot vin avek bann pos vakan, savedir bann *vacant positions* ki zot annan ki *available* pou zot pibliye sa zour.

An menm tan nou, nou fer *referral* pou bann dimoun ki lo nou *jobseekers list* pou sa bann pozisyon. Nou envit zot osi pou vin vizit sa *fairs*. An menm tan nou met lanons pou bann lezot piblik ki pe rod en louvraz pou zot kapab vini pou vin vizit *fair*. E pou plizyer lannen prezan nou ensiste ki sa bann lorganizasyon ler zot *on site* dan nou *fair* zot ranpli

lenformasyon tou dimoun ki *apply* bann pozisyon kot zot.

Ler sa *fair* i fini, nou anmas sa bann lenformasyon avek zot. Nou annan en form ki nou'n *design*, nou donn zot ki zot anmas tou lenformasyon. E ler nou ganny sa lenformasyon prezan nou donn zot ankor en pti pe letan, *of course* ler in ariv dan zot lorganizasyon, zot osi zot bezwen met zot annord pou zot kapab organiz *interview* pou dimoun vin fer en *interview*.

So, nou donn zot en pti pe letan, apre kekfw apepre 1 semenn oubyen 2 semenn. La nou *get back to them* sa bann lorganizasyon pou nou dir zot donn nou en *update* bann dimoun ki zot in *recruit* dan bann pozisyon ki zot in *apply*. Pou dir Onorab *to be honest* pou et onnet parey nou'n dir nou'n pas lo la oparavan, pa tou lorganizasyon ki donn zot *full* korperasyon avek nou pou donn nou sa lenformasyon pou rezon ki zot konnen zot menm sa bann lorganizasyon.

Me selman ki nou'n komans fer depi lannen pase, nou'n vin avek en stratezi. Si en lorganizasyon i tarde, mon pa pou dir i refize, me selman i tarde donn nou sa *feedback* lo bann dimoun ki zot in *interview* apre ki zot in *recruit* nou, nou pas sa lenformasyon avek nou divizyon kot nou *recruit* travayer zot *apply*

travayer etranze. E toultan nou pa ganny sa *feedback*, nou pa aksepte okenn laplikasyon ki sorti kot sa bann lorganizasyon.

So, sa nou servi li koman en motivasyon pou sa bann lorganizasyon pou zot kapab donn nou sa *feedback*. Ou konnen sa *feedback* i pa vadir ki tou dimoun ki'n *apply* pozisyon dan *job fair* zot pou ganny en louvraz dan sa lorganizasyon. Pa sa ki nou pe rode. Nou pe rod bann dimoun ki'n *apply*, bann ki'n kalifye ou'n kapab fini fer *interview* bann ki ou'n *recruit* apre nou demann ou lenformasyon, ou osi *supply* nou lenformasyon bann ki ou santi in *apply* me selman i pa kalifye pou sa pozisyon. Ki nou tou nou kapab bouze, e sa dimoun i kapab ganny refer en lot landrwa.

So, wi nou fer sa *follow up* tre strik avek sa bann lorganizasyon. I kapab en pti pe pli mye, me selman sa i nou pozisyon pou le moman. Mersi, Onorab.

MR SPEAKER

Mersi. Mon a pran kestyon Onorab Romain.

HON GEORGES ROMAIN

Mersi, Mr Speaker. Minis, mon'n ekout ou lo kote *job fair* ou dir zot fer 3 fwa par lannen. Mon mazine byensir i annan

en kou osi ki vin avek. E mwan mon kestyon Minis mon ti a kontan demann ou si ou pou annan en statistik kantite zenn ki'n ganny anploye atraver sa 3 *job fair* ki zot in fer par lannen?

Apre si sa bann zenn ki'n ganny anploye si zot *follow* sa bann zenn aköz mon mazine *job fair* pou mwan ler zot pe fer zot pe fer plizoumwen pe target plis zenn. Aköz bann lezot dimoun mon mazine i annan leksperyans, zot annan zot sertifika zot pli fasil kapab rod zot lanplwa zot menm.

Alor, sa *job fair* pe vreman target plis zenn. Mon mazine sa rezon par deryer. Alors Minis si ou annan lenformasyon lo mon 2 kestyon. Mersi, Mr Speaker.

MR SPEAKER

Mersi. Minis, diriz ou *panel* si...

CHIEF POLICY ANALYST SUSAN MOREL

Mersi, Mr Speaker. Mersi, Onorab, pou ou kestyon. Si mon'n sezi byen kestyon kantite zenn ki'n ganny anploye atraver *job fairs*. I annan en *job fairs* spesifikman ki nou fer pou bann zenn ki konplet zot letid post segonder ki apel *My First Job Recruitment Fair*. E sa nou fer li plizoumwen komansman, komansman lannen.

E presizeman parey *Minister* in fer sorti anba 200 dimoun ki'n ganny anploye atraver bann *fairs*. Petet nou a kapab fer zot ganny sa lenformasyon spesifik konbyen zenn ladan, sa nou ava fer zot gannyen. Me selman i annan en kantite zenn ki vini ler nou fer sa enn spesifikman pou *My First Job* komansman lannen.

Aprè sa si zot ankor lo *jobseekers list* nou fer rezistrasyon o kour lannen.

MR SPEAKER

Byen, mersi. Minis, ou oule azoute?

MINISTER PATRICIA FRANCOURT

Mersi, Mr Speaker. Zis mon ti pou azout en pti bout. Onorab, ou konnen letan nou fer *job fairs* la i annan keksoz nou annan kontrol *over*, i annan keksoz nou napa kontrol. Nou fer en kantite piblisite zot konnen zot. Piblisite lo televizyon, piblisite lo nou *Facebook page* partou kot nou kapab pibliye pou dir i annan *job fair*.

Whether sa zenn sirtou si nou pe refer *to* zenn i decide leve sa bomaten e i vini i *attend* sa *job fair* e i war ki annan *that's another story*. I annan zenn ki letan, akòz mon vizite tou *job fairs* mon vizite, mon lo teren *for hours* avek

mon tim. E i annan zenn ki pou vini i pou dir ou koumsa poudir mon'n zis vin regarde, napa naryen la pou mwan. E i pa ni menm an rezistre avek nou kantmenm mon pe sey promote sa, i pran son semen i ale.

I annan ki serye i pou vini i pou fer son CV, i pou donn ou. E letan ou pe mars avek li ou pe dir ek li "*what about this, what about that?*" I kapab montre en lentere. I annan bann zenn osi ki vini ki dizon in *study STA*, prezan ou pe krwar poudir la i annan 5 lotel i annan en ta louvraz pou fer dan lotel. I pa anvi sa li i dir be mon ti anvi vin sarpantye. I sanz son lide *just like that* e nou konnen sa i *almost* normal avek zenn.

Ozordi ou pa kapab dir *this is what* sa bann zenn in *study this is the line* ki i pou al ladan. I kapab i *erratic* e i sanze. Konmsi i *part* ek devlopman bann zenn annan de fwa kekfwa zot pa realiz lenportans ziska *further on* letan zot pli *mature*. So, i annan ki nou *wish* sak fwa nou fer sa bann *job fairs* i annan bokou plis.

Nou'n al Grand Anse, nou'n al La Digue i diferan letan ou pe regarde. Mon'n anmenn bann loportinite kot ou, *now use that opportunity* akòz louvraz i la e nou, nou pou kapab met sa sirveyans lo

sa bann louvraz. Me selman bann zenn parey nou konnen, bann zenn *all over the world* i annan diferan keksoz ki pas dan zot lespri, dan zot *mindset*.

Selman nou kontinyen ankouraz zot. Lenportans se fer zot konnen vin kot nou anrezistre, *then* nou, nou konnen lekel ou. Mersi.

MR SPEAKER

Mersi. Mersi, Minis. Mon a pran kestryon Onorab Loizeau. Mon kontan mon'n ariv kot ou i fer 3enm fwa ou lev ou lanmen prezan. Ou ganny en sans.

HON NORBERT LOIZEAU

Mersi, Mr Speaker. Bonzour Minis ek ou delegasyon. Aparaman sa kestryon mon ti anvi demann en pti pe pli boner. Me selman mon krwar i ankor ase relevan. Minis dan sa bann, ler sa bann zenn la in vin *register* sirtou bann ki serye ki ou'n koz lo la, la. An atandan ki zot pe esper sa lanplwa, eski i annan okenn lasistans vi ki zot zenn zot bezwen fer serten keksoz zot bann bezwen zot osi.

Eski i annan serten lasistans finansyel ki sa bann zenn i gannyen an atandan ki zot pe esper sa louvraz? Mersi.

MR SPEAKER

Mersi, Onorab. Minis?

MINISTER PATRICIA FRANCAULT

Mersi, Onorab. Si *any jobseeker* pa zis neserman en zenn ki'n vin an rezistre kot nou Departman Lanplwa i travay konzwent avek ASP, si in anrezistre e i en *active jobseeker* parey nou dir, aktivman vadir ou'n anrezistre. Letan nou *call* ou nou dir ou i annan *vacancies* nou *refer* ou, ou ale. *Active* sa en ?

Si ou pa aktiv ou kontinyen dormi ziska 3er apre midi prezan ki pou decide pou al rod en lanplwa, ou pa aktiv *right*? So, si ou aktiv i annan en *means testing* ki fer kot ASP parey tou keksoz pou regarde si ou kapab siport sa zenn *whiles they are actively looking for a job*. Mersi.

MR SPEAKER

Mersi, Minis. Bon, mon krwar mon pou bezwen *move on*. Nou pe al lo midi edmi i reste nou 2 kestryon. Me selman avan sa nou bezwen fer en sanzman, sanzman *panel*. Donk, a wi i Ms Susan Morel ki mon pou dir mersi e orevwar, bon depar Ms. Morel e bonn kontinyasyon. E an menm tan Madanm *Hansard* raporter i a profite pou apel lezot zofisye ki pe espere.

Bonzour e byenveni Mr Patrick Payet Sekreter Deta

dan Minister Finans, Plan Nasyonal e Komers. E Mr Steve Monnaie, Direkter Zeneral pou *Labour Relations* dan Minister Lanplwa. E lo *side table* Ms. Morel in gard son prezans. Byenveni zot tou pou partisip dan sa 2 kestyon ki reste nou. E sa i premye 73 Onorab Sandy Arissol.

HON SANDY ARISSOL

Mersi, Mr Speaker. Bonzour. Bonn apre midi bann nouvo ki'n zwenn nou lo *panel*. Mon kestyon Mr Speaker, eski Minis i kapab dir nou Lasanble ki kantite ka *grievance* ki'n ganny anrezistre ki enplik travayer etranze ki'n pas atraver medyasyon e ki'n *fail*, ki'n bezwen al devan tribinal? Mersi.

MR SPEAKER

Mersi, Onorab. Minis?

MINISTER PATRICIA FRANCOURT

Mersi, Mr Speaker. Mersi, Onorab. Mr Speaker, pou komanse permet mwan klarifye ki Tribinal Lanplwa i en lenstitisyon ki totalman endepandan ek Departman Lanplwa. Tribinal i tonm direktman anba sipervizyon e *jurisdiction* Zidisyer.

E tou bann ka ki ganny anrezistre kot Tribinal Lanplwa sa i antre dan rikord

Zidisyer e pa kot Departman Lanplwa. Alor, baze lo sa klarifikasyon ki mon'n fek donnen, bann sif dan mon larepons pou reflekte zis lo kantite ka *grievance* pou travayer etranze ki Departman Lanplwa in anrezistre depi lannen 2022.

Mr Speaker, parey zot konnen Departman Lanplwa i annan en seksyon ki apel *Industrial Relations*. Rol sa seksyon se pou ankouraz bann bon relasyon travay ant travayer ek anplwayer. Sa seksyon i osi annan en *unit* ki anrezistre bann ka *grievance* sorti swa kot travayer oubyen anplwayer ki an dot mo i bann dezakor ki arive tel ki aksyon disipliner, travayer ki pa'n ganny peye son saler eksetera.

Baze lo nou rikord kantite ka *grievance* ki'n ganny anrezistre sorti kot travayer etranze dan sa 3 dernyen lannen bann sif i konm swivan.

- 2022 ti annan 87.
- 2023, 211.
- 2024, 77

Mr Speaker, apre ki en *grievance* in ganny anrezistre, tou lede parti i ganny envite pou en *meeting* medyasyon pou negosye e vwar si zot kapab tonm lo en lagreman pou rezourd sa konfli. Baze lo nou rikord bann *grievance* ki'n ganny mete par travayer etranze. Pou lannen 2022, dan

86 ka 45 pa'n reisi tonm lo en lagreman.

2023, dan 188 ka 109 pa ti reisi. 2024, dan 71 ka 45 pa'n reisi. Mr Speaker, dan lenstans kot sa 2 parti pa'n reisi tonm lo en lagreman dan medyasyon sa aplikan i ganny donnen en sertifika pou demontre ki son ka in pas atraver medyasyon parey lanplwa i demande, parey Lalwa eskize i demande.

Sa aplikan i annan son drwa dapre Lalwa pou anrezistre en ka kot Tribinal Lanplwa si i anvi. Sa i reste pirman son swa si i pou kontinyen avek son ka ouswa non. Mr Speaker, Departman Lanplwa i pran tou ka e konplent ki ganny raporte o serye e nou pe kontinyelman entansifye mekanizm ki deza an plas pou asire ki Lalwa Lanplwa i ganny respekte par tou anplwayer osi byen ki travayer. Mersi, Mr Speaker.

MR SPEAKER

Mersi, Minis, pou ou larepons. Nou a pran siplemanter, Onorab Arissol?

HON SANDY ARISSOL

Mersi, Mr Speaker. Mersi Minis, pou ou larepons. Mr Speaker, mon ti a kontan demann Minis 2 kestyon. Mon premye kestyon ki mon ti a kontan demann Minis, anvi ozordi dan nou pei, nou annan

en pe bann mannigans bann mannev par bann travayer etranze kont nou bann anplwayer Seselwa.

Mon ti a kontan demann ou mon premye kestyon. Eski i annan menm sekirite an relasyon avek Lalwa Lanplwa pou protez nou bann anplwayer Seselwa parey i annan Lalwa ki protez osi bann travayer etranze ki vin rann nou en servis dan nou pei? Premye kestyon.

Dezyenmman, mon ti a kontan demande Mr Speaker, anvi ki Minis in eksprim an relasyon avek Tribinal Lafanmir, mon konnen i annan plizyer ka pa neseserman fini kot Tribinal Lafanmir, me i al sa ki nou dir kot lakour.

So, mon ti a kontan demann avek Minis letan i ariv bann ka koumsa, ki arive avek bann travayer etranze ki i annan en *grievance* kont en anplwayer Seselwa me i annan en *case* devan Lakour ki pe zize. Lekel ki okip li, kote i ep reste? Kote i pe dormi?

Anvi ki li i annan en *grievance* kont en anplwayer Seselwa ki'n anmenn li dan pei. E konbyen dele letan i pran si sa etranze in ganny war poudir i koupab aköz souvandfwa apre nou ganny dir nou war zot re antre dan pei pe travay dan en lot

lakonpannyen? Mersi bokou Mr Speaker.

MR SPEAKER

Mersi, Onorab. Tre byen *panel*, Direkter Zeneral ki pou pran laparol?

DG LABOUR RELATIONS STEVE MONNAIE

Mersi, Mr Speaker. Mersi, Onorab. Bonzour tou Manm Onorab. Onorab, premye kestyon proteksyon anplwayer Seselwa. Wi, Lalwa i protez tou anplwayer Seselwa en si ki tou travayer Seselwa etranze. Si sa anplwayer Seselwa i santi i annan serten *claim* ki sa travayer etranze pe fer e i *unfair* e i *unjust*, e li i annan tou son dokiman pou prouve ki sa travayer etranze pe koz serten mansonz, i osi annan son drwa pou met en *case* kot Departman Lanplwa kapab dir en *grievance* parey nou'n dir kont sa travayer.

Si sa travayer en legzanp pe *claim* serten peyman *overtime*, serten *annual leave* kekfwa ki egzorbitan, i pa sa kantite ki i merit. I kapab met son *grievance*, e si sa *grievance* pandan medyasyon i *fail* i osi annan sa drwa koman en anplwayer met sa *case* kot tribinal, *ok* ?

Dezyenm parti kestyon Mr Speaker, konsernan en etranze ki met en *case* ki'n ariv devan tribinal. I annan 2 fason

fer sa en etranze son *case* i ganny *fast track* 7 zour si in ganny *dismissed*. Savedir si aksyon *discipline* in ganny pran kont li, in ganny terminasyon baze lo sa lofans, i annan 7 zour pou li kapab anrezistre en *case* kot Departman Lanplwa pou sa *case* ganny *mediate*.

Si pandan sa 7 zour i pa'n met en *case* kot nou, i perdi sa drwa pou li *file* sa *grievance*. Since in *file* sa *grievance complaint officer* in sey son mye pou annan en negosyasyon, pou annan en medyasyon *within the 2*. E sa 2 parti pa'n tonm dakor sa travayer etranze i kapab al met son *case* pli lwen. Si i anvi kontinyen kot tribinal.

So, an arivan kot tribinal i *still* responsabilite sa anplwayer pou *provide* li *food and shelter* sa i lobligasyon anba Lalwa. Me sa lobligasyon i zis dan konteks si ou'n ganny en terminasyon. Si en legzanp ou'n *resign* ou menm koman en travayer, ou'n deside kontinyen serten *claim* kekfwa ou larzan pa'n ase ou *feel* i mank ou serten benefis.

Ou responsabilite pou *provide* ou lekor manze avek akomodasyon i reste lo ou koman sa travayer. So, *basically* ler ou'n ariv kot tribinal responsabilite *again* si sa *case* i annan pou fer avek terminasyon, ou anplwayer i

bezwen kontinyen *provide* ou *food and shelter* ziska ler ou *case* i ganny fini ekoute tribinal.

Me par kont si ou'n al tribinal parey mon'n dir okenn lezot rezon apart terminasyon, i ou responsabilite pou *provide* ou lekor akomodasyon avek manze. E i osi i posib si en etranze kekfwa li in kit pei apre ki in ganny sa terminasyon oubyen *any dismiss, any dismissal, any grievance* i kapab rod en reprezantan par deryer pou *proceed* avek son *case*. E en avoka, en linyon ki kapab kontinyen avek son *case*. Mersi bokou, Mr Speaker.

MR SPEAKER

Mersi Direkter Zeneral. *Ok*, nou a pran kestyon siplemanter? Onorab Pillay?

HON SEBASTIEN PILLAY

Mersi, Mr Speaker. Mr Speaker, ler mon'n ekout *panel* Minis la devan, zot in dir ek nou koumsa poudir si en dimoun in ganny terminasyon i annan 7 zour ler sa terminasyon on anplwayer i annan responsabilite pou *provide* li *food and shelter*.

Me Mr Speaker, dan ka Vel Monien, Editer an Sef *TODAY* ki'n met en *grievance* pandan 7 zour ki'n ganny pouse kot *TODAY* in ganny deporte lo lord Imigrasyon i

pa'n ganny sans pran son drwa anba Lalwa Lanplwa, lekel ki'n fer sa desizyon? Lekel ki donn sa desizyon avek Imigrasyon pou fer deport sa dimoun dan Sesel.

Eski se Minister Lanplwa ki pran sa desizyon? Oubyen se Departman Imigrasyon ki pran sa desizyon? Lefe ki sa dimoun sa msye ti annan son fanmir isi, i ti en editer zournal. E li in ti'n al met son *case* devan e apre en sel kou zis i ganny deporte avan menm ki i kapab *bring to a conclusion* son *case* ki i ti'n met devan. E revokasyon son *GOP as well*. So, lekel ki'n fer sa? Eski Minis i kapab dir nou si son Minister ki'n donn lord oubyen si en lot Minister?

Akoz la i paret poudir i annan en pwa ki aplikab pou serten dimoun. En pwa ki aplikab pou en lot dimoun?

MR SPEAKER

Ok. Nou'n konpran ou kestyon. Minis, a reponn dan kote son responsabilite pou li lo sa ki li i kapab reponn. Minis?

MINISTER PATRICIA FANCOURT

Mersi, Mr Speaker. Larepons i vreman senp Onorab. Nou pa kapab komant lo bann *case* spesifik ki ou'n koz lo la devan mwan. Mersi.

MR SPEAKER

Mersi. Mon a pran kestyon Onorab Esparon.

HON REGINA ESPARON

Mersi, Mr Speaker. Mr Speaker, mon anvi demann avek Minis, dan ka kot sa *grievance* i kont sa travayer etranze pa en travayer Seselwa, e li sa travayer etranze i lo en *GOP* li. I annan de ka kot i annan plis ki en *grievance* kont sa travayer etranze ki lo *GOP* - eski Departman Lanplwa i antre letan i annan sa *renewal*, son *GOP*?

E li sa dimoun eski i annan drwa al kot en lot lakonpannyen pou li kapab ganny abzorbe anba en lot *GOP*? Mersi.

MR SPEAKER

Mersi. Minis, ou a diriz ou *panel*. Yes, direkter zeneral ki pou pran.

DG FOR LABOUR RELATIONS STEVE MONNAIE

Mersi, Mr Speaker. Mersi, Onorab. Dan konteks kot en anplwaye in met en *case* kont en travayer etranze, si sa travayer etranze i ankor dan pei byensir prosedir swiv *grievance* tou le de parti i ganny envite. E *again* se anplwayer li i pa satisfè li i kapab al tribinal.

Me dan konteks kot *let's say* en travayer etranze in *abscond* in kit pei in ale prezan sa anplwayer li i pe *claim* serten notis ki sa travayer etranze ti drwa li, *basically* sa travayer pa dan pei. So, i pou napa okenn lezot personn pou li met sa *claim against*. Me si i annan lenformasyon ki sa travayer etranze in antre dan pei, i pe travay kot enn son konpetiter, i kapab fer en *grievance* kont sa travayer etranze.

E *again* raport ek Departman Imigrasyon ki sa travayer in *abscond*, i ti'n kit pei i drwa li notis e kekfwa i annan bann fo preteks pou li zis al travay kot en lot anplwayer. So, i annan sa bann mannigans ki arive kot ou trouv en travayer etranze i *abscond* i kit pei e sanmenm sa *most of the time* ou trouv bann anplwayer pa aras zot me i pran sa *passport* kit dan son posesyon ki mal.

Me selman nou ankouraz tou anplwayer fer sir ki zot bann rikord i annord. Zot rikord kontra, zot rikord *pay slip*, zot rikord peyman tousala i annord. Me selman parey ou'n demann ou kestyon, en anplwaye i kapab met en *case* kont en travayer etranze. E *the minute* ki i kit pei oubyen i annan sa lenformasyon, i enform Imigrasyon ki mon'n met en *case* kont en

anplwayer. E mon annan lenformasyon ki i anvizaze kit pei pou vin travay , antre avek en lot anplwayer. Mersi.

MR SPEAKER

Mersi, Direkter Zeneral.

HON REGINA ESPARON

En pti klarifikasyon Mr Speaker. Me si li sa travayer la i pe rod en *GOP* pou en lot lakonpannyen. Eski zot Minister Lanplwa zot annan en *say* ladan? Sirtou si i annan bokou *grievance* kont li ? Mersi.

MR SPEAKER

Yes, *DG*, si ou kapab reponn sa kourt *please*.

DG FOR LABOUR RELATIONS STEVE MONNAIE

Permet mwan klarifye Mr Speaker. Ler ou dir pou annan en *GOP*, konmsi en lot anplwayer pe rod en *GOP* pou sa travayer vin travay avek li ? Parey mon dir ou, nou *sorry* Mr Speaker - nou Minister Lanplwa, nou get sa *post*. *The minute* sa laplikasyon pou vin kot nou, nou pa pou konnen poudir sa anplwayer lentansyon pou fer vini sa travayer ki'n deza kit pei.

Me par kont si sa lenformasyon i ganny donneren avek nou, nou pou analiz sa laplikasyon ki sa lot anplwayer

in fer pou sa. En legzanp, en mason i sorti kot lakonpannyen *A* pou al travay kot lakonpannyen *B* - si nou annan lenformasyon ki li i pe arete kot lakonpannyen *A*, si in *resign* Lalwa Lanplwa i permet ou *resign* byen normal ou egzist pei e ou antre, ou antre anba en nouvo *GOP*.

Me si ou'n kite *without the proper notice, proper* notifikasyon e sa travayer i *feel* ki ou drwa mwan, sa anplwayer li i kapab ekrir Imigrasyon dir poudir mon ti annan en travayer kot mwan, i dwa mwan notis mon'n fer vini in travay zis 1 mwan, e mon annan en lenformasyon ki i pe vin travay kot en lot lakonpannyen.

So, a sa staz ki Minister Lanplwa pou napa non, nou pa konn sa dimoun nou. Nou pou annan zis en laplikasyon kot nou.

MR SPEAKER

Mersi. Mon a pran kestyon Onorab Roucou.

HON MICHEL ROUCOU

Mr Speaker, mersi. Annefe mon kestyon i al en pti pe dan laliny Onorab Esparon. Dan sir konstans kot sa travayer li petet i annan serten problem lo kote mantalite li menm li ki sa anplwayer i bezwen fer li ale apre ki'n ganny war poudir i

annan diferan keksoz ki pa pe mars normal ek li in *exit* pei li.

E lo sanmenm bann pwen parey Onorab Esparon in fer sorti, eski lanplwa pe mazin pou zot travay lo en keksoz pou fer sir ki demen sa travayer ki'n *exit* pei pou nenport ki rezon ki zot kapab annan e se lo la li menm li. Pou fer sir ki sa lot lakonpannyen ki pou pran li i pa war ki i pe repete dan bann menm sityasyon. Mersi.

MR SPEAKER

Mersi. Mersi, *PS*, wi, ase bref silvouple?

PS VERONIQUE BRESSON

Mersi, Mr Speaker. Mersi, Onorab. Mon pou vreman kourt. Onorab, si i annan okenn travayer ki'n travay dan Sesel, travayer etranze ki'n fer kel *misconduct* oubyen son kondwit pa ti bon pou sa anplwayer ler i ti Sesel, i devwar sa anplwayer pou li devwal sa lenformasyon avek Departman Imigrasyon.

Parey Mr Monnaie in eksplike, ler laplikasyon i vin kot nou i pa neseserman nou konnen lekel sa travayer etranze ki sa anplwayer pe pran pou met dan sa pozisyon. Sa lenformasyon i ganny devwale avek Departman Imigrasyon. Alors i annan kek sityasyon ki sa anplwayer li i santi sa travayer i pa dan en

kondwit pou li retourn ankor Sesel - sa lenformasyon zot bezwen donn avek Imigrasyon.

Imigrasyon ki fer *border control*, li ki pou deside si sa dimoun i *fit* pou li re antre dan pei oubyen non. Mersi.

MR SPEAKER

Mersi. Bon, sa in kourt mon a kapab pran kestyon Onorab Gill.

HON CHURCHILL GILL

Mersi, Mr Speaker. Zis en presizyon nou'n ganny dir par *panel* ki zot ankouraz bann landrwa travay pou kit bann dokiman annord bann kontra *GOP* annord. Dan lenstans kot sa i annord, apre i ariv en sityasyon kot en travayer etranze osi *entitle* son 7 zour pou li met son *grievance*.

Eski i annan Lalwa ki *supersede* sa travayer etranze pou li ganny deporte san ki i ganny sans met son *grievance*, eski i annan en Lalwa ki egziste ozordi pou sa? Mersi.

MR SPEAKER

Mersi *panel*. Yes DG?

DG FOR LABOUR RELATIONS STEVE MONNAIE

Mersi, Mr Speaker. Mersi, Onorab. Onorab, Lalwa i dir ki sa travayer Seselwa oubyen etranze apre ki i *become aware* i annan en *grievance* - mon

repete dan konteks terminasyon sa etranze i annan 7 zour. Dan konteks okenn lezot *grievance* son 14 zour i reste.

So, napa Lalwa ki dir koman ou'n fini ganny met en *grievance* ou sipoze ganny deporté oubyen non. Me Lalwa i dir ou annan en drwa koman en travayer si ou pe *focus* lo etranze, *the minute* ou met ou *grievance* kot Minister Lanplwa, Minister Lanplwa li parey nou fer dan tou prosedir, i pou donn ou en let ki konfirman ou'n anrezistre en *grievance* ek Departman Lanplwa.

Sa travayer i kapab prezant sa let li kot nenport ki lotorite oubyen antite ki deside al prezant sa let. So, ler sa *grievance* in ganny ekoute in - kekfwa *let's say* napa en lakor *between the 2* in fini li ek Departman Lanplwa. So, *from there on whether* i pou reste dan pei oubyen non, sa i en demann ki li i bezwen fer devan Departman Imigrasyon li ek son avoka.

Minister Lanplwa pa pou antre ladan li. Minister Lanplwa i ekout zis sa *grievance whether i settle* oubyen non, *outcome* i fini. Minister Lanplwa son responsabilite i aret la. Mersi.

MR SPEAKER

Mersi. Nou ava avans lo kestyon 74 Onorab Sandy Arissol.

HON SANDY ARISSOL

Mersi, Mr Speaker. Mersi, *panel* pou zot bann larepons. Mon lot kestyon Mr Speaker, i lir koumsa, eski Minis i kapab dir Lasanble si son Minister i satisfè ki tou travayer Seselwa in benefisyè a travè sa logmantasyon saler 10poursan e 7poursan nasyonanman? Mersi, Mr Speaker.

MR SPEAKER

Mersi, Onorab. Minis.

MINISTER PATRICIA FRANCAULT

Mersi, Mr Speaker. Mersi, Onorab. Mr Speaker, avan mon al direk lo larepons kestyon, mon anvi klarifye sa distenksyon dan logmantasyon saler ki tou travayer Servis Piblik ek travayer dan Sektè Prive. Si nou mazin byen an 2023, Gouvènman ki en anplwayer lo li menm ti anons en logmantasyon 10 poursan pou tou son bann travayer dan Servis Piblik ki ti pran lefe apartir le 1 Avril 2023.

Sa ti an rezilta revizyon lo *Public Service Salary Act*. 2an pli tar Gouvènman in osi enn fwa donn logmantasyon saler dan bann travayer dan Servis

Piblik. Sa ti ogmante par 7 pousan pou travayer ki ganny par anba R21,368 e R1500 pou bann ki zot saler i par lao, ki ti pran lefe apartir le 1 Avril 2025.

Dan tou lede ka, savedir an 2023 e sa lannen Gouvernman ti ankouraz Sekter Prive pou osi konsider donn en logmantasyon saler zot travayer. Kot i konsern spesifikman travayer dan Sekter Prive, Gouvernman ti propoz en logmantasyon dan *National Minimum Wage rate* par 7pousan.

Sa ti ganny anonse dan diskour Bidze pou lannen 2025. E i ti pran lefe apartir le 1 Avril 2025. Mr Speaker, a sa pwen mon oule konfirman ki Departman Lanplwa pa ankor resevwar konplent sorti kot travayer dan Sekter Prive, pou raporte ki zot kalifye, me pa'n ganny sa logmantasyon.

Me i annan ki'n kontakte nou pou rod klarifikasyon lo ki mannyer sa logmantasyon i devret marse. An mezir ki lenspekter i fer vizit dan diferan lorganizasyon travay, si zot detekte okenn saler ki pa anlany avek a nouvo minimonm *wage rate* ki'n pran lefe apartir le 1 Avril 2025, bann mezir i a ganny ranforsi pou asire ki sa anplwayer i aziste saler sa travayer e *pay back, backpay* si fodre.

Mr Speaker, antretan i enportan ki tou travayer i analiz byen zot *pay slips*. E raport okenn problemn konsernan zot lapey kot Departman Lanplwa. Mon pe lans en lapel ek tou travayer ek anplwayer dan Sekter Prive pou zot met zot a zour avek sa nouvo regilasyon.

E si zot santi zot bezwen plis lenformasyon ek leksplikasyon lo ki fason sa logmantasyon dan minimonm rate i afekte zot saler, pou pran kontak ek Departman Lanplwa. Mersi, Mr Speaker.

MR SPEAKER

Mersi, Minis. Nou a pran ou siplemanter Onorab Arissol.

HON SANDY ARISSOL

Mr Speaker, larepons ki Minis in donner pou mwan i an detay, in donn mwan tou a ki mon ti anvi demande dan kestyon siplemanter. So, mon pou napa okenn kestyon siplemanter. Mersi Minis, pou larepons.

MR SPEAKER

Mersi, Onorab. Onorab Pillay.

HON SEBASTIEN PILLAY

Mersi, Mr Speaker. Mr Speaker, Minis in reponn sa kestyon e in fer presizyon ki mon ti pou al demann lo la, aköz kestyon ti pe demann lo tou travayer. E Minis in fer sa

presizyon an sa ki konsern travayer Servis Piblik. Me prezan Minis, sa ki ou pa'n kapab adrese se, Gouvernman wi, i en anplwayer nou osi annan Sekter Prive.

Gouvernman pa kapab enpoz en logmantasyon dan Sekter Prive. E Gouvernman i bezwen kre kondisyon pou Sekter Prive kapab donn en logmantasyon. Ki ou Minister pe fer pou kre zisteman sa kondisyon pou ki Sekter Prive i li osi kapab dan en fason resiprok, savedir dan en fason parey.

I osi kapab donn en logmantasyon bann travayer ki dan Sekter Prive an relasyon ek sa logmantasyon ki zot pe koz lo la savedir sa 10 e 7poursan ki Gouvernman pe dir zot in donn 7poursan logmantasyon. E ler ou pe koz lo sa bann kondisyon ki'n kree, ki bann mezir ki ou Minister in diskit avek Departman Minister Finans ki la, nou *welcome* SS Payet parmi nou Mr Speaker.

Ki bann diskisyon ki zot in fer pou fer ki nou annan en lapros pou ed Sekter Prive zisteman kapab donn sa logmantasyon e non pa trangle Sekter Prive e avek *tax* e avek *lezot fees* e avek *lezot charges*. Me selman enspekte li kapab donn en logmantasyon son travayer? Mersi, Mr Speaker.

MR SPEAKER

Mersi. Minis, ou a reponn lo sa ki konsern ou Minister byensir. *PS, sorry* SS Payet pou pran laparol.

SS PATRICK PAYET

Mersi, Mr Speaker. E mersi, Onorab, pou ou kestyon. Bonn apre midi tou Manm a lekout e tou dimoun a lekout pou apre midi. Mr Speaker, kekfwa zis pou mwan komanse pou kekfwa ki mannyer letan nou ti pe travay lo logmantasyon saler minimonm, en pe lo bann diskisyon ki nou'n travay avek Departman Lanplwa e osi avek diskisyon apre ki nou'n ganny avek Sekter Prive.

Parey zot okouran ki i annan bokou analiz ki'n ganny fer pou vwar ki mannyer kapasite Sekter Prive pou kapab donn okenn logmantasyon. Akoz premyerman nou ti vwar ki dernyen logmantasyon saler minimonm ti fer an Zanvyé 2019, dernyen 2020 *sorry* 2020. Be nou ti realize ki letan dan tou sa lannen ki'n pase, nou'n vwar lenflasyon ki mannyer in ogmante.

E nou'n vwar sa presyon ki sa i pe anmennen lo sirtou bann travayer. E par egzanp letan nou ti pe analiz pou nou fer logmantasyon an 2023, nou ti vwar kekfwa kapasite Sekter Prive pa ti ankor pare.

Menm si li Gouvernman ti pe al avek son logmantasyon an 2023. Akoz ki letan nou ti fer sa analiz nou ti vwar ki *COVID*, pandemik *COVID-19* ti annan en lenpak lo Sekter Prive.

E kekfwa Sekter Prive ti osi zot ti pe pandan sa dernyen 2an 2022 ek 2023, zot ti'n rekomans etabli zot biznes. Me letan nou ti vwar krwasans an 2023 avek 2024, nou ti vwar kapasite Sekter Prive pou kapab donn sa logmantasyon. Me selman lo kote diskisyon akòz nou ti vwar ki par egzant si nou al zis lo kote lenflasyon, nou ti vwar ki vre i ti pou annan son lenpak signifikan lo Sekter Prive.

So, *this is why* Gouvernman pa ti al avek kekfwa si nou ti pou al avek sa lenflasyon pandan sa dernyen 5an. Si nou ti al avek dan son totalite, nou ti vwar sa i ti pou al avek son lenpak direkteman lo Sekter Biznes. E definitivman nou ti pou vwar a logmantasyon dan pri ki ti pou annan ankor son lenpak en direk lo bann travayer letan zot ti pou aste zot komodite.

So, *this is why* Gouvernman li i ti vin avek son propozisyon dan diskisyon e sa avek bann analiz ki Minister Finans in fer. nou ti er en propozisyon avek Departman Lanplwa pou nou vin avek en 7poursan dan logmantasyon dan saler

minimonm. So, sa i en pe analiz ki nou ti fer akòz nou ti regard li dan son totalite. Ki lenpak ki i annan dan lekonomi? E ki lenpak osi i annan dan lenflasyon letan si par egzant Gouvernman i donn en logmantasyon signifikan ki kapab ankor dan 6 mwan, ankor dan 12 mwan nou vwar son lenpak endirek. So, tousala i bann analiz ki nou'n fer.

Me letan par egzant kekfwa ki Onorab osi in demande kekfwa ki bann lezot kondisyon ki nou'n vwar ozordi. Nou'n vwar ki i annan en pe bann *incentive* ki par egzant letan ou regard lo kote taksasyon. Sirtou bann nou biznes ki pe ganny kree, i annan bann striktir bann *incentives* taksasyon ki Gouvernman in met an plas. I annan bann lezot ki Gouvernman pe travay lo la par egzant lo kote *income tax*.

Income tax i en keksoz ki Gouvernman osi in fini anonse ki nou pe travay li dan son totalite. Lannen pase dan Bidze nou ti redwir *income tax* lo Benefis Monneter sorti 20 poursan pou ariv 15poursan.

So, i annan bann lezot *incentive* ki Gouvernman in met an plas ki nou'n vwar ki definitivman Sekter Prive i kapab fer sa logmantasyon dan saler minimonm. So, kekfwa dan *summary* Mr

Chair, sa mon anvi kontribye.
Mersi.

MR SPEAKER

Mersi. Mersi, SS. Bon nou pre pou fini letan. Mon a termin avek kestyon Onorab Gill.

HON CHURCHILL GILL

Mersi, Mr Speaker. Nou'n ganny 2 leksplikasyon avek *panel*. Avek Minis nou'n ganny dir ki travayer pa ankor vin devan avek pou raporte poudir be zot pa ankor ganny logmantasyon. Apre SS in dir nou ki bann *incentives* zot in travay lo en pe.

Mon kestyon se, ki bann endikater ki Minister Finans ti *assess* pou desid lo *incentive*. E kote Minister, eski Minis zot annan en program ki zot, zot inisye vi ki zot ganny *establishment list* sorti kot tou bann landrwa travay pou zot, zot menm rod sa lenformasyon lekel bann landrwa ki'n komans donnen; lekel ki pa ankor donnen, ki rezon pa ankor donnen.

E pou Minis Finans kan ki zot pou revwar sa bann endikater, aköz sirman i bezwen ganny *reassessed*. Ou ti pe fer sa 2023, be la sityasyon definitivman i pa parey. So, kan ki zot annan nide *reassessed* pou finalman sa bann dimoun kapab ganny en keksoz si i annan sa posibilite pou zot benefisye?

MR SPEAKER

Mersi. *Well*, nou pe kestyonn Minister Lanplwa dan sa soz. Minis, mon a les ou ek ou *panel* lib pou zize ki lenformasyon zot kapab donnen ki relevan. E vi ki SS Payet i la, mon asire son kontribisyon i ava valab. Minis, diriz ou *panel* silvouple.

MINISTER **PATRICIA**
FRANCOURT

Mersi, Mr Speaker. Mon a pran zis sa bout Onorab ki ou'n demande ki mannyer *the fact* ki nou annan *establishment list* ki mannyer nou *monitor* sa. Nou'n fer ase *sensitization* lo la parey mon dir lo televizyon, lo nou *social media page* pou *educate* dimoun lo zot drwa e *how they come forward*.

Parey mon'n dir dan mon larepons *so far* nou'n ganny zis kestyon klarifikasyon. Letan ou pe koz 15mil biznes i pa pou zanmen fasil pou nou al rod sa lenformasyon. Se sa ki nou fer sa lapel, sa bann dimoun zot *come forward*. E mon fer sa lapel ankor ozordi *they have to come forward*. Se sa ki mon'n dir.

Regard zot *pay slip*, regarde si sa increase i ladan. *They have to come to us and we will take the case forward*. 15 biznes avek sa mende ki nou annan i pa pou posib.

Mersi. Mr Speaker, si SS i kapab pran sa lot konponan. Mersi.

MR SPEAKER

SS, ou a kapab elabore?

SS PATRICK PAYET

Mersi, Mr Speaker. Mersi, Onorab. Pou nou *every quarter* nou fer analiz spesifikman lo kote bann endikater ekonomik, pou nou vwar par egzanp bann Polisi ki Gouvènmman pe enplimante. E ki manner sa pe evolye dan lekonomi.

So tou le kar, me selman nou bann piblikasyon ki nou fer *specific*, nou fer sir ki letan nou pe prepar Bidze nou fer sir ki dan sa bann endikater ekonomi i enkli dan dokiman Bidze. Nou fer *the whole assessment* e osi dan *Mid-year Review*. So, dan *Mid-Year Review* nou pou prodwir en rapor ki pou vwar pandan premye 6 mwan ouswa menm konpare avek lannen pase ki manner sa bann endikater ekonomik.

Me lo kote bann lezot *incentives* sa definitivman Gouvènmman pe kontinyen travay pou war pou *link* li avek *National Development Strategy*. Akoz nou anvi vwar sa *link* ki bann lezot sekter ki nou anvi li devlope, e vwar sa *link*. En keksoz ki byento nou pe al komans konsiltasyon se

sa reform ki nou pe fer lo *income tax*.

So, aktyelman *staff* i ankor pe fer zot bann *desk review* pe travay lo la. Me selman tre prosennman *hopefully* dan mwan Zen, nou pou komans diskisyon avek bann biznes e osi avek bann travayer. Mersi.

MR SPEAKER

Mersi, SS. Bon, nou a termin la pou sesyon kestyon ozordi. Mon remersi Minis e son bann zofisye pou zot partisipasyon. Byensir mersi bann Manm pou zot kestyon. Nou'n al en pe pli long ki labitid, me mon ti santi poudir ti annan en kantite size enportan ki ti pe leve. E nou'n profit lokazyon. Bon depar e bonn kontinyasyon tous. Lasanble i a pran poz e nou a rebran 2er edmi. Mersi.

(BREAK)

MR SPEAKER

Bonn apre midi tou dimoun pou kontinyasyon nou travay pou ozordi. e lo *Order Paper* nou annan en *statement* lo *FIFA Beach Soccer World Cup*. E sa pou ganny fer par Mrs Marie-Celine Zialor, Minis pou Lazenés, Spor e Lafanmir. Madanm raporter i ava apel Minis e son delegasyon pou antre silvouple.

Bonn apre midi Minis Marie-Celine Zialor, Minis pou Lazenés, Spor e Lafanmir. Bonn apre midi Mr Ralph Jean-Louis Sekreter Prensipal pou Lazenés e Spor. E mersi pou zwenn nou apre midi. Minis, ou *welcome* pou *statement*. Minis, ou annan laparol pou *statement*.

MINISTER MARIE-CELINE ZIALOR

Mersi, Mr Speaker. Mr Speaker, bonn apre midi. Bonn apre midi le 2 *Leader* dan Lasanble. Bonn apre midi tou Manm Onorab. Bonn apre midi tou bann dimoun ki a lekout.

Mr Speaker, ant le 1 ziska le 11 Me, 2025 Sesel in fer listwar. Nou'n vin premye pei dan Lafrik pou organiz en tournwa *Beach Soccer*. Mr Speaker, koman enn parmi bann pli pti pei dan lemonn, nou pa'n per pou antreprann en tel proze. Annefe i fer dezyenm fwa ki sa Ladministrasyon i organiz en tournwa mondyal apre final *Open Water Junior Championship*.

Federasyon Foutbol Sesel ti anmenn sizesyon devan Gouvernman an 2023, pou Sesel prezant son kandida pou organiz tournwa *Beach Soccer* an 2025. Byensir Gouvernman in bezwen analiz merit en tel proze, e konpran

ki rol Gouvernman ladan. In pran bokou travay par plizyer Minister pou prepar bann dokiman pou soumet avek *FIFA* pou ki Sesel i ganny konsidere.

Pre ganny swazi nou parkour in ranpli avek bokou defi. Me nou pa'n les sa bann defi vin en baryer. Sesel in delivre en tournwa manifik. E mon krwar sa lakonplisman i merit vin en legzanp pou pei an antye. Alors, se sa rezon Mr Speaker, ki mon la ozordi dan Lasanble pou fer detrwa analiz lo sa tournwa.

Mr Speaker, premyerman mon anvi rekonnet e felisit Lepep Seselwa an antye pandan....

(APPLAUSE)

MINISTER MARIE-CELINE ZIALOR

...pandan 11 zour, nou'n vwar vre patriyotizm Seselwa. Zot in byensir siport Lekip Sesel dan en fason ekstraordiner. Me zot in osi siport tou lekip pou montre vre lospitalite Seselwa, e zot in desann nonbre dan *fan zone* pou met en bon lanbyans. E zot in osi fer tousala dan lape.

Zot sipor in mark nou tou, sirtou *FIFA* ek bann lekip ki ankore pe koz lanbyans ki piblik Seselwa in mete pandan sa tournwa. Alors, mon dir ankore bravo pep Seselwa. Sa i

laprev ki sport i en zouti pwisan ki ini en pep. E osi ki sport i kapab ganny servi pou fer bann transformasyon pozitiv dan lasosyete.

Nou swe koman Minister alor, se pou vwar tou zanf an angaz li dan omwen en aktivite sport. E mon konnen ki Lepep Seselwa pou siport nou dan sa bann demars.

Dezyenmman Mr Speaker, nou'n sirpas lekspektasyon Seselwa, lekspektasyon FIFA e kominote beach soccer.

Ozordi nou'n ganny enformen par direkter bann zwe Beach Soccer FIFA Mr Jaime Yarza, ki sa edisyon Beach Soccer World Cup 2025 Sesel i pli meyer ki tou sa bann lezot edisyon ki'n ganny fer oparavan. Depi kalite lenfrastruktir ki lo en tre o standar, kalite disab dan arena. E la mon bezwen eksplik en pti gin ki depi sa disab ti ganny teste dan laboratwar Canada, rezilta ti montre ki i meyer disab ki zot in deza teste pou en Tournwa Beach Soccer.

E tou lekip in fer resorti ki sa disab i pli bon disab ki zot in deza zwe lo la, sirtou aköz napa lapousyer avek. lorganizasyon Komite Lokal sa ki nou apel LOC, in ganny felisite pou sa kalite lorganizasyon ki in fer. Langazman bann volonter in

vreman ganny apresye, e la osi mon pou dir en pti parol.

I annan bann lezot pei kot FIFA in fer Beach Soccer Mr Speaker, e bann volonter in zis vin sers lenz, vin sers en sak apre zot pa'n vini pa bann Seselwa. Seselwa in vin travay toulezour. E lakantite tiket e marsandiz ki'n vann, in depas tou lekspektasyon. E zis premye zour le 1 Me, lakantite marsandiz ki'n vann Mr Speaker, in plis ki en tournwa antye ki ti fer Dubai lannen pase.

E lanbyans e latmosfer dan stad e dan fan zone, parey mon'n dir mon krwar in mark nou tou. E byensir lospitalite Seselwa in grave dan memwar tou bann etranze ki ti prezan. Mr Speaker, nou'n osi vwar lakantite vizibilite ki Sesel in gannyen aletranz. E sa in osi depas lekspektasyon Departman Tourizm.

Trwazyenmman Mr Speaker, nou'n demontre ki Seselwa i kapab travay ansanm pou delivre proze lo en nivo mondyal de kalite. E osi fer li dan en kour dele letan. Mr Speaker, mon oule salye determinasyon ek disiplin sa lekip ki'n travay san ses pou asire ki nou annan en stad a tan pou deroulman tournwa.

Malgre bokou defi, in en zefor kolektif en tim dimoun ki'n sirpas tou lekspektasyon.

Zot in menm kas rikord *Dubai*. Sa menm stad *Dubai* ti ganny met ansanm 25 zour. Me nou bann lakonpannyen Sesel, ti met sa stad debout dan 23 zour. Sesel i annan en lenfrastriktir *Beach Soccer World Class* ozordi ki pou dire pou 50,an, gras a zot.

Mon katriyenm analiz, i lo Tim Sesel ki'n pran par dan sa tournwa Mr Speaker. Avek tou sa defi ki zot in fer fas avek, zot in depans lekspektasyon tou Seselwa e menm *FIFA* ek son lantouraz. Zot in montre ki zot kapab frot zepol avek bann tim mondyal ki annan zwer profesyonnel.

Pou en tim ki pa'n zwe *match* kalifikasyon, e pou zot premye partisipasyon zot in kapab tenir en tim parey *Belarus* ki li in ariv dan final. Mr Speaker, mon tir mon sapo ek zot mon dir zot bravo !

(APPLAUSE)

MINISTER MARIE-CELINE ZIALOR

Zot in fer Sesel fyer. Zot lakonplisman i montre determinasyon, disiplin, sakrifis e talan. E laprev ki atlet Seselwa i annan abilite pou fer konpetisyon tre o nivo. Dan sa tournwa nou zenn zwer Digwa Lienal Bibi i pli zenn zwer ki'n *score* dan sa tournwa mondyal pa'n met zis 1 *goal* - 2 *goal*!

Mr Speaker, Lienal i annan selman 16 an. Sa i en lesen e osi levidans pou pa zis *beach soccer*. Me pou tou larestan disiplin sportif sirtou tou bann lasosyasyon ek federasyon. Annou pa per, pa ezite pou investir plis dan nou bann zenn atlet. Pou bann atlet dan lezot fanmir, sa i laprev ki disiplin ek sakrifis i anmenn rezilta.

Pou bann lantrepriz ek endividi ki siport *sport* i vo lapenn investir dan nou bann atlet. Se pou sa rezon ki nou dan Minister Lazenés, Spor ek Lafanmir nou kontinyen investir sirtou dan nou bann lenfrastriktir sportif. Mon ti ava kontan avan terminen Mr Speaker, remersye tou dimoun ki'n form parti sa lavantir, sa lenvestisman ek sa lakonplisman.

Premyerman, mon pou pran en pti moman pou mwan remersye Prezidan Larepublik, Prezidan Ramkalawan, ki depi komansman sa parkour pou nou kapab *bid* pou nou ganny sa tournwa e apre pou tournwa fer Sesel e avek sitan sikse ki mon'n mansyonnen se li sa dimoun kle par deryer.

(APPLAUSE)

MINISTER MARIE-CELINE ZIALOR

E mon pe dir sa aköz parfwa nou bliye dir mersi. E mon

vwar li pe remersi tou dimoun Mr Speaker. Menm mwan mon pa'n dan pei letan mon vini mon war en sertifika in arive avek en *shield* ki pe remersye. Me mon kontan dan fason ki mannyer Tim Brazil ki ganyan tournwa in remersye li par donn li la, la en Meday Lor.

En meday Zwe Mondyal, ki in gannyen e...

(APPLAUSE)

MINISTER MARIE-CELINE ZIALOR

... mon'n demann li prete, in dir mwan fer sir mon troun avek son meday. (*chuckle*) wi, me selman i montre menm bann lekip bann tim, si ou vwar en lekip i pran enn son Meday Lor ki in gannyen dan Tournwa Mondyal i donn en dimoun, sa Mr Speaker i pa en pti keksoz. E mon krwar en pli bon fason pou nou osi rekonpans li aköz sa kantite travay ki in fer pou nou kapab fer sa tournwa.

Mon osi annan mo remersiman pou tou Minister ek zot bann lazans pou sipòrt sa tournwa, sirtou dan sa peryod avan tournwa i deroule. Mersi pou tou bann Manm Komite Organizasyon LOC, ki pa'n dormi pou fer sir ki tou i mars byen. Mersi bokou pou tou bann *sponsors*, nou vreman apresye zot zenerozite e zot patriyotizm.

Mersi pou Tim Sesel e zot bann lantouraz. Zot in fer nou reve, zot in fer nou eksite, zot in fer nou krwar dan abilite en pti pei. En gro mersi pou tou bann volonter. Mersi pou zot langazman senser e zot zenerozite. E ankòr enn fwa, mersi bokou tou piblik pou desann e montre kapasite nou nasyon ki mon krwar i en legzanp pa zis pou Lafrik Mr Speaker, me pou lemonn.

Pou terminen mon senserman krwar Mr Speaker, ki sa lenvestisman ki nou Gouvernman e pei in fer pou *Beach Soccer World Cup* in vreman vo lapenn. E ki i pou aport bokou plis fri a lavenir. E mon asire Mr Speaker, ler mon asize la mon tre fyer ki mwan, mon'n form parti sa lekip, sa ladministrasyon ki'n fer listwar dan Sesel. E ki Bondye i kontinyen beni nou pei ! Mersi.

(APPLAUSE)

MR SPEAKER

Mersi, Minis, pou ou *statement*. Pou permet petet zofisye ki avek Minis partisip dan kestyon, nou a pas dan Staz Komite direktman. Lasal i ouver pou kestyon oubyen komantr bann Manm. Mon annan en lalis deza. Mon a komans avek Onorab Esparon.

HON REGINA ESPARON

Mersi, Mr Chairman. Bonn apre midi Minis avek *PS Jean-Louis*. Mr Chair, mwan mon ti a kontan komanse par felisit Gouvernman Sesel Prezidan Ramkalawan, Minis, ou menm ou avek sa lekip ki'n par deryer ou pou organiz sa *beach soccer*. Avan ki mon demann mon kestyon mon ti a osi kontan felisit 2 zwer *beach soccer* ki sorti dan distrik Glacis sa Remy De Katelaere e Damien Adela ki ti *goal keep*, Remy ti sa garson ki ti met sa premye *goal*. E Damien i *goal keep*.

E nou osi annan – nou annan Dominic Bouchereau ki ti en zanfan Glacis. Me selman pou le moman in *move* Anse Etoile. E nou ti ganny sans ek Lotorite Distrik pou nou onor zot, an menm tan pou montre lapresyasyon ki distrik osi ti annan pou sa performans ki zot in fer. Mon kestyon Minis se ki plan a lavenir ki *NSC* i annan pou *Beach Soccer* Sesel? E ki nou pe mazine pou ki kalite *training* nou pe mazine pou donn sa lekip ki'n fer Sesel fyer pou bouz zot lo en lot nivo? Mersi.

MR SPEAKER

Mersi, Onorab. Minis, ou repons pou kestyon.

MINISTER MARIE-CELINE ZIALOR

Mersi, Mr Speaker. Mersi, Onorab, pou ou bann mo lankourazman. Definitivman mon krwar vi ki nou'n vwar ki *Beach Soccer* bann Sesel i annan en latitud, zot fer byen nou pou bezwen met lanfaz. Nou annan lenfrastruktir la, prezan i pou depan diskisyon avek Federasyon Foutbol aköz i pou depan en kantite lo zot pou nou kapab met en program an plas, pou nou fer *beach soccer* vin sa spor ki Seselwa i kapab al pli lwen ladan.

E tim definitivman nou'n komans koze ek *management team*, dek koman tournwa pa ti ankor fini - annefe komans fini pou nou vwar, pou nou rode ki lot konpetisyon nou pou bezwen met sa bann zwer ladan, kit zot ansanm e apre tou pou annan larelev pou ki nou komanse depi dan lekol, annan *league* - en *league* pou *beach soccer*. Mersi, Mr Speaker.

MR SPEAKER

Mersi, Minis. Onorab Romain.

HON GEORGES ROMAIN

Mersi, Mr Chair. Minis, bonzour avek *PS Jean-Louis*. Minis, mon osi mon pa pou kapab aköz i en *sport* ki mon'n ganny sans partisip bokou, vin get bokou *game* ek mon fanmir. Sak fwa mon'n vini, siperb. Mon pa kapab dir mon

pa'n war naryen mal. E pou sa mon pou zwenn mon koleg Onorab Esparon. Felisitasyon Gouvernman Sesel e tou dimoun ki'n par deryer sa *sport*.

E mon kapab dir *openly* ozordi mon vreman, vreman fyer pou dir mon en Seselwa. Ler mon'n regarde ki sa lanpler sa alaoter ki sa i vreman fer mwan fyer ! Mersi Minis. Mon kestyon i vin koumsa Minis; anvi ki sa *sport* in vin ki parey ou'n dir ou menm parey nou tou nou konnen in vin in sorti vreman alaoter vreman o.

Sa fasilite i la, ki Minis pe mazine dan lavenir ki bann kalite lezot sport ki nou kapab fer lo sa dan sa *stadium*, ki nou Seselwa nou a ganny sans ankor desann pou nou sipor byensir si i annan Seselwa pe partisip ladan pou nou donn nou sipor.

E mon dezyenm kestyon Minis, sa enn kestyon in ganny touse en pti pe semenn pase dan Lasanble. Anvi ki sa *sport* li menm li in *involved* bokou, bokou dimoun lozistik ti vreman bokou, sekirite kot bann dimoun pe vann bann keksoz, mon pa pou al an detay. Byensir ti bezwen annan bann kontra ki ti bezwen ganny fer avek bann diferan biznes bann dimoun ki ti pe partisip dan sa bann travay.

E alors Minis mon kestyon, ki mannyer sa bann kontra in vini; eski in vin atraver Gouvernman Sesel oubyen atraver *FIFA*? Anvi ki nou'n tandé ki Gouvernman Sesel menm ti annan en zafer en *case* Ankour kot i annan en fiy ki'n met Gouvernman konpansasyon zafer R2milyon. Alor Minis, donn nou en pti pe leksplikasyon lo la silvouple. Mersi Mr Chair.

MR SPEAKER

Mersi, Onorab. Minis ou repons *please*.

MINISTER MARIE-CELINE ZIALOR

Mersi, Mr Speaker. Mon pou pran sa dezyenm kestyon apre avek ou permisyon PS Jean-Louis i ava pran sa enn premye. Kot i konsern kontra napa Gouvernman pa'n donn kontra pou *beach soccer*. I annan en *Local Organizing Committee (LOC)* ki annan zot lakonpannyen separe, ki annan zot striktir.

Kontra in fer avek *Local Organizing Committee*. E *FIFA* son bann kontra osi *FIFA* in fer avek *FIFA*, i pa'n fer avek Gouvernman. Gouvernman MOU Gouvernman in sinyen. Se avek *Local Organizing Committee* parey nou ti fer apre sa *certificate* sorti kot *Planning* pou nou donn *Local Organizing Committee* parey

nou sipoze pe fer. E regard osi tou lo kote finansman kontribisyon Gouvènmman pou li kapab donn *Local Organizing Committee* pou fer apre ki bann *asset* ensidswit i retourn kot Gouvènmman.

Me kontra pou biznes, Gouvènmman pa'n donn okenn kontra. Mersi, Mr Speaker. Avek ou permisyon PS Jean-Louis a reponn premye kestasyon.

MR SPEAKER

Mersi. PS Jean-Louis, ou annan laparol.

PS RALPH JEAN-LOUIS

Mersi, Mr Chair. Bonn apre midi Mr Chair. Bonn apre midi tou Manm Onorab. Onorab lo ou kestasyon ki pou arive avek *stadium*, ki bann plan? Mon krwar i annan en gran, gran lentere dan sa *stadium*, akòz preske toulezour ou ganny en *call*. Sa bann ki anvi fer louvertir premye *show* mizikal. I annan ki anvi fer bokse, i annan ki anvi fer diferan aktivite.

E i osi annan koze pou en lot konpetisyon petet *Beach Soccer* COSAFA oubyen AFCON. So, i annan en kantite lentere ladan e i zis en kestasyon *manage* li, ki mannyer nou kapab *manage* sa bann lekspektasyon. E osi fer sir ki tou bann keksoz i ganny fer byen. E nou fer maksimòm

use of sa fasilite ki'n ganny konstri, e ki tou dimoun i a kapab benefisye. E diferan *sport* i kapab ganny pratike dan sa *venue*. Mersi.

MR SPEAKER

Mersi, PS. Onorab Mondon?

HON TERENCE MONDON

Mersi, Mr Chair. Mr Chair, mwan osi mon oule profite pou felisit Mike ek Rondy, 2 kouzen - 2 zenn Takamaka ki'n fer Sesel fyer dan sa tournwa. Minis, mon konnen ki sa tournwa pou anmenn benefis ekonomik pou Sesel. E petet eski ou kapab dir nou ki fason ki sa tournwa pou kapab ranforsi devlopman spor dan Sesel? E ki plan Zot annan pou *empower* lazenes Seselwa atraver *sport*? Mersi.

MR SPEAKER

Mersi, Onorab. Minis, ou repons.

MINISTER PATRICIA FRANCAULT

Mersi, Mr Speaker. Pou ranforsi devlopman *sport* i deza annan en plan. I annan plan kot departman, apre i annan plan kot NSC. E Mr Speaker, petet bann detay lo la akòz mon pe vin Lasanble, mon pe vin reponn kestasyon oral semenn prosenn, nou kapab pran bann keksoz spesifik lo la.

Me konsernan sa *stadium* li menm, *PS* in komans eksplike in dir pou dir definitivman nou pou bezwen revwar sirtou bann disiplin. Parey la nou'n vwar poudir Seselwa i fer byen *beach soccer*. Nou bezwen pe fer sa bann letid, sanmenm sa ki nou bezwen ranforsi sa ki nou apel *sport science*, *sport* lasyans, *sport medicine* pou nou kapab mezir byen nou bann atlet vwar lekel sa bann disiplin ki zot fer bokou pli byen.

E prezan met resours en pe plis ladan. E pous zot en pti pe plis lo high level pou nou kapab fer e revwar osi lekel bann konpetisyon ki nou pa zis pe al fer aletranze me selman nou'n vwar la Seselwa nou kapab fer tournwa lo sa nivo. E nou bann piblik i apresye pou nou kapab osi tou - prezan la nou annan leksperyans pou nou kapab ale pou nou al *bid* pou bann diferan konpetisyon ki annan.

Akoz sa *arena* i pa zi foutbol, tou *beach sport* ou kapab fer dan sa *arena*. E larestan *sport* osi ou kapab, e nou annan en dimoun *FIFA* la ki pe ed nou avek sa teknolozi pou vwar ki mannyer ou kapab kouver sa disab e fer larestan.

Par egzanp mon a donn ou en legzanp *Basketball* 3 kont 3 i enn parmi nou'n vwar

ki nou bann Seselwa in fer byen. E mon krwar osi ou kapab zve dan en *arena* letan ou'n kouver li.

Me sa i bann benefis ki nou bezwen eksplote. E byensir avek *sports* tourizm ansanm avek Departman Tourizm kot nou pe komans eksplote. I annan en pe travay ki pe ganny fer en pe letan nou'n komanse pou komans met sa. Dayer, sa i ti en proze ansanm avek Departman Tourizm kot *sport tourism*.

Kot zot pe evalye prezan pe regarde ki bann retonbe parey nou dir ki sa bann benefis ki pe anmennen, pou kalkil li byen. E pou nou kapab fer bon plan *sport tourism*. Me selman osi bann lo kote *sport* o nivo pou nou kapab bouze, e bouz li ansanm avek devlopman.

Savedir si nou ep mazin pou nou al ver *Beach Soccer World Cup* pou al fer parey *Tahiti* ti kalifye, nou bezwen komans dan lekol e komans fer bann program. E la nou napa zis *arena* nou annan 3 *training pitch* ki enn Anse Royale, enn Beau Vallon, enn la Roche Caiman ki desantralize. Nou pou bezwen kalkil definitivman Praslin ek La Digue pou nou desantralize pou nou kapab fer ki nou bann zanfann lekel fiy koman garson tou lede pou zot kapab Mr

Speaker, pratik sa *sport*.
Mersi.

MR SPEAKER

Thank you, Minister. Onorab
Andre?

HON CLIFFORD ANDRE

Thank you, Mr Chair. Mersi Mr
Chair. Bonn apre midi Minis
avek *PS*. Minis i tre regretab ki
mon pa'n ganny loportinite
pou mwan la pou mwan *attend*
bann *games*. Me mon ti annan
en lot keksoz ki mon ti pe fer
aletranze. Me mon osi kontan
ki le 12 Me, mon ti ganny sans
zwenn *Portugal* avek *Brazil* ki
sanpyon sa tournwa lo sa
avyon ki mon ti pe deplas lo la
ki mon konnen ou ti lo la avek
Minis Radegonde osi ki ti lo la
ki mon ti ganny sans koz avek.

Minis, mwan mon ti a
kontan demande, letan nou
get annefe felisitasyon avan
mon kontinyen pou tou
dimoun ki'n partisip ki'n fer sa
vin en sikse, ou, Prezidan, pep
Seselwa. Annefe mwan mon
pou dir Gouvernman *LDS*,
akoz Gouvernman *LDS* ki o
pouvwar. So, felisitasyon
Gouvernman *LDS*.

(APPLAUSE)

HON CLIFFORD ANDRE

Mon ti a kontan demande vi sa
sikse ki nou'n fer, eski nou pe
mazin pou nou met *bid* pou
lezot kalite *sport*. Pa

konpetisyon dan *beach soccer*,
mon pe dir lezot kalite *sport*.
Mon'n tann ou nonm en pti pe
3 kont 3 *basketball* ki mon
konnen poudir vreman nou
annan kapasite ladan.

Eski nou pe get bann
konpetisyon ki i annan kot
nou akoz i pa zis ozordi pou
ozordi ki sa konpetisyon in
ganny fer, i detrwa lannen
davans ki zot donn ou. I annan
serten kriter ki nou bezwen
meet. Eski nou koman en pei
nou pe eksplor sa bann lezot -
pa konpetisyon a bann lezot
sport pou nou kapab komans
met nou *bid* ki nou a kapab
ganny lasistans, pou nou
kapab fer sa bann *sport*. E ki
Sesel ankor enn fwa i a sorti
venker. E Gouvernman *LDS*
nou a kit li lanmenm. Mersi,
Mr Speaker.

MR SPEAKER

Mersi.

**MINISTER MARIE-CELINE
ZIALOR**

Mersi, Mr Speaker. Zisteman
sa bann demars i pe ganny fer
par Biro *Youth and Sports*. *PS*,
i la i ava kapab reponn avek ou
gidans Mr Speaker.

PS RALPH JEAN-LOUIS

Mersi, Mr Chair. Mersi,
Onorab, pou ou kestyon. Ofet
Onorab sa i enn bann
diskisyon ki nou ti annan dan

nou dernyen *meeting*. Parey ou'n dir korekteman i pa komans ozordi, ou bezwen pran en pe letan si oule en *bid* ankor dan 5 an ou bezwen komans ozordi.

So sa bann diskisyon ki'n annan, in annan en lalis bann ki'n *tentative* ki'n ganny propoze ki nou kapab fer *beach volley*, diferan. So, la prezan i pou depan lo NSC ek sa bann federasyon pou agree si vreman nou al dan sa direksyon.

Me selman sa diskisyon in komanse, i annan bann diferan konpetisyon enternasyonal o nivo ki'n ganny *earmarked*. E nou bezwen finalize lekel ki nou tay deryer, oubyen lekel ki nou priyorite nou anvi fer Sesel nou anvi *bid* pou nou gannyen pou host Sesel. Mersi.

MR SPEAKER

Mersi, PS. Onorab Uranie.

HON ROCKY URANIE

Mersi, Mr Speaker. Bonn apre midi tou koleg Onorab, e bonn apre midi panel. Annefe mon osi mon pou felisit tou Seselwa ki'n desann aköz nou patriyotik...

(APPLAUSE)

HON ROCKY URANIE

Pou vin donn en sipor Sesel dan sa *beach soccer*. E osi nou

felisit tou bann zwer ki'n performen, e osi mon pti kouzen Lienal Bibi ki'n kapab met 2 gol. E mwan mon ti eksite, mon ti *call* son papa sak fwa i ti met gol e nou ti montre nou lapresyasyon.

(APPLAUSE)

HON ROCKY URANIE

E la Mr Speaker, pou lenformasyon si ou permet mwan bann zenn foutboler Digwa nou annan en Komite ki'n formen. Nou pe sey kre en tim pou *beach soccer* La Digue. Sa dimoun ki zot bezwen kontakte, i Yelvanny Rose, pou bann zenn ki pe ekout mwan. Minis, mon kestyon se ki nou'n vwar performans bann zwer, zot in zwe nou'n siport zot.

Nou'n war bann zwer ki'n zwe *11-a-Side* pe zwe *beach soccer*. E anvi ki Sesel nou'n vwar en kantite zwer, i annan detrwa tim ki zwe *beach soccer*. Prezan mon pe rode pou ki rezon ki nou ti bezwen pran bann zwer dan *11-a-Side* pou fer zwe *beach soccer*. Eski i annan en problem ek bann zwer ki ti pe zwe *beach soccer* zot pa'n oule partisipe? Oubyen si i annan okenn problem les nou konnen.

E eski sa pratik pou kontinyen. Eski prezan nou pou kontinyen avek sa pratik

pran zwer dan 11-a-Side pou zwe *beach soccer*? Mersi.

MR SPEAKER

Thank you, Onorab. Minis, ou larepons.

MINISTER MARIE-CELINE ZIALOR

Wi. Mon pou pran en bout. Mersi, Mr Speaker. Mersi, Onorab, pou ou kestyon. Mon pou pran en bout sa kestyon apre *PS* i ava reponn larestan. Zis pou fer konpran ki seleksyon Tim Sesel pa nou, pa Gouvernman.

Seleksyon Tim Sesel i Federasyon Foutbol i apwent *coach* avek in apwent en *management team*. E nou, nou'n siport zot e tou zot desizyon lo ki mannyer zot fer avek apwentman ki met zot swazir kriter pou swazir lekel zwer ki zwe.

Sa nou'n les zot nou pa'n enterfer ditou dan zot seleksyonman, ki mannyer pou fer. Me selman mon krwar *PS*, kekfw a i annan en pe lenformasyon lo ki mannyer sa in ganny fer i ava pran sa kestyon. Mersi, Mr Speaker.

MR SPEAKER

Mersi, Minis. *PS*, ou annan laparol.

PS RALPH JEAN-LOUIS

Mersi, Mr Chair. Mersi, Onorab, pou ou kestyon.

Lienal pa zis fanmir Onorab, i fanmir *PS* tou en kote manman pa bliye. Onorab, vremen i annan en pe difikilte lo sa size. Menm *volleyball* i annan sa problem si ou kapab realize. I annan bann ki zwe *volleyball* normal ki nou dir 6 kont 6. I annan ki zwe *beach volleyball* menm dimoun ou vwar pe fer tou lede *sports*.

So, *beach soccer* i en pe parey difikilte ki zot annan. Sa i en kestyon regilasyon ki federasyon i annan an plas. Si federasyon i permet, nou pa pou kapab dir naryen. Sa i en regilasyon ki federasyon ki kapab kontrole, *ok*? Si oule al en pti pe pli lwen lo kote sa lekip, i annan bann mon krwar ou realize poudir Lienal i enn bann ki ti ganny swazir dernyen er, *deadline day* ki ti antre dan lekip aköz ti annan bann ki ti'n kit lekip pou diferan rezon, *ok*.

E ler zot in antre zot in pran bann zwer, sa bann ki ti pe zwe 11 kont 11 in antre dan lekip. Sa i en desizyon *coach*, e nou, nou pa kapab antre ladan. E li in deside poudir i war poudir sa enn i annan potansyel. E mon krwar in fer zistis son seleksyon Brandon Labrosse i enn ki mon krwar nou pe koz lo la, in fer zistis son seleksyon. E parey mon pe dir sa i en *issue* federasyon dan son regilasyon si i permet

pou fer tou lede oubyen ou fer zis enn. Mersi, Mr Speaker.

MR SPEAKER

Mersi, PS. Onorab Roucou.

HON MICHEL ROUCOU

Mr Speaker, bonn apre midi mersi pou donn mwan laparol. Minis, PS bonn apre midi. Bonn apre midi tou dimoun ki pe ekout nou. Minis, Mont Fleuri i enn bann sanpyon dan *Beach Football* aköz nou annan nou 2 tim ki pe fer vreman byen. E mon konnen poudir dan Tim Nasyonal ti annan 2 zwer, ti annan Errol Prosper avek Martin William ki'n fer vreman byen, nou remersi zot pou sa.

E osi nou oule remersi ou ansanm avek ou lekip osi Gouvernman osi, Prezidan pou sa lantouzyas ki zot in anmennen pou sa *World Cup* ki'n anmenn Seselwa ansanm li menm li lo en fason pozitiv. Minis, mon kestyon i se ki eski Gouvernman in fer en travay pou konn en pti pe anvi ki nou pe kit sa stad la, sa lenfrastruktir pou konn en pti pe kantite i pou koute pou *maintain* li menm li?

Apre si zot in zot pe mazin en anvi ki mon'n tann ou mansyonnen ki i en *sport* ki zot pou kontinyelman ankouraz bann zenn pou antre ladan. E nou pou bezwen

annan bokou landrwa kot pou annan bann fasilite pou annan *training* li menm li. Parey nou konnen Mont Fleuri nou pe fer demars kot nou ava ganny en landrwa lo laplenn Mont Fleuri kot nou 2 tim i ava gannye k bann larestan dimoun ki pou deservi? E si Gouvernman pe mazin lo la? Mersi.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi, Mr Speaker. Mersi, Onorab, pou ou kestyon. Kou pou *maintenance* sa *stadium* definitivman i deza la, aköz i en proze ki vin avek son bann kou. Apre i annan osi bann en pe bann lekipman ki'n ganny lwe ki nou bezwen rann pou nou prezan regarde, parey bann lalimyer, parey sa *screen* pou regarde posibilite regarde konbyen i koute pou regarde pou nou kapab apre aste.

E sa i bann diskisyon apre zwe ki nou pou bezwen asize senserman regarde, e fer bon plan lo *maintenance* sa *stadium*, ki i deza i annan bann diskisyon ki deza pe ganny fer pou vwar ki pli bon model pou kapab fer li. E pou met larestan lenfrastruktir *beach soccer* definitivman aköz nou vwar i en *sport* ki bokou zenn i kontan.

Letan nou ti pe fer bann lanbyans, bann lanbyans pou nou ariv dan sa *stadium* en pti pe partou lo Mahe, dayer mon'n bliye letan mon'n Onorab pou La Digue in dir son kestyon pou felisit bann dimoun La Digue, akòz nou ti al fer aktivite La Digue.

E sa kantite tim ki ti vini pou zot vin zwe, i montre nou ki degre lantouzyazm partou Praslin, la Digue partou lo Mahe en pti pe tou nou bann zanfan lekol ki'n partisipe. I montre poudir i annan en nesessite definitivman ki nou'n envestir lenfrastruktir e larestan plis lo *beach soccer*. Mersi, Mr Chair.

MR SPEAKER

Mersi, Minis. Onorab Samynadin.

HON KELLY SAMYNADIN

Mersi, Mr Chair. Bonn apre midi Minis ek PS. Mon osi mon pou profite pou mwan remerci e felisit nou Gouvernman pou sa travay merveye ki zot in fer. Mon osi oule felisit Tim Nasyonal e nou *coach* ki sorti direk dan distrik Au Cap *Coach* Herald pou sa performans eksepsyonnel ki zot in fer panda sa tournwa.

Minis, mon ti a kontan konnen swivan bon performans nou Tim Nasyonal dan sa tournwa *going forward*, ki plan Minister *Sport* i annan

pou kontinyen sipòrt nou bann zwer dan bann konpetisyon ki swa rezyonal ouswa enternasyonal ?

E dezyenmman, mon ti ava kontan konnen ki bann provizyon sipòrt ki annan an plas pou kontinyen *train* nou bann *coach*, nou bann refri ek nou bann *technical staff* lokal dan *beach soccer*. Mersi.

MR SPEAKER

Mersi, Onorab. Minis, ou repons.

MINISTER MARIE-CELINE ZIALOR

Mersi, Mr Chair. Mersi, Onorab, pou kestyon. E definitivman felisitasyon pou *Coach* Herald, i en dimoun tre brav pou li pran sa *challenge* e pou li ariv kot in arive ozordi. E dapre on performans, definitivman nou'n fini dakor poudir nou bezwen sipòrt zot.

E nou pe fer bann konversasyon avek Federasyon Foutbol pou vwar sirtou pou fe zot kontinyen fer bann konpetisyon o nivo. Fodre pa ki nou perdi sa *momentum* pou regarde kote lot konpetisyon i ete pou nou kapab gard sa lekip ansanm. E lo konsernan kwa ki annan an plas pou sipòrt nou bann zwer, mon ava pas laparol avek PS ki ava reponn.

Me selman si an ka i annan plis parey mon pe dir

Mr Chair, mon pe vin dan Lasanble avek mon krwar 10 kestyon - i annan en bon pe kestyon pou *sport* ladan semenn prosenn pou nou kapab reponn en pti pe pli an detay. Mersi.

MR SPEAKER

Mersi, Minis. *PS*, ou kapab ganny laparol.

PS RALPH JEAN-LOUIS

Mersi, Mr Chair. Mersi, Onorab, pou ou kestyon. Lo kote bann *training* pou bann *coaches* ek bann *official*, sa normalman i ganny *catered for* par bann federasyon li menm avek zot federasyon enternasyonal ki asiste zot lo *provide* bann *training*. E detanzantan i annan bann *training*. E menm SOFGA i asiste avek bann *training* pou sa bann *officials*. Mersi, Onorab.

MR SPEAKER

Mersi *PS*. Onorab Aglae.

HON EGBERT AGLAE

Mersi, Mr Speaker. Bonn apre midi Minis e *PS*. E Minis, nou bezwen donn kredi kot kredi i merite. Mon felisit Lekip Sesel, pep Seselwa e bann Manm Komite Lorganizasyon sa zwe pou zot travay ki zot in fer. Minis, parey ou konnen dan tou konpetisyon, tou levennman byensir i annan

bann pwen for e osi bann pwen feb.

E mon mazinen zot in fer bann *postmortem* nesaser pou kapab idantifye serten sa bann pwen for ek pwen feb. Mon premye kestyon i konsern kot bann lezot Manm in tous en pe lo la. Me solman mon ti a kontan petet al en pti pe pli presi, pou nou konnen *the way forward* e plan pou nou kapab annan nou, nou *National Team Beach Soccer* ki ava la parey nou annan en *National Football Team* ki ava ganny en plan resours pou li kapab reste ansanm koman en lekip.

E osi ganny bann *training* e bann partisipasyon dan bann levennman enternasyonal ki pou vini a lavenir. Sa i enn. Eski zot pe mazin sa? E osi ki zot pe mazin fer par egzant pou nou kapab annan larelev e kontinite pou nou annan ase bann zwer. Eski zot pe mazin osi petet komans lo en faz parey nou apel sa *grassroots* pou nou kapab ganny bann zwer ki enterese dan diferan rezyon ouswa distrik pou zot be *part*?

E dernyen kestyon Minis, i lo iz *accountability* li menm, *ok*? Nou pe tann en pe mon bezwen dir serten rimer ki pe ganny dir baze lo bann kondisyon ki bann ki ti pe travay ek bann levennman, *ok*? I annan ki pe dir ti pou

ganny peye. I annan ki dir pou fer parti. Minis, eski... si ti volonter ou ava dir tou.

Eski ou kapab fer o kler pep Seselwa la ozordi, baze ou'n nonm en Komite Lorganizasyon deor ki ti annan en travay spesifik pou fer ki li ki donn tou kontra. Me i osi annan sa bout kot mon mazine, federasyon or lot ti pe fer son bout. Si ou kapab eklersi nou ki kalite bann kondisyon ki ti egziste lo baz bann ki ti pe partisip, si volonter ouswa bann ki ti pe ganny kontra e sirtou bann kondisyon pe ganny onore parey i sipoze ete? Mersi.

MR SPEAKER

Mersi, Onorab. Minis, ou repons.

MINISTER MARIE-CELINE ZIALOR

Mersi, Mr Speaker. Mersi, Onorab, pou ou kestyon. Mon pou pran sa enn dezyenm e apre PS i ava pran sa enn premye. Lo *accountability* e lo kontra ki'n ganny donner. I annan bann travayer ki ti volonter, mon mazine zot in konpran poudir sa i volonter zot pa pe ganny peye.

E ankor parey zot langazman ti fantastik, zot in vin travay toulezour san ekspekte ganny naryen apard *uniform*, en kit, en sak, soulye

bann keksoz ki zot bezwen servi pou zot travay.

Si in annan bann kek dimoun ki'n ansarz en group volonter prezan in promet zot piknik, sa mon pa pou antre ladan, aköz kekfw sa ti en laranzman antre zot. Bann ki'n ganny kontra, kontra in ganny donner lo papye.

E sa dimoun ki ansarz *Local Organizing Committee* i en *requirement* pa zis ek Gouvernman me ek *FIFA*. I bezwen ekrir en rapor detaye pou li donner pou li met tou sa bann keksoz an plas. E vwala aköz sa tim i reste deryer aköz zot bezwen dele letan ekrir sa rapor detaye pou tou keksoz.

E dapre kontra, e depan lo ki kontra mwan mon pa'n ganny okenn kot mon lofis ziska prezan okenn naryen formel ki en konplent ouswa en rimer, ki pe vin dir i annan okenn kontra ki'n ganny kase. Si i annan petet ou'n tande Onorab mon ava ankouraz ou pou direk zot vini met an ekrir avek kontra ki zot in gannyen.

Si i ti annan okenn kondisyon kontra an ekrir, swa peyman ouswa nenport ki larestan keksoz e nou, nou ava fer le neser pou fer sir ki nou fer medyasyon ki sa bann keksoz i ganny regle parey i sipoze. E avek ou permisyon Mr Chair, mon ava demann PS pou reponn premye kestyon.

MR SPEAKER

Premye keston e mon krwar ti annan omwen 3.

PS RALPH JEAN-LOUIS

Mersi, Mr Chair. Petet osi mon a zis azout en pti gin ko Minis in koz lo la. I annan mwan menm mon non in ganny mansyonnen *PS Sport* pou fer *picnic* pa pou pey dimoun. Mon pa'n zanmen *recruit* personn. So, mon pa fatig mwan, pa mwan.

So, lo kote *National Team Training* Onorab. *National Team* i en keksoz ki evolye toultan, ozordi ou kapab annan *top form* - ou *next match* pa ou ki ganny selekte, e alor ou pa pou kapab dir ou gard sa 12 zwer oubyen 15 zwer la toultan - i pa mars koumsa.

Me selman parey mon krwar i evidan, *NSC* i siport tou *National Team*. *NSC* i ganny Bidze pou fer sa pou li siport bann *National Team* menm pou bann program *youth development* *NSC* i la pou donn sa sipor. Mersi, Onorab.

MR SPEAKER

Mersi. I annan pwen ki nou'n manke Onorab, oubyen nou kapab kontinyen? Wi, wi aköz mon santi ou ti annan plizyer...

HON EGBERT AGLAE

Mon annan zis sa bout *National Team* apre ki mannyer nou pe asir petet kontinite larelev ouswa kontinite pou nou kapab kit sa *beach soccer lively* li menm. Mersi.

MR SPEAKER

Minis, ou ti a kontan azout en parol?

MINISTER MARIE-CELINE ZIALOR

Definitivman, nou pe koz avek Minister Ledikasyon pou fer sir ki *beach soccer* e sa i enn bann rekomandasyon ki'n sorti tou fason sorti kot *Local Organizing Committee* briyevman ki zot in anvoy mwan vi ki sikse, vi ki talan nou bann Seselwa *FIFA* pe rekomande ki nou anmenn li fer klip pou bann lekol ki nou pe met devan Minister Ledikasyon ki i ava annan larelev pou nou bann zwer. Mersi.

MR SPEAKER

Mersi, Minis. Onorab Bastienne.

HON DESHEILA BASTIENNE

Mersi, Mr Speaker. Bonn apre midi Mr Speaker. Bonn apre midi Minis avek ou delegasyon. Bonn apre midi tou Onorab. Minis, mon osi mon pa pou rat sa sans pou mwan felisit ou

personnelman. Felisit Prezidan Sesel, felisit PS ek zot tim ki'n travay e tou lezot dimoun ki'n met lanmen ansanm pou fer sa *beach soccer* en sikse.

E mwan osi mon annan en pti rol pou mwan zwe pou mwan dir ki zot okouran ki dan Perseverance nou osi nou'n ganny sans fer en *Beach Soccer*. E nou annan nou en tim ki pa mal, e la osi mon pou profite pou mwan felisit Mr Bernard St Ange ki pe *train* Tim Moutya, ki li osi i pa pe mal fer dan *Beach Soccer*.

E la mon pou dir ki letan mon ti pran sa linisyativ pou mwan demande ki nou devlop en *Beach Soccer* dan Perseverance, i pa ti en gaspiy letan. Ozordi nou'n war son lenportans. Minis, mwan mon pou demande - mwan mon ti pou kontan demande annan bann zwer dan *Beach Soccer* ki i annan serten nou *MNA* la ki nou tou nou konn zot non, nou konn zot ladres nou konn zot distrik.

Me pa tou ki nou konnen, petet si nou ti kapab ganny sa lalis tel zwer, tel distrik. Petet la osi ti ava en sans kot nou ganny sans petet en ti dan nou distrik in donn li, in onor li dan en fason montre li nou lapresyasyon. Apre mon ti a kontan demande konmsi pou gard sa kontinyasyon lo sa disiplin sportif, pou gard sa

momentum e devlop plis lentere ankor dan kot *beach soccer* i konsernen.

Eski Minister *Sport* an kolaborasyon avek Federasyon Foutbol e Ledikasyon pe mazin lans en konpetisyon enterskoler, pou nou kapab kit sa sport anler. E eski osi zot annan sa propozisyon pou onor sa zour le 01 Me kot nou'n ganny sa *World Beach Soccer* dan nou pei atraver bann konpetisyon nasyonal petet lo *beach soccer* li menm? Mersi.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi, Mr Chair. Mersi, Onorab, pou ou kestyon lo sa dernyen komanter pou onor le 1 Me. Mon pa tro konnen si Minister Lanplwa pou tro kontan nou pran *Labour Day* pou fer sa. Me selman lo kote konpetisyon dakor totalman avek ou. Nou pou bezwen en fason ki sirtou bann *team sports* pou fer li progrese, fer bokou konpetisyon.

Definitivman letan nou annan *league* dan lekol nou annan en kantite konpetisyon parey nou'n fer. Nou'n fer avek *basketball*, nou'n fer avek *volleyball*. E nou'n vwar en pe bann rezilta ki nou pe gannnen, nou pou fer parey

avek *beach soccer*. E pa zis konpetisyon lokal pou nou bann *junior*, pou nou bann *cadet*. I bezwen annan bann konpetisyon enternasyonal pou zot osi tou.

Akoz mon konnen poudir *FIFA* i organiz konpetisyon parey nou bann fiy ti ale Sid Afrik, zot fer sa pou nou bann *juniors* osi tou. E in montre poudir zot in ale vit en pti kourt dele letan parey zot in fer vremen byen. Savedir nou pou bezwen definitivman konsidere fer bann tournwa pli bokou tournwa.

Mon konnen tournwa selman federasyon ki fer. Me nou, nou pare pou nou avek tou bann federasyon parey nou fer asize pou nou regarde ki mannyer nou vin siport zot. E osi avek nou bann partener enternasyonal pou nou kapab pe fer. So, *momentum* definitivman nou pou garde. E lalis bann zwer *PS* i ava fer ou gannyen Onorab Bastienne. Mersi Mr Chair.

MR SPEAKER

Mersi Minis. Onorab Tamboo?

HON LOUISETTE TAMBOO

Mersi, Mr Speaker. Bonn apre midi Mr Speaker. Bonn apre midi Minis e panel. Mr Chair - *sorry*. E bonn apre midi tou dimoun a lekout.

Minis, mon konnen ou'n reponn Onorab Aglae lo

ledikasyon en pti gin. Me selman mwan mon ti a kontan elarzi li en pti pe plis. Mon osi oule felisit Lekip Sesel e tou bann Seselwa ki'n desann osi ki'n vin donn sa sipor nou bann zwer. Ki nou'n vwar ki sa bann zwer i annan en tre bon talan, e ki zot annan en lavenir briyan dan sa *sport*.

E alors, ki mannyer nou fer pou nou gard sa *momentum* dan nou pei *beach soccer*. Eski Minis ou Minister in mazin pou entrodwir dan bann lekol a en tre zennaz, mon pe koz depi lekol primer en pe parey nou fer ek *swimming classes*. I komans depi dan P2 ou P3. Eski ou Minister pe mazin pou entrodwir sa *sport* a en tre zenn az dan bann lekol, ki i vremen ganny entegre dan sa zanfann li menm ki i grandi avek sa *sport*. E ki ler i fer ki i ariv en serten laz, i en keksoz otomatik pou li dan plas ki nou entrodwir ler i annan 15 an, 16 an i nouvo.

Me epi ler i pti, pti i vremen fini abitye avek sa *sport*. E ki koumsa mon krwar nou pou vremen ganny sikse ki nou anvi, nou anvi war dan sa *sport* pou nou pei. E osi mon kontan piu vwar nou pe pran laglwar, nou'n fer en gran keksoz, wi. Me annou pa zis fer li pou *mileage* politik, me annou fer li ki i vremen annan en rannman pou nou pei a lavenir. Mersi, Mr Speaker.

MR SPEAKER

Mersi. Minis, ou repons.

MINISTER MARIE-CELINE ZIALOR

Mersi, Mr Speaker. Mersi, Onorab, pou ou kestyon ek komanter. Definitivman gard *momentum* wi, entrodwir boner definitivman wi. E i pa zis pou *beach soccer* i pou tou larestan disiplin sportif, kot nou bezwen entrodwir li tre zenn az dan bann lekol. Me selman nou konnen, *sports* si nou konn *sports* byen labaz tou *sports* i annan detrwa ki bann teknisyen i travay lo la e ki zot dir nou.

E nou al dan lekol fer bann latitud, fer bann tes ed bann zanfan pou vwar lekel. E pli boner ou kapab entrodwir definitivman i pli bon, dakor avek sa Mr Chair sa definitivman i lo plan. E pran laglwar politik Mr Chair, mon krwar Onorab Aglae larestan osi in dir lo nou kote Onorab Tamboo ki letan nou merite ganny felisite letan keksoz in fer byen.

Akoz mon'n deza vin asiz la mwan, ganny kri avek ganny dir sorti mon pa konn travay, demisyonnen ensidswit plis ki detrwa fwa tou. So, letan mon pe vini la mon prezant en keksoz byen, aköz mon pa pe esper personn felisit mwan, mwan.

Definitivman mon pou asize la avek mon latet anler avek tim avek Gouvernman pou nou kapab vin dir en keksoz byen ki nou'n fer.

Selman mon koz bokou lo la sirtou personnelman pa koman Minis, koman Marie-Celine, kot mon'n dir pa bezwen esper dimoun vin selebre ou, selebre ou lekor. So, Mr Chair sa i en selebrasyon, en selebrasyon lakonplisman definitivman tou sa bann dimoun ki'n travay komansman par Prezidan Mr Speaker.

Si sa i fatig serten dimoun, eskize selman laverite nou bezwen dir. Mwan mon'n asize la mwan dan tou sa bann parkour depi komansman. Menm avan i komanse, avek PS ki ou war i la o bor mwan ozordi, nou'n vwar tou sa parkour nou. Sa ki nou pe dir aköz nou'n vwar tousala, e nou annan laprev. Laprev ek levidans tou sa ki nou a pe dir.

E letan nou pe fer keksoz byen, Mr Speaker, nou pou fer tapaz, nou pou dir aköz i byen. Aköz si sa ti'n mal ganny deroule krwar mwan ti pou annan, ti pou annan en kantite....

(APPLAUSE)

MINISTER MARIE-CELINE ZIALOR

...ti pou annan en mannev politik egzakteman pou montre poudir mon pa konn travay. E in deza ganny fer, in deza ganny fer alors - alors letan nou, nou annan keksoz ki nou bezwen nou pa pe esper personn vin felisit nou sirtou mwan. Pou nou kapab vini, nou latet anler pou nou dir sa i en keksoz ki byen.

E pou fer Seselwa vwar parey bann analiz ki mon'n fer pou nou konnen poudir nou kapab pran legzanp lo bann keksoz kot nou'n pran letan nou'n fer li kot in ganny fer tre byen.

E Mr Speaker, pran li mannyer zot anvi pran li, sa i fe. I en fe poudir sa *beach soccer* in en gro sikse pa zis pou Gouvernman li, pou Sesel an antye. Nou pei sa.

E partou kot ou pase dimoun pa pou vin regarde ki Gouvernman ou sorti li. I sorti Sesel, *ahh* ou organiz en tre bon konpetisyon tournwa e paviyon Sesel nenport ki Gouvernman ki vin o pouvwar paviyon, Sesel ki flote e nou ki'n fer. Wi, nou ki'n fer. Mersi Mr Chair.

(APPLAUSE)

MR SPEAKER

Onorab Woodcock.

HON WAVEL WOODCOCK

Mersi, Mr Speaker. Bonn apre midi Minis ek *PS*. Mon pou komanse Mr Speaker, permet mwan pou felisit bann zwer premyerman organizater Gouvernman, Minis, Lekip Sesel e tou Seselwa pou en tournwa vreman fantastik. Minis *Beach Soccer World Cup* in ekspoz plis Seselwa avek sa *sport*.

Parey bann Manm in dir avan mwan in kre en nouvo lelan pou sa *sport*, nouvo lentere parmi piblik sirtou bann zenn avek zanfán. Eski ou Gouvernman ou Minister pou be lo sa *momentum* pou anmenn sa *sport* pli pre avek piblik dan bann diferan distrik, lakominote par fer bann pti *arena*, bann pti laplenn dan lezot distrik ki napa sirtou lo zil Praslin avek La Digue pou plis zenn kapab partisip dan sa *sport* ?

Deza parey mon'n koz avek ou Minis bann zenn foutboler Praslin in apros mwan pe demande petet Minister pa kapab konsider fer en pti laplenn o bor Stad Amitié kot nou tal latannnen. Petet sa i en keksoz ki Minister i kapab konsider.

E dezyenmman Minis, nou'n koz lo tou bann keksoz pozitiv. Me selman nou konnen poudir Gouvernman, Minister in fer fas avek bokou defi pou fer ki sa tournwa i vin en sikse

ozordi. Petet Minis, si ou kapab eksplik nou en pe bann defi ki zot i fer fas avek, e ki zot in fer pou sirmont tou sa bann defi? Mersi.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi, Mr Chair. Ler konstrir bann pti *arena* parey Onorab Woodcock pe demande Mr Chair nou'n konsidere definitivman. E nou menm parey nou bann zil petet akòz sa *arena* ki isi la Mahe, menm nou bann *training pitch* ou kapab fer larestan *beach sport* lo la. Ou kapab fer *beach volleyball* definitivman kot nou pou servi.

E definitivman, nou pou bezwen konsidere kot nou fer parey ki tou bann *beach sport*. E mon krwar Sesel nou pou fer byen dan tou bann *beach sports*. Mon krwar nou pou fer byen. E nou pou bezwen envestir dan sa bann lenfrastruktir. Savedir Onorab Woodcock pa per ou, definitivman Praslin e La Digue osi tou nou pou vini.

E letan nou ti vin fer sa konpetisyon tournwa avan, Praslin koman La Digue nou ti ganny bokou lekip. E nou'n vwar bokou talan osi ki'n sorti lo sa 2 zil. E dayer nou pou bezwen envestir ladan. Lo kote

bann defi Mr Chair, in annan depi komansman. Akòz pou ou kapab *bid* i en tournwa *FIFA* sa. I en tournwa mondyal, i en tournwa mondyal.

E ou pou bezwen pas atraver bokou bann teknik, bann desizyon teknik ki Gouvernman in bezwen fer, bann garanti ki Gouvernman in bezwen donner dan sak Minister in diferan defi pou nou kapab fer sir. Par egzanp mon a donn ou en senp legzanp, pou nou kapab negosye par egzanp lakantite lanbilans ki *Health Care Agency* in bezwen kapab pou zot donn kot *stadium*.

E bann negosyasyon ki'n arive avek *FIFA*, par ler i pran mwan pou negosye par egzanp pou ki *Seybrew* ki annan sa kontra lo kote labwason dan plas *Heineken*. In en kantite sa bann konsiderasyon, bann negosyasyon. Parfwa negosyasyon fermal lo ou ennler ou al dormi apre repran ankor landmen pou kapab fer en kantite negosyasyon in ganny fer.

Aprè definitivman, nou'n ganny en bon pe defi lo kote finansman, lo kote larzan pou nou kapab ganny bann *sponsors* pou kapab vini pou nou. Nou pli gro defi selman i lenfrastruktir. Pli gro defi se pou nou fer sa lenfrastruktir sa *stadium*, e dan sa dele letan kot nou to gannyen.

E zis pou vwar ki degre problem nou'n pas ladan, letan nou'n nobou kapab *secure* sa *stadium Dubai* ki negosyasyon ti pe ganny fer avan avek Federasyon Foutbol, letan Gouvernman in santi in bezwen antre ladan, pou nou prezan dir avek Federasyon Foutbol be les nou a negosye, pou negosye pou nou kapab fer bann laranzman pou nou fer sa stad arive.

Letan i pou arive i ti annan dele letan sa ki nou dir an Angle en buffer, savedir en pe lespas letan kot si i annan keksoz ki al mal nou *ok*, nou pe zwe ek letan. Me dan sa bann letan la, kot nou ti annan ki dan sa gran por *Dubai* laba dan tou sa bato ki annan sa enn ki pe anmenn *stadium* zot met *wrong fuel* ladan ki fer ki sa bato pa'n kapab vini a tan.

E ki nou'n bezwen kapab fer fas avek tou sa bann kalite defi. Me selman, me selman malgre tou sa bann defi e defi avek Tim Sesel osi nou'n gannyen lo kote finansman lo kote pou zot antrennen, lo kote pou zot ganny *coach*, tousala in al vatevyen. Kantite negosyasyon, en kantite bann paramet ki nou'n bezwen travay avek.

E evantiyelman pou nou kapab ganny sa ki nou'n gannyen, sanmenm sa ou

vwar nou la ozordi. E nou satisfè, nou plis ki satisfè akòz i pa sa bann defi wi in la. Me selman nou pa'n les sanmenm sa dan mon *statement* mon'n dir nou pa'n les sa bann defi fer nou per. Nou pa'n les sa bann defi anpes nou fer en zwe, e zwe de kalite parey mon pe dir.

So, defi mon napa letan pou al dan tou sa bann detaye. Mon mazine rapor ki ava sorti i ava i ava montre sa kantite defi ki nou'n bezwen fer fas avek. Me nou'n sorti venker dan tou sa bann defi, nou abitye nou. Mersi Mr Chair.

MR SPEAKER

Mersi Minis. Onorab Hoareau?

HON JOHN HOAREAU

Mersi, Mr Chair. Mwan osi mon oule azout mon felisitasyon pou tou sa bann ki'n fer ki sa *game* in vin en sikse. Me anvi ki i annan en *turf* Beau Vallon, ki sa landrwa ti'n ganny *earmarked* pou lezot kalite devlopman, eski Minis i kapab dir nou si aprezan kot sa *turf* i ete pa pou afekte lezot devlopman?

E osi si non si zot decide pou *upgrade* sa landrwa pou fer ki nou annan osi en *sitting facility* pou get *beach soccer* pa enn gran - me selman zis enn ki modere mon kapab dir, e osi en pti landrwa pou ou sanze

en *changing room* pou kapab fasilite sa zwe la?

E osi Mr Chair, mon ti ava kontan demann Minis si dan lefitir osi zot annan lide pou negosye ki sa zwe *beach soccer* i kapab vin enn bann zwe osi ki ganny konsidere dan *Jeux des Iles*? E osi lefe ki bann *pre competition build up events* Beau Vallon in osi anmenn serten reveni, retonbe pou tou sa bann ki'n vin partisipe ki'n vin vann en pti keksoz la. Sirtou bann *sport* ki'n vini pou kapab ranmas en pti larzan pou zot kalite disiplin.

So, tousala in ede pou fer ki sa zwe li menm i ariv dan distrik osi, in ariv dan tou bann landrwa kot ti annan bann lans ki dimoun in byen akeyir. Mersi.

MR SPEAKER

Mersi, Onorab. Minis, repons?

MINISTER MARIE-CELINE ZIALOR

Mersi, Mr Chair. Mersi, Onorab, pou ou bann keston. Devlopman Beau Vallon i pa pou sanze li. Nou pe rezwenn *SIB* semenn prosenn pou nou kapab revwar ki mannyer entegre, ki mannyer sa bann devlopman otour ki nou ti'n fini diskite ki pa sanze.

E regarde akòz sa *training pitch* Beau Vallon i sipoze enn ki tanporer li. Me

selman la vi ki avek bann devlopman, nou a kapab bezwen pe asiz ek *SIB* pe vwar pe regarde ansanm avek *MLH* ki mannyer nou fer pli bon use avek sa fasilite. E pou tou bann larestan fasilite, swa i lo lans, swa i lo en lot teren.

Pou *sitting facilities*, nou pe annan, akòz nou annan bann plan avek *NSC* pou vwar ki mannyer nou anmenn bann fasilite ki nou kapab bouz avek ki demontab. Ki si en zour ozordi i Beau Vallon, demen i kapab al Bel Ombre i kapab al Les Mamelles. So, *that* bann dimoun i kapab ganny sans pou zot... akòz parey *mobile toilet* konmela se sa ki modernite dan lenfrastruktir sportif nou osi nou bouz avek.

Dan plas met en kantite beton partou, i annan sa bann *demountable*, bann striktir ki nou kapab. E nou pe definitivman eksplor sa, mersi pou sizesyon. E pou negosye pou *Jeux des Iles* definitivman nou ti'n fini negosye pou *CJSOI* pou met *beach soccer* ladan. Nou annan *meeting* teknik pe vini la an Zen. Selman mon aprann ki ou bezwen ganny 3 tim, mon aprann i annan 2 nou pou bezwen fer fason pou nou regarde ki mannyer nou ganny 3 tim.

Nou konnen nou bann Seselwa nou anvi war *beach soccer*, zot anvi war *CJSOI*

Beach Soccer nou pe travay lo la. Me selman nou pe propoz pou *Jeux des Iles* definitivman nou kapab fer sa. E bann aktivite mon krwar i ti en komanter petet kekfwal lo bann levennman se sa ki nou anvi aköz i Minister *Sport*, Lazenés ek Lafanmir.

E nou anvi osi ki bann aktivite parey *sport* ki pozitiv i anmenn lafanmir ansanm kot nou kapab sanmenm sa ki ou vwar avan *beach soccer* nou ti pe teste detrwal keksoz tou nou. I pa en keksoz ki nou zis mazinén pou fer i pran letan pou nou regarde.

Regarde letan nou fer sa bann aktivite ki mannyer Seselwa ek bann fanmir zot akey sa bann aktivite, ki bann benefis ekonomik ki anmennen pou nou kapab apre vin avek en plan pli lonterm pou nou kapab pe fer e servi tou nou bann resours nou annan Sesel dan en fason ki deservi nou bann kominote, nou bann fanmir, nou bann dimoun dan en fason pli byen.

E definitivman la ankor avan tournwa ti tou nou bann aktivite ki nou'n fer in vreman, vreman en sikse kot bann dimoun in partisip aktivman ki montre ou poudir se sa bann keksoz pozitiv nou bann dimoun i oule. So, mersi bokou pou komanter Onorab.

MR SPEAKER

Mersi, Minis. Onorab Vidot.

HON AUDREY VIDOT

Mersi Mr Chairman. Bonn apre midi Minis ek PS. Premyerman mon osi mon avazwenn Lasanble Nasyonal par remersi tou dimoun ki'n kontribye en fason ou en lot, pou ki sa zwe in pas byen Sesel. E osi byen spesyalman nou bann zwer ki byensir in anmenn bokou fyerte pou pep Seselwa.

Mon kestyon pou Minis; Minis, ou'n fer resorti ki zot deza annan serten travay ki zot in komanse zisteman pou regarde kwa ki petet kapab anbelir pou ki bann tel konpetisyon parey i amelyore pou ki i sorti byen pou Sesel?

Mon konnen i annan en dele letan ki zot in set pou zot kapab annan en kontrandi lo zeneral par egzant bann lorganizasyon lokal ki'n rod bann *sponsors* e ki'n donn lanmen kordinen pou donn en kontrandi petet ki bann depans e bann sipor ki zot in gannén.

Osi byen Gouvernman son par ki'n war li pe kontribye. Kantite ki in war poudir i an plis ki petet serten dan Bidze pa'n ase oubyen menm si zot pa'n depans zis lo sa bann Bidze. So, kan ki zot pe ekspekte pou zot kapab donn nou en kont randi pou nou kapab annan en lide

vreman par deryer
lorganizasyon sa levennman?
Mersi.

MR SPEAKER

Mersi, Onorab. Minis, ou
repons?

**MINISTER MARIE-CELINE
ZIALOR**

Mersi, Mr Chair. Mersi,
Onorab, pou ou bann kestyon.
Definitivman rapor i pe ganny
fer e dapre dernyen *post-*
mortem ki'n fer la mon krwar
nou'n donn en dele letan Out
pou tou bann rapor detaye
pou vini. Sirtou zot bezwen
anvoy pa zis nou, me bezwen i
ganny *monitor closely* avek
FIFA pou *FIFA* osi ganny en
kopi sa rapor pou nou kapab
vwar sa.

E mon ti anvi zis pare
sezi loportinite Mr Chair, pou
mwan dir ki Gouvernman i
vwar sa kontribisyon ki'n
donnen la koman en
lenvestisman sa. Nou ti deside
letan pou vwar be *ok*, bann
kontribisyon finansyel ki
sipoze vini pa'n vini. Nou ti
bezwen pran desizyon, e
desizyon se ki wi sa
lenvestisman i vo lapenn.
Parey mon krwar tou dimoun
dan Lasanble, mersi bokou
pou zot sipor pou remarke ki
sa i en lenvestisman ki merite
ki nou fer.

E nou'n pran li koman en
lenvestisman kot an mezir nou

vwar en pe, an mezir no ganny
rapor nou ava vwar en pe plis
detaye aköz rapor i bezwen
sorti lezot landrwa. Mon fek
koz avek Tourizm bomaten,
zot osi zot pe ekrir zot rapor
pou kapab vwar oli bann
retonbe ki mannyer in vini.
Parey ou a pe dir, tou bann
detay i ava dan sa rapor ki nou
pe mazin en si tou keksoz i al
byen i pou an Out.

Akoz mazin en, la tou sa
kantite travay *post*
konpetisyon ki bezwen arive,
tou bann keksoz ki pa pou
nou, nou bezwen pe fer
laranzman pou nou rann par
egzanp. Tou sa bann *asset*
prezan ki reste deryer, pou fer
tou sa rezis, pou mark li byen
pou fer tousala ki bezwen
ganny fer. So, i annan en pe
travay ki kontinyen. Ler
konpetisyon i fini tou dimoun
i ale, nou krwar i pa'n fini.

E mon rapel sa zour swar
le 11 aswar pe vwar tou sa
bann dimoun ki pe asize
prezan pe depay tou sa difil, pe
ekrir, pe *label asset* limero
partou pou fer sir ki in ganny
fer byen. E vwala aköz *LOC* i
ankor sa dimoun ki ansarz
LOC i ancor la. *By the time* ki
li prezan i bezwen rann sa
rapor avek nou, avek *FIFA* ki
tousala i bann dokiman piblik.
Mersi, Mr Chair.

MR SPEAKER

Mersi Minis. Onorab Bistoquet.

HON ANNE BISTOQUET

Mersi, Mr Speaker. Bonn apre midi Minis. Bonn apre midi PS. Mr Speaker, permet mwan osi pou felisit Tim Sesel ki pandan sa bann letan zot in fer nou en gran loner. Zot in anmenn bokou lazwa dan leker bokou Seselwa, dan leker tou Seselwa.

E Minis, mon pou osi remersye ou Minister e osi Prezidan Ramkalawan osi, Minister, PS Jean-Louis, CEO Duncan, Miss Sabrina, mon clerk Doris, bann zabitan Roche Caiman, lekol Plaisance, bann zanfan, bann zanfan SNYC, CEO Valmont PUC e osi en prizonnyen Sir Leste Augustin ki'n ed nou nou'n kapab dekor sa miray Lekol Plaisance e miray PUC le 1, 2er ler arena in ouver nou, nou ti ankor pe finalize pe fini penn.

E nou remersi zot bokou pou sipor ki zot in donner, ensi tou bann *sponsors* kot mon'n al tap laport ki zot in ed nou. Sa i sa levennman *beach soccer* e enn ki parey nou konnen in fer Roche Caiman. E non Roche Caiman pou touzour grave dan listwar FIFA e dan listwar Sesel.

E nou vreman fyer pou ki zabitan Roche Caiman in ganny sa sans osi, en gran

mazorite pou zot vin form par sa levennman istorik.

(APPLAUSE)

HON ANNE BISTOQUET

Minis, parey nou konnen Sesel in zwe parmi 15 pli gran lekip mondyal pou *beach soccer*. Eski ou krwar par envestir plis dan sa *sport*, donn li plis latansyon i enn bann *sport* ki a lavenir i pou fer nou pei en pli gran loner lo nivo enternasyonal. Petet i enn sa *sport* ki nou osi nou ava ariv parmi premye 15 mondyal en zour.

Eski ou krwar poudir Sesel i annan en gran lavenir dan sa *sport* si nou donn plis latansyon e envestir? E dezyenmman, eski kontribisyon Gouvernman in vreman *upset FIFA*? E eski i pou annan konsekans lo foutbol par kontribisyon Gouvernman parey nou'n tann dir par plizyer bann dimoun ki pe aspire pou vin Prezidan poudir kontribisyon Gouvernman in *upset FIFA*, e sa pou annan konsekans lo foutbol? Mersi.

MR SPEAKER

Mersi, Onorab. Minis, ou repons ?

MINISTER MARIE-CELINE ZIALOR

Mersi Mr Chair. Mersi bokou Onorab pou ou bann kestyon. Premyerman mon ti a kontan dir felisitasyon pou Onorab Bistoquet pou ou travay. Mon kapab dir ou bann zwer ler zot pe pase toulezour, zot pe al zwe ouswa zot pe al fer lantrennman zot war zot paviyon.

(APPLAUSE)

MINISTER MARIE-CELINE ZIALOR

I parmi enn sa bann keksoz ki'n fer zot santi zot alez, e santi zot tre byen.

In parmi enn sa bann lospitalite Seselwa zot in apresye bokou. I annan menm ki'n debarke dan bis in tir portre avek zot paviyon. Pa ti pe ekspekte pou ganny sa kalite sipor, savedir, mersi bokou Onorab pou form parti sa lospitalite.

Lenvestisman dan *beach soccer* definitivman, wi, wi, e wi. E nou, nou'n deza komans koze avek tim e avek bann dimoun ki responsab *Beach Soccer* Sesel pou vwar ki e *FIFA* osi tou pe dir ek nou, nou kapab fer menm parkour ek *Tahiti*.

Tahiti osi avan i ti organiz, i ti organiz 2013 li *beach soccer* - avan i ti organize, son bann zwer osi pa ti kalifye *beach soccer* parey. Akoz zot in organize, bann

dimoun in ganny lentere parey mon pe mazine en pe nou pe fer la. E apre ki in fer zot enn parmi bann pti pei zot osi dan lemonn kalifye *beach soccer*.

Me nou, se sa ki *FIFA* osi pe ankouraz nou pou nou envestir e zot pare pou ed Sesel pou nou arive fer li pou nou kapab fer parey *Tahiti*. So, nou rev la vizyon fer Tim Sesel kalifye pou en *beach soccer*. E lo kote *upset FIFA*, mwan tou bann dimoun *FIFA* nou'n koz en kantite zot. E Prezidan osi in koz *even* avek Prezidan *Infantino*, e bann mo ki zot annan nou zot in servi bann vokabiler se 'felisitasyon', 'depas 'lekspektasyon', e zot menm pe dir ek nou be *bid* pou larestan. Zot anvi nou fer lezot konpetisyon.

Napa okenn dan sa vokabiler sa bann mo 'pou annan konsekans' - 'pou *upset*'. O kontrer, sa bann vokabiler zot pe servi e nou, nou annan *even* lo papye dan email bann rapor ki'n vini sorti kot parey mon dir ou kot Mr *Aimée* ki pe zis felisit Sesel. E zot konnen zot dir nou san kontribisyon Gouvernman - san sipor Gouvernman pa ti pou fer sa konpetisyon. Mersi Mr Chair.

MR SPEAKER

Mersi, Minis. Onorab Gabriel.

HON CONRAD GABRIEL

Mersi, Mr Chair. Mon a dir bonn apre midi tou dimoun a lekout. Bonn apre midi Minis ek ou *panel*. Anvi ki *beach soccer* in ganny popilarite enorm parmi nou bann zenn, Mon ti a kontan demann Minis; eski zot pare pou regard dan distrik Pointe Larue lo potansyel ki nou kapab fer en venue pou sa *beach soccer* ki la?

Minis, mon'n fini idantifye en landrwa pou sa arive. Mon ti'n sit ek *PS* menm avan bon pe letan pase. E sa i anglob distrik Cascade, Pointe Larue, Anse Aux Pins menm *extend to* Anse Royale kot nou kapab desantraliz en pti pe sa *sport*, vi ki in ganny sa kalite popilarite.

E Minis, sa morso teren i pou vreman esansyel i pou enportan akòz i trouve *close to multipurpose court* Pointe Larue. E sa teren *most of the time i muddy, muddy* kot i pou ideal pou fer *Beach Soccer*. So, sa i vin *request* par bann zenn Pointe Larue. Mersi.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi, Mr Chair. Mersi bokou Onorab Gabriel, pou sa sizesyon. Pou fer sa definitivman nou pou *explore* tou posibilite.

Nou pa kapab garanti la ozordi ki nou pou donn tou distrik en *beach soccer pitch*, nou pou bezwen regarde avek NSC avek bann mwayen, zot bann plan avek bann teren ki annan.

Sa bann *soccer pitch*, ki nou kapab mete pou desantralize, definitivman parey tou larestan lenfrastruktir sportif nou pou pran an konsiderasyon Mr Chair. Mersi.

MR SPEAKER

Mersi Minis. Onorab Arissol.

HON SANDY ARISSOL

Mersi, Mr Speaker. Bonn apre midi Minis avek *PS*. Mr Speaker, mon osi mon pa pou kapab rat sa sans pou mwan felisit Lepep Seselwa pou sa leksplozyon ki ti arive dan nou pei.

E mon bezwen felisit Minis ou lekip, en leksplozyon lazwa, linite kot Seselwa in vin ansanm dan tou son mazorite pou nou selebre Sesel, Sesel. E mon ti a kontan felisit Prezidan Larepiblik, Minis, tou zot delegasyon, mon ti a kontan felisit bann artis ki'n sante.

Mon rapel Minis Rangasamy, in konpoz en sanson ek son madanm, Elijah in konpoz en sanson; Mr Madeleine in konpoz en sanson ek bann zanfan kot

Lorloz, mon ti a kontan felisit tou san bann dimoun pou zot partisipasyon. E pli gro felisitasyon mon ti a kontan al pou dimoun Bel Ombre.

Bann dimoun Bel Ombre bann zoli dimoun Minis ki ti desann an triyonf, pou nou al siport Sesel laba dan *beach soccer*, felisitasyon e ankor enn fwa mersi bokou pou sa.

Be Mr Speaker, mon ti a kontan *remind* dimoun pou dir e demann Minis pou dir ti annan en *boycott* pou *beach soccer* pa ganny fer Sesel, pou al ganny fer dan en lot pei.

E mon kontan ozordi letan en zenn La Digue ki Onorab Rocky Uranie, in koz lo la, in ganny posibilite pou li zwe parski Prezidan Ramkalawan in met son lipye ater in dir non, fodre pa i al fer *Dubai* i ganny fer Sesel!

Sa in fer ki posibilite ki kouzen Onorab Uranie, in ganny sans *score* parski gras a Wavel Ramkalawan, Mr Speaker.

(APPLAUSE)

HON SANDY ARISSOL

Alor, ankor enn fwa mon ti a kontan dir zis parey ti annan en petisyon pou nou pa ganny en lopital La Digue, e ozordi mon kontan en Digwa in debout in dir mersi, pou sa fasilite ki zot in gannyen parski in ed li avek son dyaliz.

Alor, Mr Speaker, mon ti a kontan demann Minis, anvi ki a sa moman leta ki nou pe koze se *Beach Soccer* ki'n ganny sa latansyon nasyonal e enternasyonal, eski prezan Gouvernman avek ou Minister Minis, zot pe mazin osi letan ou'n koz lo bann fasilite sportif dan ou lentrodiksyon ki ou'n fer, eski zot pe mazin osi pou nou kapab - la mon aprann pou dir Stad Linite li menm li mon krwar in ganny sa sertifikasyon enternasyonal?

Pa ankor, *ok*? Avek bann laranzman ki pe ganny fer bann lezot fasilite pou anmenn zot lo sa nivo, eski ou Minister pe mazin donn lezot *sport* dan Sesel menm nivo ki nou'n donn *beach soccer*.

Pou ki tou *sport* dan nou pei i ganny sa menm rekonpans, i ganny sa menm latansyon enternasyonal, pou ki nou bann zwer osi zot santi zot enportan parey nou'n donn *beach soccer* ozordi? Mersi bokou, Mr Chair.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi bokou, Mr Chair. Mersi bokou, Onorab Arissol. Mon krwar tre bon kestyon, i donn mwan loportinite pou fer sorti sa pwen ki mon'n fer sorti dan mon *statement* en pti pe pli

profon lo leson ki sa *beach soccer* in donnen pou tou larestan atlet, disiplin, bann federasyon, bann fanmir, lasosyete an zeneral.

I plis ki *beach soccer* sa ki nou'n fer la. I plis ki zis en tournwa mondyal. I pa zis en tournwa mondyal i vreman o nivo. Me selman i plis ki sa, i sa ki i reprezante.

I reprezant en pli pti pei ki pe reprezant parey nou dir an angle bann *underdog*, bann dimoun ki kekfw petet zot, zot en pti pe mwen angaze dan bann konpetisyon mondyal, me selman ki arive frot zepol e fer byen.

Mazinen pres pou nou sorti dan group, pres pou nou sorti dan group e nou annan pli zenn atlet ki nou'n dir Mr Bibi kot 16 an i met 2 *goal*. I annan zwer ki pe fer sa *World Cup* profesyonnel pa'n met *goal*.

E sa mon pa krwar nou merit pran li a la lezer. Sa i montre sa kapasite nou bann atlet Seselwa e pa zis *beach soccer* dan tou disiplin e msye Bibi li i ti zwe *11-a-Side* i fek komans zwe *beach soccer* la.

Ou kapab mazinen ki mervay nou bann larestan atlet i kapab pe fer dan larestan disiplin. Sa la in zis vini koman en laroul in balye pou montre potansyel ek posibilite ki nou annan si nou donn sans.

E mon kontan dan ou premye *statement* ou'n dir wi, ti annan *boycott* mwan, mon ti ganny dir personnelman par serten dimoun akfer mon pe met lenfirmite lo Sesel, lenfirmite e *even* dan Lasanble tou la mon ti ganny dir i zis *Beach Soccer* sa pa ni en *World Cup*, mon ti ganny dir sa mwan.

E mon pa ti antren, mon pa ti antren e nou'n pa ekout tapaz parey Prezidan i kontan dir nou, pa ekout tapaz *focus* lo ou travay sa ki nou pe fer. Akoz nou, nou ti krwar nou pou dir nou bann atlet nou bann Seselwa antye, depi son piblik, depi bann artis, depi bann entrepreneur tou dimoun pou ralye pou kapab fer akoz nou konn pwisans *sport*.

E vwala akoz mon la dan Lasanble osi tou, pou sipor Lasanble pou bann demars sportif ki ganny fer akoz i plis ki *sport* sa. I en zouti vreman pwisan swa ou servi li an mal ouswa ou deside pou ou servi li an byen.

Se sa akoz nou la, e nou, nou ladministrasyon nou toultan servi *sport* an byen, e vwala son rezilta ozordi. E definitivman lo lezot *sport* mon krwar nou kapab fer osi byen pli byento ki nou'n fer la dan sa *beach soccer*. Mersi, Mr Chair.

MR SPEAKER

Mersi, Minis. Onorab Larsen?

HON CECILE LARSEN

Mersi, Mr Chair. Bonn apre midi a tous, en bonn apre midi spesyal pou zabitan Au Cap ki a lekout. Mr Chair, koman en *fan beach soccer* en siporter Stormy Taka, mon ti a kontan felisit *National Team* pou sa zwe.

E i regretab ki nou annan 3 *team*, 3 zabitan Au Cap ki sorti dan sa *team* sa i Stephen Lajoie, Damien Hoareau, e Glenni Gamatis, ki form pa Tim Nasyonal. Me ki pa'n ganny sans partisip dan sa tournwa.

E mon kestyon pou Minis se, si ki bann preparasyon ki sa *team* nasyonal in gannnen avan ki zot in al pran par dan sa tournwa?

E en lot pti *statement* Mr Chair, letan mon pe ekout bann *statement* lot kote latap i paret Manm Proporsyonnel LDS, i ganny akse Lotorite Distrik selman nou Manm Proporsyonnel US, Ps Perine i dir nou pa kapab e i –

(Interruptions)

MR SPEAKER

Silvouple bann Manm, silvouple, rekonnet, rekonnet prosedir ki Lasanble in fer. Onorab Larsen, in lev en pwen avek mwan bomaten - ou pou

gannnen ou repons, i pou vini dan Lasanble.

(Interruptions)

MR SPEAKER

Mon pa kapab dir plis ki sa. Minis, Minis, ou repons lo son kestyon, lo ki preparasyon?

MINISTER MARIE-CELINE ZIALOR

Mersi, Mr Chair. Mersi, Onorab, pou ou kestyon. Avek ou permisyon Mr Chair, PS Jean -Louis i ava koz lo preparasyon lekip. Mersi.

MR SPEAKER

Mersi. PS Jean-Louis, ou annan laparol.

MR SPEAKER

PS Jean-Louis, ou repons.

PS RALPH JEAN-LOUIS

Mersi, Chair. Mersi, Onorab, pou ou kestyon. Ofet lekip nasyonal ti antre dan preparasyon entansif komansman Fevriye kot zot ti nepli pe travay, zot ti zis *train*. E nou ti'n nobou *secure de technical advisors* Larisi ki vini pou vin asiste *Coach Herald* pou lantrennman lekip, pou prepar zot pou sa konpetisyon. Zot in al konpetisyon Senegal. Zot in al Marok nou annan en *team Spartak Moscow*, ki'n vin

isi pou donn zot bann *test matches*.

E osi zot in zwe bann diferan *test matches* ek bann lekip ki ti'n vini en pe pli boner preparasyon pou konpetisyon *Beach Soccer World Cup*, so zot in preparasyon entans kot zot in reste dan kan. Ti komans Fevriye ziska ler tournwa in terminen. Mersi, Onorab.

MR SPEAKER

Mersi, PS. Onorab Loizeau.

HON NORBERT LOIZEAU

Mersi, Mr Speaker. Mr Speaker, parey tou mon bann koleg mwan osi mwan, mon anvi felisit tou bann ki'n fer sa levennman en sikse mwan mon'n enn aköz ek sa gro loraz lapli mon'n tou tranpe lot kote pe siport Sesel malgre ti annan ti dan *VIP* bann ki pe konplent zot ti pe tir portre pe fer *selfie*.

E mwan, mon ti pe selebre dan sa loraz lapli. Mr Speaker, mon anvi demann Minis. Minis, mon napa okenn pti kouzen ki ti pe zwe, me selman i annan bann zwer ki mon anvi zot get en pe pre.

Ti annan bann zwer ki ti al ki'n al en pe bann *training camp*, me apre nou pa'n trouv zot dan lekip zot dir pou rezon disipliner. Dapre konpran sa bann zwer zot telman talante. Ki nou pe fer malgre zot in fer zot fot petet aksyon disipliner in pran ki zot pe fer pou anmas

sa anmas sa bann zwer ed zot, diriz zot pou zot vin bon sitwayen ki nou a kapab ganny zot a lavenir pou zot *compete* pou Sesel dan bann levennman enternasyonal?

Mon dezyenm pwen, ler mon'n asize dan sa gro loraz lapli, mon'n santi ki petet mon'n vwar serten dimoun ki ler pe desann in glise in tonbe, si zot annan plan petet pou a lavenir, met en pti kouvertir laba pou ki bann ki pe asiz lot kote laba zot kapab *enjoy* sa *sport* menm si annan lapli, loraz, zekler, nou a kapab asize konfortableman. Sa en pwen.

Minis, apre mon anvi demann en lot pti kestyon sa disab fen Lasonpsyon sa? En zoli pti disab fen dapre konpran i sorti Lasonpsyon.

E Minis, be granmersi nou pa'n les en baz militer fer, sansan nou pa ti pou ganny sa disab.

(laughter)

HON NORBERT LOIZEAU

E mon apresye aköz sa disab ler mon pe gete i tonm dan lizye zwer zis ou vid en delo, i sorti.

Alors mon anvi felisit Gouvernman, pou fer sir ki nou zil nou patrimwann pa'n ganny vann kot nou'n kapab ganny sa prodwi disab pou nou kapab fer sa *Beach Soccer*

World Cup a en *level* telman o. Mersi.

MR SPEAKER

Mersi, Onorab. Mon pe espere ki latmosfer *beach soccer* i reste pou larestan kestyon. Minis, nou a pran ou repons?

MINISTER MARIE-CELINE ZIALOR

Mersi, Mr Chair. Mersi, Onorab, pou ou bann kestyon. full stop konsernan bann zwer ki pa'n zwe petet pou rezon mwan pa'n demann *coach* aköz.

Parey nou pe dir nou pa, nou pa al enterfer dan seleksyon bann zwer. E si i annan okenn travay pou nou fer avek pa zis sa bann zwer, tou larestan ki nou santi zot bezwen sipor en led pou akonpanyi zot, definitivman, definitivman.

NSC in fini met an plas, an plas sa bann servis ki donn zot en pe *counselling* en pe gidans, me selman zot bezwen ganny refer avek zot bann *coach* ouswa avek *management team*, ouswa petet i annan bann ki oule vin zot menm zot bezwen ganny refer avek nou. Pou nou kapab fer sa travay avek zot.

E dan lefitir pou kouver en bout sa *stadium*, sa i ava tou depan lo resours apre lo ki kantite pwa sa bout *stand* la kot pa'n kouver - lo sa bann

enzenyer i ava kapab fer sa bann detay pou regarde, e anmezir kot i annan resours. Aköz pou le moman sa bout kot i pa kouver -sa bout kot i *VIP* in fini fer li permanan. Sa bout kot i pa kouver zis sa bout par deryer ki'n fer li permanan, i bezwen annan en travay ki la *SIAH* i bezwen al fer.

Anmezir nou ale nou ganny resours, nou ganny Bidze pou nou kapab tenir li, pou li sa bout devan pou fer li vine n striktir solid, apre prezan zot ava kapab bann enzenyer regarde ki mannyer si an ka i kapab kouver.

Wi, disab Lasonpsyon ki nou'n ki nou ti'n al fer teste pou fer sir ki nou kapab gannnen, aköz nou ti ganny dir de kwa - i annan de kwa disab e sa disab i paret en bon kalite pou fer teste, e nou bezwen ganny aprouvasyon avan fer anmenn teste dan laboratwar *Canada* pou montre.

E mon vwar mon krwar i enn parmi bann rezon ki bann zwer in vreman kontan sa disab, aköz sanmenm sa. I napa lapousyer avek e koman i tonm lo ou dan ou lizye koman ou vid delo ouswa tape i sorti. I enn nou bann disab meyer kalite ki nou annan.

E mon zwenn ou pou dir wi, nou kontan ki nou'n nobou kapab ganny disab Lasonpsyon pou nou kapab fer

nou *beach soccer* avek. Mersi Mr Chair.

MR SPEAKER

Mersi, Minis. Onorab Gill?

HON CHURCHILL GILL

Mersi, Mr Chair. Mwan mon kestyon i vize ver bann atlet i vre ki *beach soccer* in deroul byen, e bann atlet in perform alaoter. Me selman mon kestyon se eski Minis zot osi mazin en si bann atlet i ganny *injury* pou Minister donn zot serten sipor?

Akoz nou'n annan atlet - la mon pe koz, mon mazin Dominique Dugasse, Baie Ste Anne ki'n anmenn bokou meday e in osi ganny *injury* dan *All African Games* pe reprezant Sesel.

Me selman i pa ganny sipor. Ozordi i *Sri Lanka* pe fer loperasyon i pa'n ganny okenn sipor avek lotorite. Eski apard ki nou get dan *welfare* sa bann atlet avan zot *perform*, eski nou pe mazin en osi fer en *contingency* si okenn atlet i ganny *injury* pou zot kapab ganny sipor pou zot ganny trete? Mersi.

MR SPEAKER

Mersi, Onorab. Minis.

MINISTER MARIE-CELINE ZIALOR

Mersi, Mr Chair. Lo kote *injury* i annan mon krwar mon'n

deza vin dan Lasanble avek CEO Arissol, pou eksplik lo kote lasirans.

Injury i depan en zafer lasirans. Sa ka ki ou a pe koze lo atlet Dominique Dugasse, Mwan mon pa - mon pa'n ganny met okouran lo ki egzakteman, egzakteman ki arive egzakteman, ki lasistans i ti merit gannyen ki i pa'n gannyen.

Si nou ganny, nou ganny sa bann lenformasyon nou ava regarde. Me selman i annan *package* lasirans ki NSC me selman ankor i depan lo atlet federasyon.

Nou ti ganny pa mal difikilte avek Zwe de Zil, aköz ou pou bezwen parey nenport ki atlet menm bann profesyonnel. Par egzanp, bann foutboler i asir zot lipye me zot bezwen fer sa bann demars ansanm avek zot federasyon, *coach*, *management*, e avek lakonpannyen lasirans ki bezwen ganny fer sa.

I pa zis letan zot ganny *injury* zot vin kot NSC kot i annan en mekaniz an plas. I bann mekaniz bann prosedir bann *method* ki swiv ki annan norm enternasyonal ki nou bezwen pe fer.

Me selman parey mon pe dir Mr Chair, CEO Arissol pou dan Lasanble semenn prosenn Mardi, e nou annan en pe kestyon konsernan *sports*,

kekfwa petet i ava kapab al dan plis detay lo kote lasirans pou *injury* pou bann atlet, mersi. Selman i annan plas. Mersi Mr Chair.

MR SPEAKER

Mersi, Minis. Onorab Labonte.

HON ANDY LABONTE

Mersi, Mr Chair. Minis, mon osi mon pou zwenn avek mon bann koleg, pou mwan felisit Sesel an zeneral enkli nou lekip *Paradise Boys* ki'n *perform* byen.

E Prezidan Ramkalawan ki'n fer en travay avek son lekip - si oule Prezidan avek Gouvernman *LDS*. Parey nou'n koz lo defi nou'n koz lo lensertitid, e parey ou'n dir laglwar nou bezwen pran laglwar ler i merite.

Ou'n dir i annan en rapor ki pou sorti kot pou donn bann detay finansye, e i kler ki'n annan depans pou pran en tel levennman.

So, i annan serten kestyon ki kontinyen ganny demande la deor, petet dan ki lespri ki nou vwar ki Prezidan Ramkalawan ti oblize antre pou rod finansman, pou kapab fer sir ki sa levennman in deroule, e in en sikse parey nou vwar ki nou tou nou pe pran laglwar?

E mon dezyenm leklersisman petet eski atraver - nou konnen pou dir

responsabilite ti Federasyon Foutbol, me selman nou'n vwar ki Prezidan in bezwen antre.

So, eski Federasyon Foutbol li menm li nasyonal in atraver bann pou rod *sponsorship* in fer okenn kontribisyon atraver *sponsorship* ki in gannyen oubyen swa lo baz nasyonal oubyen enternasyonal?

So, si ou annan sa lenformasyon petet pa dan en fason detaye, me zis fer konnen aköz i enportan pou nou konnen aköz ki Prezidan in bezwen pran sa a men, ki finalman sa levennman in vin en sikse pou Lepep Seselwa. Mersi.

MR SPEAKER

Mersi, Onorab. Minis.

MINISTER MARIE-CELINE ZIALOR

Mersi, Mr Chair. Mersi, Onorab, pou ou de kestyon. Mon a komans avek sa dezyenm kestyon. Kot nou mon pe asize la ozordi mon pa konn okenn kontribisyon finansyel ki Federasyon Foutbol in fer.

Atraver si in fer atraver *Local Organizing Committee* direk sa i pou rapor *Local Organizing Committee* ki ava dir. Me selman lo nou kote nou, nou napa okenn lenformasyon ki Federasyon

Foutbol in fer okenn kontribisyon finansyel pou konpetisyon.

E dan ki lespri ki Prezidan in antre pou nou kapab rod finansman; se i pa ti pou antre ladan li, i pa ti anvi antre ladan nou de *Minister* Hassan, ki'n bezwen anmenn li ladan.

Apré li i Patron Foutbol Sesel nou'n bezwen pou nou kapab fer keksoz avanse, aköz nou ti pe ganny dir parey li en kantite zistwar pou peye ozordi, pa peye demen, apré demen.

E letan nou ti pe vwar letan pe ale, keksoz pa pe bouze pa pe marse, sirtou Finans ki ti'n bezwen anmenn aköz finans ti bezwen pey atraver Finans ki ti napa okenn peyman ki i pe fer, ki pe pase ki ti letan nou bann *meeting* in ganny fer pou vwar ki be napa finansman.

E nou'n bezwen antre koman Gouvernman, pou nou kapab vwar be *ok*, be nou annan en sityasyon devan nou be ki mannyer nou kapab nou prezan zer mwayen pou nou kapab *raise* fon finansman, pou nou kapab fer konpetisyon deroule.

Aköz nou'n bezwen mazin pou nou repitasyon nou pei sa. Nou'n bezwen mazin osi tou, tou sa bann dimoun ki mon'n nonmen dan mon

statement ki involve ladan dan sa *beach soccer*.

E i en desizyon brav ki nou'n pran. Mon krwar pandan sa 5 an nou'n montre pou dir preski tou lazournen ou a krwar nou bezwen pran bann desizyon brav kot apré nou kapab reisir pou nou fer sa bann defi vin en sikse. Mr Chair, mersi.

MR SPEAKER

Mersi, Minis. Mon ava asir zot ki i reste mwan zis 4 Manm lo mon lalis. Alor mon a fer mon lalis la, e nou a pran sa 4 e nou a kapab terminen. Onorab Pillay, kestyon.

HON SEBASTIEN PILLAY

Mersi, Mr Chairman. Bonn apré midi tou dimoun. Bonn apré midi Minis avek *PS* Jean Louis. Mr Chairman, mon note an pasan ki ozordi apré midi nou pa'n bezwen Mosyon pou al dan Staz Komite.

Mon not sa koman en nouvo presedans pou la prosenn fwa ki nou ganny en lot *statement* dan Lasanble, ki ou pa ava demann nou pou nou *move* en Mosyon.

Mr Speaker, mon'n ekout atantivman prezantasyon Minis, ki pou mwan in *sound* en pti pe plis ki koman en mesaz remersiman, neanmwén in Minis pou *Sport*.

E i son prerogativ si i anvi fer en mesaz remersiman, si i

anvi fer en *statement* i kapab fer. Mon'n osi note ki Minis in dir ki ler ou fer en keksoz byen ou bezwen *praise* ou lekor.

Si nou al lo *google* i dir ou en dimoun ki fer *self-praise or self-glorification* i *boastful*, bann keksoz koumsa mon pa pou al ladan sa i zis bann keksoz ki ganny dir Mr-

(Interruption)

MR SPEAKER

Order! Ok, silvouple kontinyen Onorab, annou reste lo size *beach soccer*.

HON SEBASTIEN PILLAY

Wi. Be dan lespri *beach soccer* ki Minis in koz lo la, e dan lespri patriotism mon'n *attend* mon'n ganny sans *attend* bann *match*.

Mon'n ganny sans gete, e koman en patriyot koman en Seselwa mon'n siport mon lekip, mon'n kriye pou nou bann zwer, mon'n apresye lorganizasyon, mon'n apresye latmosfer parey tou Seselwa.

E i en latmosfer patriyotik. Me dan sa latmosfer patriyotik Mr Speaker, dan Lasanble la apre midi la e nou pe koz linite, mon pa'n tann Minis remersye ditou Federasyon Foutbol Mr Elvis Chetty, lekip otour Federasyon Foutbol, Carol, Denis Rose, Dolor Ernesta.

Tou sa bann dimoun ki ti la ki mon ti vwar pe frekant Minis e Prezidan. Prezan kestyon ki mon annan pou Minis, se eski nou pe vreman anmenn en lespri patriyotik kan nou pe swazir pou remersi e glorifye zis serten dimoun, *or* nou devret pe remersye tou dimoun ki'n ede pour fer sa levennman vin en sikse?

Sa i mon premye kestyon. Mon dezyenm kestyon Mr Chairman, Minis in fer plizyer *statement* lo bann larepons ki'n donner e in koz lo bann *Local Organizing Committee*.

E sak fwa kestyon i vin lo preparasyon Minis i dir nou sa pa ti en keksoz ki zot ti pe konsidere, sete Federasyon, e in en *pattern throughout* bann kestyon la.

Si in vin lo en size ki annan pou fer ek peyman, i napa nanryen pou fer avek Prezidan ki'n ganny felisite e tou dimoun, i annan pou fer avel *Local*, kot tou problem i ete i konsern *Local Organizing Committee* kot tou felisitasyon i ete i konsern Prezidan.

Kestyon ki mon annan pou Minis Mr Speaker, Prezidan ti li menm dir avek msye Chetty, dan *interview* e Federasyon ti dir zot pran en *back seat*.

So, si sa bann dimoun in pran en *back seat* dan en responsabilite peyman bann

kontra, responsabilite peyman bann *allowances*, responsabilite mank preparasyon, responsabilite okenn kestyon ki ganny demande i tonm kot Prezidan.

Se pou sa rezon ki mon pa oule al dan sa laliny so, mon ti a kontan ki Minis-

(interruption)

MR SPEAKER

Ok, Onorab.

HON SEBASTIEN PILLAY

Mr Speaker, eski mon kapab demann en kestyon silvouple.

MR SPEAKER

Onorab, ok Onorab, silvouple termin ou lentervansyon.

HON SEBASTIEN PILLAY

Mon en patriyot, be mon pa aveg Mr Speaker. So, mon ti a kontan demann avek Minis tou senpleman, eski in annan friksyon ant Prezidan Larepiblik Sesel koman Gouvernman Sesel *Local Organizing Committee*, Federasyon?

Akoz la nou pe ganny dir sa ki ti sipoze *raise* larzan i *Local Organizing Committee*, nou ganny dir poudir *SFF* pa'n met larzan Federasyon pa'n met larzan nou ganny dir pou dir *Qatari*, in donn 3 milyon, *Etihad* in donn 2 milyon, *FIFA*

in donn en bout larzan, lot in donn en bout larzan.

So, nou bezwen sey reini tou sa lenformasyon, aköz si sa levennman in sitan byen deroule i annan en *template* ki'n marse ki nou kapab refer pou en lot levennman, nou annan *CJSOI* ki pe vini.

E se sa ki mon pe rode pou ki nou pa ganny sa bann menm kalite friksyon ki pou mwan i pa montre poudir nou annan en linite nasyonal ler nou annan en levennman koumsa.

Dan plas nou montre pou dir nou le fizikman kit lezot dimoun a lekar pou nou pran tou laglwar? Se sa ki mon ti le konnen.

MR SPEAKER

Mersi.

HON SEBASTIEN PILLAY

So, eski in annan en friksyon a okenn moman ant sa bann diferan akter, e konbyen larzan ki ti sipoze ganny *raise* par sa *Local Organizing Committee*, e konbyen larzan Gouvernman ti pou mete konbyen larzan *FIFA* ti pou donner? Si ou annan sa.

MR SPEAKER

Ale, terminen Onorab.

HON SEBASTIEN PILLAY

Be Mr Speaker, mon bezwen demann sa bann kestyon.

MR SPEAKER

Terminen.

HON SEBASTIEN PILLAY

Ok, e mon terminen Mr Speaker, par dir ki lo mon par e lo par tou dimoun ki mon konnen yer swar mon'n zwenn Damien ankor Glacis mon pou kontinyen felisit Lekip Sesel.

Mon pou kontinyen redir, mon pou kontinyen felisit tou zwer Lionel ki mon'n konn son papa depi lontan, felisit zot tou.

Si nou kapab kontinyen fer zot reste ansanm koman en lekip *build* lo la kontinyen fer sa nou pou devlope. Nou annan *tim One Stone* ki'n fer byen dan konpetisyon *beach soccer* dan lepase, nou annan bann zwer ki'n fer byen ki nou kapab reentegre.

So, nou travay pou nou entegre so mon pou mon, mon pozitiv *about* ki mannyer nou kapab anmenn *beach soccer*, me mon pa oule Mr Speaker, anmenn politik ladan. *That's it*, mersi.

MR SPEAKER

Ok, mersi. Ok Minis, ou repons.

MINISTER MARIE-CELINE ZIALOR

Mersi, Mr Chair. Mersi, Onorab Pillay, pou ou bann komanter e kestyon. Premye ki

mon'n note se ou dir mon pa'n remersye lantouraz mon a repete, mersi pou Tim Sesel ek zot bann lantouraz.

Ki mon'n mansyonnen dan mon *statement* e apre bann dimoun ki mwan, mon santi in vreman, vreman kontribye aköz Onorab Pillay, Mr Chair, atraver ou i pa ti la li i pa'n sibir sa ki nou'n sibir - i pa ti la.

E letan nou, nou'n la mwan sirtou personnelman koz lo mon non mon, mon'n la. Mwan, mon konnen aköz mon'n fer mon *statement* parey mon'n fer *unless* ou asiz dan sa sez kot mon asize, ou met sa soulye ou santi Mr Chair, atraver ou lekel ki'n ede lekel ki pa'n ede, ki mannyer in travay sa.

Mwan, mon pou kontinyelman fer mon bann *statement* dapre leksperyans, dapre bann fe osi ki nou'n annan. E mwan, mon pa pou en ipokrit pou mon vin asize la devan televizyon devan Lepep Seselwa Mr Chair, pou mwan vin fer krwar tou keksoz ti byen ti an roz avek lorganizasyon avek Federasyon Foutbol ouswa nenport larestan federasyon.

Wi, in annan friksyon, friksyon mon personnelman mon'n ganny en friksyon avek Mr Chetty, avek lezot manm federasyon, parey mon

gannyen avek tou larestan federasyon e i normal sa.

Letan ou vwar ou annan ou relasyon travay avek bann dimoun kot i annan bann keksoz zot pa agree avek, be i normal. Akoz si napa friksyon tou dimoun i asize i fer krwar. Apre dan koridor nou, nou mangonnen, nou ekrir tou kalite zafer lo *Facebook* be sa i artifisyel - i pa en relasyon travay ki byen.

Mwan, mon debout pou en relasyon travay kot letan i annan keksoz ki mars byen wi, i byen, ler i annan keksoz ki mal i mal, nou pa kasyet, nou pa fer krwar pou nou kapab ganny dan parmi bann dimoun, pou nou ganny vwar pou gete koman pli bon dimoun.

Nou, nou pa'n fer sa. Nou'n vin anmenn en fe pou nou vin dir egzakteman ki manner bann keksoz in deroule. E mon krwar Onorab Pillay, osi konm labitid i sey konfiz dimoun pou dir bann keksoz ki ler preparasyon, nou pa'n dir isi nou pa'n dir laba, kan pa vre.

I annan en diferans ant *Local Organizing Committee* avek Federasyon Foutbol. Kontra i *Local Organizing Committee*. Napa en letan kot nou'n dir nou'n ganny en move relasyon travay. Avek *Local Organizing Committee* nou'n

travay vreman, vreman, vreman byen.

Avek Federasyon Foutbol vre nou pa'n travay sitan byen. Mon pa pou vin asize la pou mwan vin fer krwar mon Mr Chair. Akoz sa i pa mon stil, i pa stil nou Gouvernman tou, pou nou vin fer krwar keksoz kan pa vre. E nou koz fran nou. Nou koz fran nou dir e mon krwar Lepep Seselwa osi i *deserve* kot nou vini nou vin koz dan en fason fran, dan en fason onnet pou nou vin eksplike e pou nou fer vwar ki manner keksoz in ale.

E Federasyon Foutbol li wi, in sipoze e zot ti dir zot kapab aköz mwan, mon ti asiz avek Mr Chetty, dan mon lofis - *PS* i la ti la li dan *meeting* avek sa dimoun ki ansarz *Local Organizing Committee*, pou nou regarde ki kantite larzan ki bezwen ganny *raise* - 3.5 *at* sa letan - lannen pas - 2 an pase sa, \$3.5 milyon i bezwen ganny *raised* par Federasyon Foutbol.

E apre *FIFA* li i donn serten sonm larzan dapre sa kantite larzan ki ou, ou'n *raised* pou ede e *FIFA* li i pran ka avek zwer, avek tou deroulman konpetisyon - zot ki pran *l'hébergement* zot bann zwer zot bann travayer ensidswit.

E zot ti dir klerman - Mr Chetty ti dir non i kapab *raise* li i pa bezwen led

Gouvernman, mon ti la mon pa ni bezwen personn dir mwan, I ti la - i ti dir.

E mon'n *reach out* pre 4 fwa avek li, pou mwan dir ek li vini annou fer sa ansanm, annou travay e i annan larestan bann dimoun osi tou bann Seselwa nou ti al kot *SIB* - kot larestan pou kapab annou regarde nou fer *even* en *Investment Forum* ti annan lezot bann etranze ki ti'n pare pou vini pou investir, regarde be ki kriter *FIFA* ensidswit.

I en travay 1 an, 1 an edmi ki nou'n fer kot nou'n anvi e letan nou'n al ver larestan bann manm ki ou'n koze - bann larestan bann manm Federasyon Foutbol pou dir be annou regarde ki mannyer nou kapab pe fer sa.

Me nou pa'n ganny, nou pa'n ganny korperasyon ki nou ti'n merit gannyen nou Mr Chair, e sa i laverite. I laverite i fe - i fe. E nou koman en Gouvernman nou, nou pa kapab zis krwaz lebra, lese.

Nou'n bezwen dir koz ek *FIFA* demande e dir, be regard sa ki mannyer eski Gouvernman li kapab - nou anvi ede - ki mannyer nou pou antre ladan? Ki mannyer nou pou kapab fer pou antre ladan.

Akoz *FIFA* ti'n komans mazin en pou dir be ou konnen be Sesel zot pa ankor ni *purchase* en *stadium*, zot pa

ankor fer tel keksoz ki mannyer nou kapab, nou kapab konmsi ki lasistans zot bezwen e *FIFA* ti anvi tou pou regarde pou nou ed nou, me selman tou keksoz federasyon enternasyonal sirtou foutbol - sirtou foutbol i fer atraver federasyon nou'n bezwen fer en kantite diskisyon ek *FIFA* pou nou kapab dir les nou Gouvernman les nou, nou ava regarde antre ladan e pran desizyon pou nou kapab dir be *ok*, be annou pran.

E tou sa bann travay Mr Chair, mon anvi dir avek Onorab Pillay, atraver ou tou sa bann travay in ganny fer par Gou..vern..man Sesel !

(APPLAUSE)

MINISTER MARIE-CELINE ZIALOR

Tou sa bann travay ki'n ganny fer par Gouvernman Sesel. E nou'n pran nou responsabilite, nou'n pran tou sa bann defi, e nou ti ankor menm ti annan difikilte.

Nou ti ankor *PS* i la *PS* preski toulezour i pe *call* Mr Chetty, li tou lazournen mon osi tou mon dir ek li dir li vini, vin koz avek nou vin regarde ki mannyer nou kapab ansanm e devan nou osi tou Komite nou ti la *State House* pe asize pe kalkile.

Prezidan ti *call* li i dir ek li regarde annou fer en travay

ansanm ki kwa ki ou pe fer kwa ki ou pa kapab fer? Toultan ensite pou dir non, in ensite ki li i anvi fer son zafer li.

E i ti lavey lavanvey konpetisyon tournwa nou'n bezwen pran en desizyon dir non, nou pou al kot *FIFA* nou pou dir, be nou konnen pou dir koumsa zot abitye fer keksoz be selman parey nou'n deza fer mwan avek larestan federasyon tou.

E kriy zot e regarde ki mannyer zot kapab vini pou ede pou *bridge the gap* letan ou Federasyon Lokal i annan e i arive sa i pa zis Sesel.

Mon sorti en konferans *sport* avek lazenes Lafrik, e i menm difikilte ki preski tou sa bann pei pe rankontre difikilte e prezan nou bezwen rode ki mannyer i form parti, ki mannyer nou modernize dan zesyon *sport*.

Pa zis Sesel - dan lemonn antye, pou nou kapab vwar ki mannyer nou travay en pe pli byen ek kanmarad, ouswa sa model ki la ki egziste, eski in demode eski pa ler pou nou anmenn en lot kalite model travay ki nou bezwen pe travay lo la ?

Mr Chair, se sa - se sa nou realite, se sa sityasyon lo sa kote nou relasyon avek federasyon. E wi, nou pa fase nou mon koz avek sa bann dimoun mwan.

Me selman, zot vin *meeting* kot mwan - *CAF* ti vin *meeting* avan tou ki ti vini kot mon parey mon pe dir Mr Ernesta ti vini, Mr Rose ti vini nou ti fer *meeting* e mon ti dir parey mon pe dir ou la pou dir ek zot pou nou avanse la fodre nou sanz sa fason travay.

E sa madanm ki ansarz sa *CAF* la, i ti agree i ti dir be wi pou nou kapab bouze nou bezwen fer bann konversasyon Mr Chair, ki fran ki onnet, nou pou bezwen fer sa.

Pa aköz i pa konfortab nou pa pou ganny mon pa konnen mon popilarite ensidswit, nou pa fer nou kasyet deryer. Nou pou bezwen fer sa bann konversasyon. Se pou sa rezon ozordi aköz ou vwar sa ban progre ki'n arive, aköz nou'n nobou kapab fer sa bann parkour. E nou pou bezwen kontinyen annan en relasyon travay avek Federasyon Foutbol menm si i difisil.

Parey larestan, nou pou kontinyen. Nou a fase ozordi nou pou byen demen, pou nou kapab pou nou bann atlet pou kominote *sport* Sesel, nou pare pou nou kapab pe fer sa.

E me selman, nou pa pou kapab kasyet keksoz mal. Nou pa pou kapab pou nou pa dir pou dir a non, tou keksoz i byen e mwan, mon pa pou kapab Mr Chair, vin koman ipokrit vin la e felisit bann

dimoun, nonm zot non kan mon, mon santi pa merite. Mersi Mr Chair.

(APPLAUSE)

MR SPEAKER

Mersi, Minis. Onorab Bijoux.

HON GERARD BIJOUX

Mersi, Mr Speaker. Bonn apre midi Minis, bonn apre midi PS. Mwan osi mon'n zwenn popilasyon antye ou kapab dir pou remersi Gouvernman pou sa bon travay, pou sa bann lenfrastruktir ki'n kapab mete pou *beach soccer*.

E an parlan lenfrastruktir Minis, mon annan en kestyon pou sa pou sa *ground* ki zot in fer Anse Royale nou apresye, aköz mon krwar mon koman vwar bann zenn manrmay i komans servi pou le moman.

Alors mon kestyon se ki plan ki zot annan pou sa lenfrastruktir ? E ansanm avek sa devlopman nou *Sports Complex* Anse Royale, eski nou pa kapab met en fason asize pou ki bann konpetisyon *beach soccer* i kapab ganny fer Anse Royale desantralize en pti pe? Mersi Minis.

MR SPEAKER

Mersi. Minis?

MINISTER MARIE-CELINE ZIALOR

Mersi, Mr Chair. Mersi, Onorab Bijoux, pou ou kestyon. Definitivman. Sa enn Anse Royale li i permanan i pou reste pa zis *beach soccer* me tou bann larestan *beach sports*. Se sa laranzman avek NSC pou nou fer sa *arena* ki laba.

E pou nou met plan pou asize definitivman. Nou konnen pou dir i annan en redevlopman nou bann lenfrastruktir sportif Anse Royale, ki nou pe espere ki ava demare tre byento.

Pou annan en *complex* - en *sport complex* la pou desantraliz nou bann lenfrastruktir. E definitivman sa *arena* nou pou definitivman fer en pe travay apre lo la pou fer li ki nou kapab fer bann konpetisyon.

Pa zis *Beach Soccer* selman *Beach Volleyball* larestan *Beach Rugby*, *Beach Handball* tousala pou ki bann zabitan dan sid, dan was i ava kapab zot osi, zot osi rezouir en lenfrastruktir de kalite. Mersi Mr Chair.

MR SPEAKER

Mersi, Minis. Onorab Georges.

HON BERNARD GEORGES

Mersi, Mr Chair. Mr Chair, i regretab i regretab, ki depi 2 er edmi ziska 4 er kar latmosfer dan Lasanble ti en latmosfer ekstraordiner an sipor sa

levennman *world class* ki nou'n viv depi le 1 ziska le 11 *May*.

E ki avek en bi sey may Minis en zanbet, en Manm Lasanble - en *Leader* dan Lasanble in kapab kas *cool* konpletman lo sa ki nou ti pe koz lo la.

E anmenn en negativite dan en pozitivite ki nou ti pe viv dan sa Lasanble i regretab. E mwan mon kondann sa tout an remersyan Minis pou son fransiz e pou eksplike. A plizyer repriz in fer nou konpran ki i annan en rapor ki pe vini, i pe sey dir nou tyonbo zot ava konnen ki pe pase vini dan sa rapor.

Me malerezman i annan en dimoun ki li in krwar i pli malen i pou bezwen vin demann sa keston, e gat en apre midi an antye.

Mr Speaker, mwan mon pa pou al ladan avek - mon pou sey retourn avek en pe pozitivite, e tou an remersyan tou sa bann dimoun ki nou'n remersye sirtou Lepep Seselwa.

Me mon ti a kontan osi, e mon pa kapab apre midi pa rekonnet an partikilye 3 dimoun Prezidan Larepiblik, pa pou tou sa ki in fer nou tou nou konnen sa ki'n fer.

Me annou pa bliye ki i osi Patron foutbol, e si in pran sa keksoz an men se aköz i ti

annan en devwar koman Patron Federasyon Foutbol!

(APPLAUSE)

HON BERNARD GEORGES

Annou pa bliy sa, annou pa fer krwar ki in fer en keksoz ki i pa ti devret pe fer. Se en responsabilite in desarz sa responsabilite tre byen.

E lo sa nivo mon ti a osi avek ou permisyon kontan remersye sa de lezot dimoun, enn aktyelman se nimerò 6 Wayne Sarah ki sorti dan sa pli zoli distrik Les Mamelles avek bann pli bon *sportsmen* e *sportswomen* ki annan dan sa pei.

E annou pa bliye en dimoun ki'n marye Mamelles PS Jean-Louis ki reste dan mon distrik. Mersi PS pou tou sa travay ki ou'n fer, mersi Minis pou sa travay ki ou'n fer.

Mon keston Mr Speaker, aköz mon bezwen demann enn apre sa koze ki mon'n koze, Minis ki ou krwar avek sa avek sa latmosfer avek sa *leadership* ki nou pei in montre - avek sa lantouzyazm ki Sesel i annan, avek sa *Paradise arena* avek sa leksperyans ki nou'n gannye, eski nou pa kapab vin en *regional hub* pou *Beach Soccer* dan sa rezyon?

Eski nou pa kapab fer sa, e eski nou devret fer li? Aköz mon krwar ki si nou kapab fer

li nou ava kapab reste dan sa rezyon koman No.1 pou sa *sport* ekstraordiner. Mersi Minis.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi bokou, Mr Chair. Mersi bokou, Onorab Georges, pou ou bann komantr e sirtou pou sa kestasyon akòz se sa zisteman depi premye zour nou ti annan bann zofisyè CAF ki ti la dan pei dan sa *arena*.

Depi premye zour se sa komantr ki zot in fer, pou ki nou vin pa zis *hub* rezyonal me pou Lafrik, zot pe mazinen akòz Lafrik napa enn sa *arena* parey.

E zot pe mazinen ki Lafrik in ganny li en *arena* la e zot koman CAF zot anvi diskite avèk nou e regarde ki mannyer sa i vin pa zis *regional, continental hub* pou *Beach Soccer*.

Me selman pa zis *Beach Soccer*, e se sa ki mon kontan mon osi par ler avèk bann atlet bann dimoun ki fer *sports*, i pa regard zis son disiplin.

Zot in osi akòz diferan dimoun lo nivo Lafrik ki ti la viktim ki ti la kapasite koman - ou konnen akòz larestan dimoun i vini menm si napa foutbol li.

Parey mon konnen pou dir Federasyon Enternasyonal *Volleyball* pe regard nou akòz zot in ekri mon zot pe regarde pou *Beach Volleyball*.

Zot vini akòz zot vin regard - zot vin teste tou sa bann kapasite ou pei, e zot vin regarde ou pe fer *Beach Soccer World Cup* ou pe fer *World Cup* in tir latansyon en pti Sesel ou pe fer *World Cup*.

E zot pe regard pou larestan *beach sports*. E zot anvi osi tou nou'n deza ganny aproz ek *volley ball* pou regard en *hub*. Akòz zot fer *world tour* zot, pe regarde si Sesel posibilite pou vin en *hub*. So, sa kestasyon ki ou a pe demande Onorab Georges, atraver ou Mr Chair, i enn tre valab.

Akòz i enn ki definitivman nou a pe konsidere e sanmenm sa dan mon *statement* mon'n dir sa retonbe, sa prodwi ki nou'n fer la son rezilta tou sa kantite reveni sa kantite travay, sikse ki nou pou anmase sa mon krwar i zis bouton sa.

Sa i zis bouton pou annan en kantite keksoz ki pe vini, sanmenm sa ou vwar sa bann komantr negativ ki pe sey redi nou akòz zot konnen zot pou dir sa zot konnen lekel ki'n fer tou. Mersi Mr Chair.

MR SPEAKER

Mersi, Minis. Onorab William, ou annan dernyen kestyon.

HON WAVEN WILLIAM

Mersi, Mr Speaker. Bonn apre midi Minis avek PS. Mr Speaker, mon ti a kontan felisit Prezidan Ramkalawan ki'n *stand strong* ek pep Seselwa koman Patron foutbol Sesel a latet Komite Lorganizasyon pou asire i loner Sesel i ganny sove.

Leko deor Mr Speaker, i pa pe dir ale, me pe dir kit li lanmenm Mr Speaker!

(APPLAUSE)

HON WAVEN WILLIAM

Mr Speaker, mon kestyon i konm swivan, Minis, Minis, Minis par lefe ki eski ou ti kapab konfirman pou dir *all along* depi ler ki Sesel i konnen i ti pou organiz *Beach Soccer*, ki Federasyon Foutbol pa'n prezant en plan aksyon depi lo komansman ziska lafen pou organiz sa zwe?

Eski ou pe konfirman osi ki a okenn moman ki federasyon pa'n fer konnen NSC ouswa Gouvernman pou dir rankontre problem?

E dayer alor, eski NSC ouswa mon pa konnen si Gouvernman zot pou fye lo *the existing* federasyon pou bann lezot gran zwe ankor? Par lefe ki nou'n rankontre sa bann difikilte? Mersi.

MR SPEAKER

Mersi, Onorab. Minis?

MINISTER MARIE-CELINE ZIALOR

Mersi, Mr Chair. Mersi, Onorab pou ou bann kestyon. Federasyon Foutbol ti annan plan zot, zot ti annan plan. Plan pou *bid*, plan pou konpetisyon tou sa bann plan ti la li.

Fodre nou mon krwar nou fer la diferans osi ant Federasyon Foutbol koman en lorganizasyon, parey ennler dimoun i dir *FIFA*, *FIFA* i en lorganizasyon li. E i annan endividi.

Difikilte ki nou'n gannnen avek son *Chair* e avek Mr Chetty, avek son *Chair* - difikilte Federasyon Foutbol li i annan i ti annan en plan e zot annan plan.

Akoz zot bezwen prezant plan avek *FIFA* pou zot ganny finansman e apre zot bezwen prezant tou le lannen. E *FIFA* i enn bann Lorganizasyon Sportif, mon mazine dan lemonn antye ki pli administrative, ki pli rigoure li.

Ou bezwen prezant en kantite rapor, en kantite plan pou ou kapab asosye avek li pou ou ganny finansman. Lo papye tou sa bann keksoz i la li. Lo papye tou sa bann keksoz i prezan.

I zis en zafer prezan pou zot met an loperasyon sa bann plan ki annan, ki dayer i defi en pe bann febles nou bann diferan Lorganizasyon bann Federasyon ki nou annan, ki i pa en sekre kot nou annan sa.

Me selman parey mon pe dir, pou nou kapab travay avek zot. Nou wi, nou pa pou fer krwar tou keksoz i byen, me selman nou pa pou ale pran delo sal zet en pti baba.

Nou konnen pou dir foutbol sirtou la *Beach Soccer* i en *sport* pli popiler ki annan Sesel dan lemond e nou pou bezwen definitivman regarde ki mannyer nou kapab travay avek bann dimoun.

E letan in annan sa kominikasyon ki pa'n marse avek *Chair*, be pou nou kapab siport e ed tim nou'n bezwen al ver *management* tim ek son lantouraz.

Zot federasyon zot, e in annan bann manm lo federasyon kot nou'n bezwen kapab vwar ki mannyer zot be selman zot annan en prosedir zot osi pas atraver pou zot kapab fer serten travay.

Serten bann travay i kapab ganny fer li malgre, malgre i annan bann difikilte. Me selman mon anvi fer kler se ki ti annan en plan, ti annan en plan detaye ki ti anmennen sorti kot Federasyon Foutbol pou Gouvernman pou organiz sa tournwa e son bann

deroule. E tou keksoz ki bezwen ganny fer. Si zot ti napa sa definitivman *FIFA* pa ni ti pou les ou pou anmenn ou dokiman pou ou kapab *bid*, ou bezwen annan sa.

I zis en lorganizasyon lo zot nivo, en pe febles ki deza la parey mon pe dir nou kapab travay avek. Me selman prensipalman i *leadership*, i *leadership*.

Me mwan, mon reste konvenki ki e parey nou'n fer la nou'n nobou kapab fer en tournwa e nou ti bezwen zot pou serten keksoz ki pa finansyel ki nou bezwen pas atraver kot *NSC* Departman Lazenés avek *Sport* in nobou kapab pase pou kapab travay.

So, i annan bann fason kot nou kapab fer travay. Nou pa vin detay tousala nou pa dir la kantite ki nou bezwen pe fer ; la kantite *meeting* negosyasyon ki nou bezwen pe fer pou nou kapab gannnen.

Par egzanp, pla pou tim depi 2 an pase plan tim in la li, tou sa bann plan i deza la li i zis ki prezan pou enplimante, enplimant sa tim in annan defayans *leadership*. Mersi Mr Chair.

MR SPEAKER

Mersi, Minis. Bon, nou'n ariv a lafen sa sesyon nou a termin lo travay la pou ozordi, mon a remersye Minis ek *PS* pou zot

partisipasyon e bann Manm
osi pou zot kontribisyon.

E mon remersye piblik
ki'n swiv nou dan zot lakour e
kot zot été. Nou a repas dan
staz Lasanble pou nou
adjourn. Bon Lasanble i ava
adjourn i nou a repran travay
demen bomaten 9 er. Mersi.

(ADJOURNMENT)